

## **U Bulungana u Niga tere Iesu Kristo te kolotein e LUK**

<sup>1</sup> O Tiopilus a tsi tsunono, u katuun u parpara i koloto hakapein u raranga te hatei nena a manka te katoeia e Iesu Kristo i gusurara. <sup>2</sup> Nori i torohanan hopöön u raranga ti hengo naiara turu katuun ti tahis tutuun gono mei e Iesu Kristo me tareier a manka te katoeien te hahatei nena u hihatuts i tanen. <sup>3</sup> Na lia e ngilin koloto has menagi u raranga te hatei hamatskö nena a manka teka i tamölö. Taraha? Alia u solon torohala hatagala koruni tego atei sil menai a manka hoboto te katoe e Iesu na te butuia i tanen. <sup>4</sup> Alia e ngilegu alö go atei haniga sil u raranga u mana turu hihatuts hoboto tu hengoein lö.

*U bulungana tegi posa menai e Jon a tsonun baptais*

<sup>5</sup> Tara pöata te kingia e Herot i Judia, e kamei a töa pris e ka ti ngöei e Sakaria. Nonei e pala uu turu pris tere Abitsa. A tahol tere Sakaria a solonen e Elisabet e pala has uu turu pris. Taraha? Nonei a hatutubunei tere Eron. <sup>6</sup> U muntahol teka i matsköia i matana e Sunahan, na nori i kukute haniga hasi u mamana u raranga na markato tere Sunahan a Tsunono. <sup>7</sup> Kaba nori i möa ta pien. Taraha? E Elisabet a tahol a kuba, na nori a huol i tsonpan na i toböana hoboto.

<sup>8</sup> Turu töa u lan u katuun tere Sakaria, na e Sakaria has, i na kui a toukuin pris i taren i

matana e Sunahan. <sup>9</sup>Tara markato turu pris nori i hopö kap menaien tegona hats menaien u ruhu u soksoka haniga tara makumun haats turu insens iahana Luman Lotu Pan. <sup>10</sup>Tara pöatan haats teka u katuun u parpara koru i gonoia ielesala bate singor. <sup>11</sup>Ba töa angelo tara Tsunono e butuna tere Sakaria me tuolna tara pal matou tara makum te hahaatse ria u insens. <sup>12</sup>Pöata te tareia e Sakaria a angelo, ba nonei e asingotona me matout koruna. <sup>13</sup>Kaba a angelo e rangaia i tanen me poeiena, “O Sakaria, alö goma matout ii. Taraha? E Sunahan e hengo hakapi tu singo sil menai lö ta pien. A tahol i tamölö e Elisabet e pose nou romana a pien tson, balö te ngöe moeien e Jon. <sup>14</sup>Alimiou e ka memou a nisasaala pan tegi posa menaien, na u katuun u parpara e sasaala gono has merariou limiou romana. <sup>15</sup>Taraha? Nonei ena katuun pan noa i matana a Tsunono. Ba nonei tema tatei ue noi u uain na u ramun u hiski. Na nonei e saputu menou romana u Namnamei u Göagono i mam has tegi posa menaien! <sup>16</sup>Nonei e habirits pouts mera noi u katuun u parpara ri Israel tere Sunahan a Tsunono i taren. <sup>17</sup>Ba nonei te mam nanou romana a Tsunono bate ka menou a markato na nitagala te ka mei e Ilaita a propet. Na nonei ena nolo pouts ranou a man munmun tamana, bate habirits ranou u katuun u hhipus ba nori te töan hakats hanigar temar hakats uaier u katuun u niga. Na nonei e kato hamatskö ranou romana u katuun i mam tegona lama a Tsunono, ba nori te hahalose rouen.” A angelo e mar ranga uu teka.

<sup>18</sup>Be Sakaria e poeiena tara angelo, “I me temar atei sil mena goi lia tega mana uu raranga teka?

Taraha, alia u tsonpan hakapa na tahol i tar e toböana hakapa has.”

<sup>19</sup> Ba angelo e ranga palise nen me poeiena, “Alia e Gabriel te roron tuol gia i matana e Sunahan. Nonei e tahul mena mei lia tegomi ranga uu lia i tamölö bate hatei gilö u bulungana u niga teka. <sup>20</sup> Na u raranga i tar e butu hamana nou romana tara pöata hamatskö i tanen. Kaba hengo! Alö e biru mou batema antunan ranga moui e antunana tego butu hamana uu a manka teka! Taraha? Alö ema hamanemi u raranga i tar!”

<sup>21</sup> Ba u katuun e lagi hahaloser e Sakaria, me hakhakatsir me poeier, “Aha te kaka pala menen i luman lotu?” <sup>22</sup> Ba tara pöata te lakasa men ba nonei ema antunan ranga neia i taren, ba nori e atei siler e Sakaria e tarema u hiharöto iahana luman lotu. Nonei ema antunan ranga ii me ranga tuun las nena a limanen.

<sup>23</sup> Ba pöata te kapaia a pöatan kui tere Sakaria iahana Luman Lotu Pan, ba nonei e la pouts uana i han. <sup>24</sup> Ba i murinen ba tahol i tanen e Elisabet e pikana, mema mala laba nanei a luma tara tolima tsihou. <sup>25</sup> Be Elisabet e poeiena, “A Tsunono emar taguhu mena nei lia teka. Nonei e luba naneilia a nimatsingolo tara tou kuba.”

### *U bulungana tegi posa menai e Iesu*

<sup>26</sup> Pöata te pikeia e Elisabet a tönomo a tsihou, be Sunahan e hala nenama a angelo a solonen e Gabriel me la uana tara taun i Galili ti ngöei i Nasaret. <sup>27</sup> Nonei e la uu tara tahol a kukubei a solonen e Maria. Nonei a tahol ti hopö kap bei a töa tson a solonen e Josep, a hatutubunei tere Devit a King. <sup>28</sup> Ba angelo e la uanama i tanen me poeiena,

“O Maria, a Tsunono e ka gono meno lö na nonei e ngil korue noulö.”

<sup>29</sup> E Maria e hengoe u ranga teka me toku koruna, ba nonei emar hakats tuun uana, “I me temar mouna uana u mar raranga teka?” <sup>30</sup> Ba angelo e poeiena i tanen, “O Maria, moa tu matout. Taraha? E Sunahan e hanige noulö. <sup>31</sup> Alö e pika mou bate posei mou a pien tson, balö te ngöe moien e Iesu. <sup>32</sup> Pöata te pan noien romana ba nori te ngöe roien a Pien tere Sunahan iasa Koru. E Sunahan a Tsunono te hale noien a nitsunono tere tubunen e Devit. <sup>33</sup> Ba nonei te tsunono ranou a pala tere Jekop tara mamana pöata i murimuri. Na nipepeito i tanen ema tatei kapa noi romana.”

<sup>34</sup> Be Maria e poeiena tara angelo, “Ime temar butu uanou a ka teka? Alia u möa ta tson.”\*

<sup>35</sup> Ba angelo e poeiena i tanen, “U Namnamei u Göagono e la uanama romana i tamölö ba nitagala tere Sunahan temi sapute noulö. Ba pien a göagono te pose moulö te ngöe roui a Pien Tson tere Sunahan. <sup>36</sup> Hengo! A tou sungutu mölö e Elisabet e pika hasena a pien tson! Nonei e toböana koruna na nori i ngöeien a tahol a kuba, kaba nonei e pika hamanasena a tönomo a tsihou! <sup>37</sup> Taraha? E möa ta töa ta ka te goma antunan kato nai e Sunahan.”

<sup>38</sup> Be Maria e poeiena, “Alia a taholun kui tara Tsunono. A ka teka e tatei butuna i tar temar ranga uamula lö.” Ba angelo e laba nanen.

### *E Maria ena tarei e Elisabet*

<sup>39</sup> Tara pöata teka be Maria e takeina me la hasesei uana tara töa taun te kaia tara man pokus

---

\* **1:34:** E Maria e ma soho gono noa mei ta tson.

tara provins i Judia. <sup>40</sup> Ba nonei ena tasuna i luma tere Sakaria me hala nena u hanhaniga i tanen tere Elisabet. <sup>41</sup> Ba pöata te hengoeia e Elisabet u raranga tere Maria, ba pien i torinen e sosuna, be Elisabet e saputu mena u Namnamei u Göagono tere Sunahan. <sup>42</sup> Be Elisabet e ranga hapanina me poeiena, “E Sunahan e kalala saluhe railö a touhaliou hoboto, na nonei e kalala hase nou a pien te pose moulö. <sup>43</sup> Alia a tahol papala, na lö e tsinana a Tsunono i tar. Aha te la sile mumalö i tar? <sup>44</sup> Pöata te hengoe gula lia u raranga i tamölö, ba pien i torir e sosuna me sasaalana. <sup>45</sup> Alö e sasaala koru mem te hamana uamölö. Taraha? U raranga te hopö kapiin a Tsunono i tamölö e butu hamana nou.”

*E Maria e köma me soloseiena e Sunahan*

<sup>46-47</sup> Be Maria e poeiena:

“A torir e soloseiena a Tsunono,  
na lia e sasaala koru megu e Sunahan te  
taguhe noulia.

<sup>48</sup> Nonei e taatagi silena  
a taholun kui papala i tanen,  
na u katunura i romana na u katuun hobotora i  
murimuri e ngöe roui romana lia a taholun  
kalala.

<sup>49</sup> Taraha? E Sunahan te Tagala Saluhena e  
kato bei lia a ka a kapan,  
na solonen e göagonona.

<sup>50</sup> Nonei e taatagi sil rena u katunura i romana  
na u katunura tara pöata hoboto i murimuri te  
hatsunone ren.

<sup>51</sup> Nonei e harötein a nitagala i tanen,  
ba nonei te rura rena u katuun u hhipus.

<sup>52</sup> Nonei e hakoul bar u king turu gungum u kapan i taren,

bate söata seiena a pinolasana katuun.

<sup>53</sup> Nonei e halari u katuun ti bes a manka man niga, ba nori te masulur.

Kaba nonei ema hala rai u katunun moni a manka ti singoeien.

<sup>54-55</sup> Nonei e taguhir u katunura i Israel, u katunun kui i tanen.

Na nonei e kato hamani u raranga te hopö kap naaien turu tuburara.

Nonei ema solopale ii tego haröto menaien a nihitaguhu tere Abraham

na tara pala i tanen tara mamana pöata te la nama romana.”

<sup>56</sup> E Maria e ranga hakapa uu teka. Ba nonei e ka gono mena e Elisabet a topisa toum a tsihou, me la poutsuna i han i tanen.

### *E Jon a tsonun baptais i posei*

<sup>57</sup> A pöata e butu hakapa tego posa mei e Elisabet, ba nonei e poseiena a pien tson. <sup>58</sup> Bu katuun ti kaia tara han i tanen na sungutunen e hengoner te taatagi kuru menaien a Tsunono i tanen me hale neien a pien, ba nori e sasaala gono meren.

<sup>59</sup> Turu hatohitina u lan i murina ti poseien, ba u katuun i tanen e la rima tegimi pö menai a pien. Nori i ngilin ngöeien e Sakaria, a solo tere tamanen. <sup>60</sup> Kaba e Elisabet e pei, “E möa, a solonen e ngöe roui e Jon!”

<sup>61</sup> Ba u katuun e poeier i tanen, “E möa ta töa tara sungutu mölö tegi ngöei e Jon!” <sup>62</sup> Ba nori e habaru mer e tamana pien turu ualima me rangata ner a solo te ngileien egi ngöei a pien.

<sup>63</sup> Be Sakaria e hatahe silena ta tsi pepa ba nonei e mar koloto uana teka: “A solonen e Jon.” Ba nori hoboto e asingoto korur. <sup>64</sup> Ba tara pöata koru teka be Sakaria e ranga poutsuna, me soloseiena e Sunahan. <sup>65</sup> Ba u katuun hoboto i han i tanen e matoutur, ba u bulungana tara mamana teka e la hoboto uana tara mamana han tara man pokus i Judia. <sup>66</sup> Ba u katuun hoboto ti hengoeien e hakhakatsir me poeier, “A pien teka e katuun pan nou romana! Taraha? A nitagala tara Tsunono e kana i tanen.”

*E Sakaria e kato u rangan propet*

<sup>67-68</sup> Be tamana pien, e Sakaria, e saputu mena u Namnamei u Göagono, ba nonei e katoena u rangan propet me poeiena:

“Aragi solosei e Sunahan a Tsunono na i Israel!

Taraha? Nonei emi taguhu renara u katuun i tanen, bate sakahis pouts ranoura.

<sup>69</sup> Nonei e habuti a tsonun mammam a tagala koru tego taguhu raioura,  
a hatutubunei tere Devit, a katunun kui tara Tsunono.

<sup>70</sup> E markato uana ti mar ranga uu propet u niga tara Tsunono i manasa.

<sup>71</sup> Nori i rangein u raranga tere Sunahan me poeier e Sunahan e ranga hamana tego luba meraienra tara nitagala turu pakö hoboto i tarara, u katuun te tori homi ria i tarara.

<sup>72</sup> E Sunahan e pei nonei ega taatagir u tuburara batema tatei solopale nei u raranga u göagono ti kitsi.

73-74 Nonei e ranga hamana koruia iasa tere tuburara e Abraham ega taguhu raioura bate luba ranoura turu pakö i tarara, bara te kuiera a toukui tere Sunahan batema matout rei.

75 Nonei e ngilena aragi matsköia i matanen turu mamana u lan tara nitöatöa i tarara.”

76 Be Sakaria e pei hasena tara pien, “Alö a tsi pien i tar, alö e ngöe roui a propet tere Sunahan iasa Koru. Taraha? Alö tena peits moa tara Tsunono tego hamatskö menai a maroro tega sila men.

77 Alö ena hatei ramou u katuun tere Sunahan nonei e luba nanou romana a man markato a man omi i taren bate lu pouts mera nouien i tanen.

78 Taraha? E Sunahan i tarara e taatagi koru ranoura na e tami has na i tarara. Nonei e hala ranoira a hitaguhu a niga bate here noi a pitala te piri nama tara bongbong bate luba nena u kuhil.

79 U ualesala i tanen e halesala ranou romana u katuun te ka ria turu kuhil, u katuun te ka uar tara tou mate.

Ba nonei te hamatskö rena romana a mourara bara te lauara tara marorona tara masalohana.”

E Sakaria temar ranga uu teka.

80 A pien e pan susul ba u namnamei i tanen e butu hatagala susul hasina. Nonei e kaia tara makum a palaka, e antunaia tara pöata tega na butuuien i matar u katunura i Israel.



## 2

### *E Iesu i posei (Matiu 1:18-25)*

<sup>1</sup>Tara pöata teka e Sisa Ogastas te gamman Pania i Rom. Nonei e hala nela u raranga tegi hakoloto menai u katuun hoboto a soloren turu buku tara gamman. <sup>2</sup>Nonei a pöata tutuun ti katoeien u nihakoloto teka, a pöata te gamman hasia e Kuirinias tara provins i Siria. <sup>3</sup>Bu katuun e la uaier ti posa raia u tuburen tegina hakoloto uaian.

<sup>4</sup>E Josep e laba has nela i Nasaret, a taun i Galili, ba nonei e kete ualala tara taun tere Devit a solonen i Betlehem tara provins i Judia. Taraha? E Josep a hatutubunei tere Devit. <sup>5</sup>Nonei e la gono has mei e Maria, a tahol ti hopö kap beien tega töleien, tegina hakoloto menaien a soloren turu buku. Na u pika tere Maria e pan hakapa. <sup>6</sup>A pöata ti ka noaien i Betlehem, ba pöatan posa i tanen e butuna. <sup>7</sup>Ba nonei e poseiena a pien tson a hamua i tanen me pitse neien u labalaba me hopöe nen tara bokisin nonou turu bulmakau. Taraha? E möa ta makum i taren tara luman soho.

### *U angelo nu katunun taratarakap turu sipsip*

<sup>8</sup>Tara han teka a palair u katuun ti pepeito kapir a man heis sipsip i taren tara bong, i kaia ielesala tara taun i Betlehem. <sup>9</sup>Ba töa angelo tara Tsunono e butuna i taren, ba u ualesala pan tara Tsunono e alesala uana i taren ba nori e matout korur. <sup>10</sup>Ba angelo e poeiena i taren, “Alimiou goma matout mi. Alia e la meguma u bulungana u niga tara nisasaala i tamilimiou na turu katuun hoboto. <sup>11</sup>A Tson Hitaguhu i tamilimiou e pose lila i bong teka tara taun tere Devit. Nonei a katuun tega la uama

i puta te ngöe roui e Kristo. Nonei a Tsunono!  
<sup>12</sup> Alimiou ena mar marei mena moiën teka, a tsi kukuriki te pitse lilei u labalaba, e opöna tara bokisin nonou turu bulmakau.”

<sup>13-14</sup> Ba u angelo u para koru ri Kolö e singotei butu gono mer a angelo teka. Ba nori e soloseier e Sunahan me poeier,

“Solosei iam e Sunahan i Kolö iasa koru!

Na tara han i puta, u katuun te haniga rena e Sunahan e tatei ka ria tara masalohana!”

<sup>15</sup> Pöata ti la pouts uu angelo i Kolö, ba u katunun pepeito kap turu sipsip e hiararangar me poeier, “Aragi la boroboro uu i Betlehem bara tena tarera a ka te butu lala, te hatei rela leira a Tsunono!”

<sup>16</sup> Ba nori e la boroboror mena sabe rer ere Maria mere Josep, ba nori e tara haser nonei a tsi kukuriki te opöia tara bokisin nonou turu bulmakau. <sup>17</sup> Nori i tara hakapeien me töan ranga hatei laner a ka temi hatei raïen a angelo. <sup>18</sup> Ba u katuun hoboto ti hengo u bulungana turu katuun pepeito kap turu sipsip e asingoto korur. <sup>19</sup> Kaba e Maria e hakats kap nitöani a manka hoboto teka me hakats hatiamana nanen. <sup>20</sup> Ba u katunun pepeito kap turu sipsip e la poutsur me solosei meri e Sunahan a manka hoboto ti hengoeien na ti tareien. A manka teka e mar butu hamana has uu temar ranga uu a angelo.

<sup>21</sup> Na turu hatohitina u lan i murina ti poseien, ba nori e pö ren me ngöe rien e Iesu, a solo te hatei mamin a angelo be Maria tema pika noanei.

*E Iesu i haröto naia tara Luman Lotu Pan*

<sup>22-24</sup> Te butuma pöata tegi kato hagogoso meraien temar ranga uu a Lo tere Mosis, be Josep

mere Maria e lu menari a pien i Jerusalem. Nori i la tina hatsunono menai u haats temar ranga uu buku tara Tsunono, “Alö ego haats a huol a kulu tsi a huol a kitou a hitots.” Na nori i la sil hasi te gina hala menai e Iesu tara Tsunono. Taraha? U raranga ti koloto naia turu buku tara Tsunono e poeiena, “A mamana hamua tson egi hala menai tara Tsunono.”

<sup>25</sup> Bara, a töa katuun e kaia i Jerusalem a solonen e Simion. Nonei a katuun a niga na e roron hatsunoni e Sunahan, na nonei e hahalosi tego taguhu merai e Sunahan u katunura i Israel. Na u Namnamei u Göagono e roron kaia i tanen. <sup>26</sup> U Namnamei u Göagono e ranga hakapa meien nonei e tara noua tara Tsunono e Mesaia i mamina tego mate uaien. <sup>27</sup> Ba u Namnamei u Göagono e peigi mena nei e Simion tara Luman Lotu Pan. Ba u mun tahol e la mena rimei e Iesu a tsi kukuriki tara Luman Lotu Pan tegi kato menai a markato i tanen temar ranga uu a Lo tere Mosis. <sup>28-29</sup> Be Simion e söatena a pien me haniga uana tere Sunahan me poeiena:

“O Tsunono, alia a katunun kui i tamölö e ka tala megou a masalohana tara pöata tena mate goua lia.

A ka tu ranga hamanein lö e butu hakapa.

<sup>30</sup> Taraha? A matagulia e tara hakapi a katuun tu hala nema lö tegomi lu pouts raiou lam.

<sup>31</sup> Alö u hopö kap silemeien tega butu uaien i matar u katuun hoboto.

<sup>32</sup> Nonei e here noi romana u ualesala, bate haröto nena a maroro i tamölö turu katuun tema Jiu ri,

na nonei e hala seie nou a solona a pala i tamölö a tei Israel.”

<sup>33</sup> Bere Josep mere Maria e asingoto koruner temar hatei menai e Simion e Iesu. <sup>34-35</sup> Be Simion e kalala ranen me poeiena tere Maria, “Pöata te pan hakapa noa a pien teka, nonei e kato harus ranou, ne hala sei ranou u katuun u parpara\* ri Israel. Ba nonei te here noi a hatöatongo te ranga hasuala nariou u katuun. Na a man hakats i torir u katuun u parpara e haröto nariou romana. Na a nitaatagi pan te here noi u saka e butu has noua i tamölö!” Temar ranga uu e Simion.

<sup>36</sup> A töa propet a tahol e ka has, a solonen e Ana. Nonei a pien tahol tere Panuel, tara pala tere Aser. Nonei a tahol a toböana te hitöl puku mei a tson i tanen turu tohit u hiningal ba tson e matena. <sup>37</sup> Na amoaba teka e ka mei u töal u maloto na u tohats u hiningal. Nonei ema tatei la banai a Luman Lotu Pan. Tara lan na tara bong nonei e roron hatsunoni e Sunahan te singo uaien i tanen bate roron agono has nena a kannou. <sup>38</sup> Na nonei noahas tara pöata teka nonei e la uu tara tsi kukuriki e Iesu mena hala nena u hanhaniga tere Sunahan, me ranga nena e Iesu turu katuun hoboto i Jerusalem ti hahalosi a pöata tega taguhu merai e Sunahan u katunura i Israel.

### *Nori i la pouts uu i Nasaret*

<sup>39</sup> Pöata ti kato hakapeia ere Josep mere Maria a mamanaka te rangein a Lo tara Tsunono, ba nori e la pouts mer e Iesu tara taun i taren i Nasaret. <sup>40</sup> Ba nonei a pien e pan susul gono menama a nitagala.

---

\* **2:34-35:** A pala te hala sei rariou e halhal toum roua tara pala te hala puta rariou.

Nonei e ka mei u hakats u niga koru, na nikalala tere Sunahan e ka hasia i tanen.

*A Pien Tson e Iesu e kaia tara Luman Lotu Pan*

<sup>41</sup> Turu mamana u hiningal e tamana e Iesu na e tsinanen i roron la uu i Jerusalem tara Kannouna turu Paska turu Jiu. <sup>42</sup> Na tara pöata te ka mea e Iesu u maloto na u huol u hiningal, nori i la uu nonei tara kannou teka. <sup>43</sup> Te kapaia a man lan tara kannou, ba nori e la poutsur i han.† Kaba u muntahol ima atei sile ii te kaka pouts uama e Iesu i Jerusalem. <sup>44</sup> Nori i pei lasi nonei e ka gono mer a palai ti la gono meramen. U töa u lan u ohots ti la hakapa ba nori e tanian sake ren tara man hun katuun na tara man hahikapien i taren. <sup>45</sup> Kaba nori ima sabeien, ba nori e kopis pouts nitöa uaier i Jerusalem tina sake menaien. <sup>46</sup> Turu hatopisana u lan nori ina sabeien i Luman Lotu Pan, te gum gono meraien u tson hihatuts turu lotu, bate hehengona i taren bate rangata has raneien a man harangata. <sup>47</sup> U katuun hoboto ti hengoia i tanen i asingoto koruni a niatei na man ranga palis i tanen. <sup>48</sup> E tamanen na e tsinanen i asingoto koru hasiin ti tara menaien e Iesu. Be tsinanen e poeiena i tanen, “A pien i tar, taraha tsiponi balö te markato uaiem teka i tamulam? Alia ne tamamölö u lagi sakesake mölö me toku korum!”

<sup>49</sup> Be Iesu e ranga palis ranen, “Aha te sake sile mumei limiou alia? Alimiou ema atei silemi tego ka uu lia tara luma tere Tamar?” <sup>50</sup> Kaba u

---

† **2:43:** Nori i tanian la uu i Nasaret ba ti pita noaien i maroro ba nori e kopis poutsir ti tara menaien tema ka uai e Iesu turu katuun ti tataala gono meraien.

muntahol ima atei sile ii a mouna a ka te ranga naien i taren.

<sup>51</sup> Be Iesu e la gono pouts mera nen i Nasaret me kukute hanigeiëna u raranga i taren. E tsinanen e haka nitöa neia a manka teka i torinen. <sup>52</sup> E Iesu e pan susul, ba niatei i tanen e butu hanigantöa has nama. Be Sunahan na u katuun hoboto e haniga korue ren.

### 3

#### *U hihatuts tere Jon a Tsonun Baptais (Matiu 3:1-12, Mak 1:1-8, Jon 1:19-28)*

<sup>1</sup> Turu hamaloto na u tolima u hingingal te gamman pania e Taibirius i Rom, nonei has a pöata te tanian hihatutsia e Jon. Be Pontias Païlat te gamman na i Judia, na e Herot i Galili, be toulanen e Pilip te tara kap nena a provins i Ituria na i Trekonaitis. Be Laisenias te tara kap nena i Abilin.

<sup>2</sup> Bere Anas mere Kaiapas te tsunono pan raier u pris. Nonei tara pöata teka u raranga tere Sunahan e la uama tere Jon, a pien tson tere Sakaria, te kaien tara makum a palaka. <sup>3</sup> Be Jon e lauana tara mamana han i rehina Ramun i Jodan me mar hihatuts uana teka, “Palis ba naiam a man markato a man omi bate habaptais miou, be Sunahan te luba nanou a man markato a man omi bate tara pouts ranou limiou.” <sup>4</sup> Nonei temar koloto uu e Aisaia a propet, turu buku i tanen i manasa. Ba nonei e pei hasena:

“A töa katuun ena ku hapan noua romana tara makum a palaka bate poeiena,  
‘Hamatsköeiam a man markato i tamilimiou.

A Tsunono e ngilin sila nama romana tara maroro a matskö.

<sup>5</sup> A man gohi hoboto e tatei hue riou, na man pokus hoboto e tatei hala pute riou.

Na kalana a kököela e hamatsköe riou, na maroro a tuktukul e kato hamamarohane riou.

<sup>6</sup> Ba u katuun hoboto te tare riou a nihitaguhi tere Sunahan!’ ”

Temar koloto uu e Aisaia e kapana teka.

<sup>7</sup> U katuun u parpara i la uama tere Jon tegimi habaptais uaien i tanen. Ba nonei e poeiena, “Alimiou u kökötsi u katuun u gamogamo! Alimiou ema antunan bus ba namoi a raharaha tere Sunahan te butu nou! <sup>8</sup> Alimiou go palis ba naiam a markato a omi, bate kato hamana koru uamou te kato uana a katuun te palis ba nena a markato a omi. Alimiou goma mar hakats uami teka: ‘Alam e nigam. Taraha? E Abraham e tubumulam.’ Alia e hatei ragou limiou, e Sunahan e antunan katoe noi u marats teka a hun katuun tere Abraham! E Sunahan ema haniga papale nei a katuun te pala uana tere Abraham. E möa. E hanigeiena a katuun te kukutiena u raranga tere Sunahan. <sup>9</sup> A nikö e opö hamanasana tara polosona u ruei. Na e Sunahan e katsin ngats lupu hoboto hamanasa rena a man ruei tema mala hua haniga ri, bate lapo raria turu tula. E markato uana teka, e Sunahan e hahune nou a katuun tema kato haniga nei.”

<sup>10</sup> Ba u katuun e rangateier e Jon, “Aha te katoe mou lam?”

<sup>11</sup> Ba nonei e ranga palisina me poeiena, “A katuun te ka mena u huol u hasobö ega halan u

töa tara katuun te möana. Na katuun te ka mena a kannou ega molamola has naien.”

<sup>12</sup> U katuun ti lulu a takis i la silema tegimi habaptais uaien, ba nori e rangate ren, “Tson hihatuts, aha tego kati lam?”

<sup>13</sup> Ba nonei e poeiena i taren, “Lu laseiam a takis te ranga uana a gamman.”

<sup>14</sup> Ba palair u soldia e rangata hase ren, “Ga lam, aha tego kati lam?”

Ba nonei e poeiena i taren, “Ma gulemi a moni tara katuun. Na limiou egoma kout gamogamo has nami a katuun. Sasaala meiam a hihol i tamilimiou.”

<sup>15</sup> U katuun i hakatsin e Mesaia e sukusukun lama, ba nori e hakats hapara ner e Jon me poeier nonei toum e Mesaia. <sup>16</sup> Be Jon e poeiena i taren hoboto, “Alia e baptais ragi limiou u ramun tuun, kaba a töa katuun te pan bala nanou lia ena la nama romana. Alia ema antunan hakoul has nagoi u sendol i tanen. Nonei te baptais ranoui limiou romana u Namnamei u Göagono na u tula.

<sup>17</sup> Nonei e katsin lu kata rena u katuun u niga na u katuun u omi, temar hapiraka menari a pem na ngal. Nonei e haka ranoua u katuun u niga tara han a niga, ba nonei te tsuga mera noui u katuun u omi turu tula tema antunan hoso nari.”

<sup>18</sup> Na turu mamana u mar ranga has e Jon e hatuts raien u Bulungana u Niga. <sup>19</sup> Be Jon e ranga silena e Herot a gamman. Taraha? E Herot e töli e Herodias, a tahol tere toulanen pouts. E Herot e kato hakapi a para a markato a omi. <sup>20</sup> Ba nonei e kato hasena a tana markato a omi koru te haka menaien e Jon tara karabus.



*E Iesu i baptaisii**(Matiu 3:13-17, Mak 1:9-11)*

<sup>21-22</sup> I murina ti habaptaisia u katuun hoboto, be Iesu e habaptais hasina. Tara pöata te singoien, ba u Kolö e takalatana, ba u Namnamei u Göagono e hakulue nama a peisanen me koul uanama i tanen. Ba u töa u raranga e butu nama i Kolö me poeiena, “Alö a Pien Tson koru i tar. Alia e ngil korue goulö.”

*A solor u tubuna e Iesu**(Matiu 1:1-17)*

<sup>23</sup> Pöata te hatanieia e Iesu a toukui i tanen, nonei e ka toum mei u topisa u maloto u hiningal. E Iesu i ngöe ii a pien tson tere Josep.

Na e Josep a pien tson tere Heli.

<sup>24</sup> Na e Heli a pien tson tere Matat.

E Matat a pien tson tere Livai.

Na e Livai a pien tson tere Melki.

E Melki a pien tson tere Janai.

Na e Janai a pien tson tere Josep.

<sup>25</sup> E Josep a pien tson tere Matatias.

Na e Matatias a pien tson tere Emos.

E Emos a pien tson tere Nahum.

Na e Nahum a pien tson tere Esli.

E Esli a pien tson tere Nagai.

<sup>26</sup> Na e Nagai a pien tson tere Mat.

E Mat a pien tson tere Matatias.

Na e Matatias a pien tson tere Semein.

E Semein a pien tson tere Josek.

Na e Josek a pien tson tere Joda.

<sup>27</sup> E Joda a pien tson tere Joanan.

Na e Joanan a pien tson tere Resa.

E Resa a pien tson tere Serubabel.

Na e Serubabel a pien tson tere Sialtiel.

E Sialtiel a pien tson tere Neri.

<sup>28</sup> Na e Neri a pien tson tere Melki.

E Melki a pien tson tere Adi.

Na e Adi a pien tson tere Kosam.

E Kosam a pien tson tere Elmadam.

Na e Elmadam a pien tson tere Er.

<sup>29</sup> E Er a pien tson tere Josua.

Na e Josua a pien tson tere Elieser.

E Elieser a pien tson tere Jorim.

Na e Jorim a pien tson tere Matat.

E Matat a pien tson tere Levi.

<sup>30</sup> Na e Levi a pien tson tere Simion.

E Simion a pien tson tere Juda.

Na e Juda a pien tson tere Josep.

Josep a pien tson tere Jonam.

Na e Jonam a pien tson tere Eliakim.

<sup>31</sup> E Eliakim a pien tson tere Melia.

Na e Melia a pien tson tere Mena.

E Mena a pien tson tere Matata.

Na e Matata a pien tson tere Netan.

E Netan a pien tson tere Devit.

<sup>32</sup> Na e Devit a pien tson tere Jesi.

E Jesi a pien tson tere Obet.

Na e Obet a pien tson tere Boas.

E Boas a pien tson tere Salmon

Na e Salmon a pien tson tere Nason.

<sup>33</sup> E Nason a pien tson tere Aminadap.

Na e Aminadap a pien tson tere Atmin.

E Atmin a pien tson tere Arni.

Na e Arni a pien tson tere Hesron.

E Hesron a pien tson tere Peres.

Na e Peres a pien tson tere Juda.

34 E Juda a pien tson tere Jekop.  
 Na e Jekop a pien tson tere Aisak.  
 E Aisak a pien tson tere Abraham.  
 Na e Abraham a pien tson tere Tera.  
 E Tera a pien tson tere Nahor.  
 35 Na e Nahor a pien tson tere Serug.  
 E Serug a pien tson tere Riu.  
 Na e Riu a pien tson tere Pelek.  
 E Pelek a pien tson tere Eber.  
 Na e Eber a pien tson tere Sela.  
 36 E Sela a pien tson tere Kainan.  
 Na e Kainan a pien tson tere Arpaksat.  
 E Arpaksat a pien tson tere Sem.  
 Na e Sem a pien tson tere Noa.  
 E Noa a pien tson tere Lamek.  
 37 Na e Lamek a pien tson tere Metusela.  
 E Metusela a pien tson tere Inok.  
 Na e Inok a pien tson tere Jaret.  
 E Jaret a pien tson tere Mahalalel.  
 Na e Mahalalel a pien tson tere Kenan.  
 38 E Kenan a pien tson tere Enos.  
 Na e Enos a pien tson tere Set.  
 E Set a pien tson tere Adam.  
 Na e Adam a pien tson tere Sunahan.

## 4

### *E Satan e torohani e Iesu (Matiu 4:1-11, Mak 1:12-13)*

1 E Iesu e saputu mei u Namnamei u Göagono tere Sunahan me laba nena i Jodan. Ba u Namnamei tere Sunahan e peigi mena neien tara makum a palaka. 2 E Iesu e kaia tara makum a palaka u tohats u maloto u lan te torohaneien e

Satan. Tara pöata teka e Iesu ema nou ii, ba nonei e bes koruna.

<sup>3</sup> Be Satan e poeiena i tanen, “Tego Pien uu lö tere Sunahan, alö go ranga ba marats teka te palis uana tara beret!”

<sup>4</sup> Be Iesu e ranga palise nen me poeiena, “I koloto has naia turu Buku u Göagono, ‘A beret peisa ema antunan hala nanei a nitöatöa tara katuun.’ ”

<sup>5</sup> Be Satan e la sei menen, ba nonei tara tsi pöata puku noahas teka ba man han hoboto i puta te butuna ba nonei e haröteneien e Iesu. <sup>6</sup> Be Satan e poeiena i tanen, “Alia e hale goui lö a nitagala balö te pan na mou u han hoboto teka, na manka man niga iaharen. A manka hoboto teka i halei lia. Na te ngilin hala nagien lia tara töa katuun, ba lia te tatei hala nagen. <sup>7</sup> Te hatukun moa lö i matar bate hatsunone moulia, ba manka hoboto teka te ka uanou i tamölö!”

<sup>8</sup> Be Iesu e ranga palise nen me poeiena, “I koloto hasiin, ‘Alö go hatsunono uu tere Sunahan. Nonei a Tsunono pan i tamölö, na nonei puku lahas a töa tego hengoei lö.’ ”

<sup>9</sup> Be Satan e lu mena neien i Jerusalem me hatuole nen iasa koru i pungana tara Luman Lotu Pan me poeiena i tanen, “Tego Pien uu lö tere Sunahan, kurapa uu i puta. <sup>10</sup> Taraha? I kolotein: ‘E Sunahan e ranga mera nou u angelo i tanen tegi tara kap haniga menaien lö.

<sup>11</sup> Ba nori te toule riou lö,  
ba lö tema tatei tuhamate nanoui turu hatu.’ ”

<sup>12</sup> Be Iesu e ranga palise nen, “U Buku u Göagono e pei hasena, ‘Alö goma tatei torohane ii e Sunahan. Nonei a Tsunono i tamölö.’ ”

<sup>13</sup> Ba pöata te torohana hakapeia e Satan e Iesu u mamana u mar torohana, ba nonei e laba nena e Iesu me hahalosena a tana pöata.

*E Iesu e hatanieia a toukui i tanen i Galili  
(Matiu 4:12-17, Mak 1:14-15)*

<sup>14</sup> E Iesu e kopis pouts uu tara provins i Galili na nitagala turu Namnamei u Göagono e kaia i tanen. U katuun turu han hoboto ti sukuuku i hengo naien. <sup>15</sup> Ba nonei e hihatutsna tara man luman lotu turu Jiu, ba u katuun hoboto e soloseie ren.

*U katunura i Nasaret i tori tsugani e Iesu  
(Matiu 13:53-58, Mak 6:1-6)*

<sup>16</sup> E Iesu e la uu i Nasaret, a taun te pan ien. Ba turu Lan u Göagono turu Jiu nonei e la uu i luman lotu, te roron markato uaien. Ba nonei e tuol silena tego rit menaien u Buku u Göagono.

<sup>17</sup> Ba nori e halerien u buku tere Aisaia, a propet. Ba nonei e palatena u buku me sabiena a makum temar ranga uana teka,

<sup>18</sup> “U Namnamei tara Tsunono e kana i tar.

Nonei e hopö kap naiou lia

tego hahatei menai lia u Bulungana u Niga turu katuun ti möa ta ka.

Nonei e hala namou lia tegomi habulungana menai lia u mar raranga teka:

U katuun ti kitsir ena purese rariou,

na u katuun u kiou e tatei tara pouts riou.

Nonei e hala namou lia tegomi taguhu merai lia u katuun te tori tiamar.

Taraha? Nori e pita puta rer.

<sup>19</sup> Nonei e hala namou lia tegomi habulungana menai lia

a pöata tego lu pouts merai a Tsunono u katuun i tanen.”

<sup>20</sup> Be Iesu e hakopo poutsena u buku me hala pouts nanen tara katunun taratarakap mena gumuna. Ba u katuun i luman lotu e tara hoboto uaier i tanen. <sup>21</sup> Ba nonei e taniaan rangana i taren me poeiena, “U raranga tere Sunahan te hengoe mula limiou e butu hamana lala i romana!”

<sup>22</sup> Ba nori e ranga haniga naren me asingoto koru ner u raranga u niga te katoeien. Ba nori e poeier, “Nonei a pien tere Josep, tsime?”

<sup>23</sup> Ba nonei e poeiena i taren, “Alia e atei silegu alimiou e katoe mou u rangan haharuei teka i tar, ‘O dokta, alö go kato haniga poutsi a peisamölö.’ Na limiou emar ranga has uamou teka i tar: ‘Alam u hengoin alö u katoe a man mirakol i Kapenium. E hana ba lö tema kato hasemi a man mirakol tara han pouts i tamulö?’ ”

<sup>24</sup> Be Iesu e pei hasena, “Alia e ranga hamana koru gia i tamilimiou, u katuun tara han tara propet ema hanige rien. <sup>25</sup> Hengoiam. I manasa tara pöata tere Ilaitsa a propet, u amoaba i gonoia i Israel, tara pöata te möaia ta langits turu topisa u hiningal na tönomo a tsihou, na bes pan koru e butuia tara mamana han. <sup>26</sup> Kaba e Sunahan ema hala menai e Ilaitsa ta töa turu amoaba ra i Israel. E möa. Nonei ena taguhu lasi a töa amoaba na i Sarepat, tara pal han i Saidon, tara pala tema Jiu ri. <sup>27</sup> Na tara pöata tere Ilaisa, a tana propet has, u toba i gonoia i Israel. Kaba e möa noa has ta töa i taren tegi kato haniga poutsi. E Neaman puku lasi na i Siria, tara pala tema Jiu ri.”

<sup>28</sup> U katuun hoboto ti kaia tara luman lotu i raharaha koru ti hengo menaien u ranga teka.

<sup>29</sup> Ba nori e takei seir me las tsibil ba naria e Iesu tara taun, me lu mena rien ieluna u pokus ti kuieia a taun i taren tegina ba hakurapa menaien turu uarahana. <sup>30</sup> Kaba nonei e lakasa silaia i gusur u katuun me la halhal ba ranen.

*A liliahanei a omi e kaia tara katuun  
(Mak 1:21-28)*

<sup>31</sup> Be Iesu e la uana i Kapenium, a taun i Galili, me hihatuts na turu katuun turu Lan u Göagono turu Jiu. <sup>32</sup> Ba nori e asingoto ner u hihatuts i tanen. Taraha? U raranga i tanen e ka mei a nitagala. <sup>33-34</sup> A töa katuun te ka mei a liliahanei a omi i peisanen e kaia tara luman lotu. Ba nonei e ku hohomi hapan koruna me poeiena, “Pua! O Iesu na i Nasaret, alö banei go haka ba raiou lam! Alö emi katsin kato homi ramou lam! Alia e atei silegu alö a Katuun a Göagono tere Sunahan!”

<sup>35</sup> Be Iesu e ranga mena a liliahanei, “Kakamoto, ba lö te lakasa ba nem a katuun!” Ba liliahanei e lapo ba nena a katuun i puta i mataren hoboto, me lakasa ba nanen, nonei ema kato homi haseien.

<sup>36</sup> Ba u katuun hoboto e asingotor me hiararangar, “U saha u mar raranga teka? Nonei e tatei hala nena u raranga u mal u tagala turu liliahanei u omi, ba nori te hengoe ren bate lakasa ba ner a katuun!” <sup>37</sup> Ba u bulungana te hatein a manka te katoe e Iesu te taala hamanasa uana tara mamana han i rehina i Kapenium.

*E Iesu e kato haniga poutsir a katuun a parpara  
(Matiu 8:14-17, Mak 1:29-34)*

<sup>38</sup> Be Iesu e laba nena a luman lotu me la uana tara han tere Saimon. A halis a tahol tere Saimon e opö mei a peisanen e hiski koru, ba nori e hatei

rien e Iesu. <sup>39</sup> Ba nonei ena tuolna i rehina inana i tanen, me abisena u hiski i peisana a tahol. Ba u hiski e laba nanen, ba nonei tara tsi pöata puku noahas teka ba tahol e takeina me hanou ranen.

<sup>40</sup> I murina te tsirukuia a pitala bu katuun hoboto, a pala i taren ti ka mei a saha mar siki e la mera rimei tere Iesu. Ba nonei e hatakopena a limanen i taren hoboto a man tötöa me kato haniga pouts hoboto ranen. <sup>41</sup> A man liliahanei a man omi i lakasa ba hasir u katuun u parpara, me ku hohomir me poeier tere Iesu, “Alö a Pien Tson tere Sunahan!”

Be Iesu e ranga hatagala mera nen me hapiou nena tegima tatei ranga uaien. Taraha? Nori i atei sil nonei e Mesaia.

*E Iesu e hihatutsia i Judia*  
(Mak 1:35-39)

<sup>42</sup> Tara lunlan be Iesu e laba nena a taun me la uana tara töa makum a ski. Ba u katuun e sake ren, mena sabieren ba nori e torohanan hapiou naren tegoma la lel uaien. <sup>43</sup> Be Iesu e poeiena i taren, “Alia gona hihatuts has naia u Bulungana u Niga tara Nipepeito tere Sunahan tara palair a man taun. Taraha? Nonei a ka te hala sile mei lia e Sunahan tegomi kati lia.” <sup>44</sup> Be Iesu e hihatuts lana tara man luman lotu i Judia.

## 5

*E Iesu e ngör u katunun tsitsilo tutuun*  
(Matiu 4:18-22, Mak 1:16-20)

<sup>1</sup> Tara töa pöata e Iesu e tuol ia i mounsingmou tara Ramun a Perperere i Genesaret. Nonei noa has a pöata ti hiasösongo sileia u katuun tegi hengo menaien u raranga tere Sunahan. <sup>2</sup> Nonei e tari



a huol a tolaala ti hasung ia i kotolana. A man tsonun hagala i laba raien mena galuser a man abe. <sup>3</sup> Be Iesu e osana tara tolaala tere Saimon, me tahule nen ega gamon tupa ba nai a tolaala a mounsingmou. Be Iesu e gumna iahana tolaala me hatuts rena u katuun.

<sup>4</sup> Pöata te ranga hakapaien, be Iesu e poeiena tere Saimon, “Tula menai a tolaala tara makum a ruku, ba limiou te harukue miou u abe bate soohe mou ta iena.”

<sup>5</sup> Be Saimon e ranga palisina, “O Tsunono, alam e hagala halan mula, kaba lam ema soohe mulei ta ka. Kaba turu ranga i tamölö ba lia te hakoule gou u abe.” <sup>6</sup> Ba nori e hakouler u abe me sooher a iena a parpara koru, ba abe e katsin takalana. <sup>7</sup> Ba nori e ku raier a palai i taren tara tana tolaala egi lama batemi taguhu raren. Ba nori e la rima memi ongo hasaputeri a huol a tolaala u iena me katsin rukur. <sup>8</sup> Be Saimon Pita e tarena a manka teka, ba nonei e hatukunna i mouna e Iesu me poeiena, “Alö ego laba naiou lia, o Tsunono! Alia a katuun a omi!” <sup>9</sup> Nonei emar ranga uu teka taranaha, nori i asingoto koruni u iena u parpara koru ti sooheien. <sup>10</sup> Ti markato has uu ere Jemis mere Jon, a galapien tere Sebedi ti kukui gono mei e Saimon. Be Iesu e poeiena tere Saimon, “Ma matout ii. Alö a katuun a sosooho iena. Kaba tara man pöata te la nama, alö e na lu mera mumei u katuun i tar!”

<sup>11</sup> Ba nori e hasung menari a man tolaala i taren i kotolana, me laba ner a mamanaka me kukutier e Iesu.

*E Iesu e kato haniga poutsi a töa katuun a toba  
(Matu 8:1-4, Mak 1:40-45)*

<sup>12</sup> E Iesu e kaia tara töa taun te ka hasia a töa katuun a peisanen hoboto e ka mei a toba. Ba nonei e tarena e Iesu me hatukununa i matanen me singouana i tanen, “O Tsunono, te ngil mia lö, alö e tatei kato haniga poutse moulia.”

<sup>13</sup> Be Iesu e hasoa nena a limanen me sebele nen me poeiena, “Alia e ngiligu. Alö ego niga pouts!” Ba nonei puku has tara pöata teka ba toba e tia ba nena a katuun. <sup>14</sup> Be Iesu e ranga menen, “Ma hahate ii ta katuun a ka teka, kaba lö go la hamatskö uu tara pris ba nonei tena tarena a peisamölö te niga pouts uanen. Ba lö te hale moien a kaan haats te haröto nena a toba e kapa hamana, temar ranga uu e Mosis i manasa. Ba u katuun te tatei atei sile riou a toba i tamölö e kapa koru.”

<sup>15</sup> Kaba u bulungana te hatein a manka te katoe e Iesu e tasata uu i lehana. Ba u katuun u parpara e la sile rima tegimi hengo uaien na tego kato haniga pouts meraien man siki i taren. <sup>16</sup> Kaba tara man palaina man pöata nonei e la pepeisa uu tara makum a ski batena singona tere Sunahan.

*E Iesu e kato haniga poutsi a katuun a matekata  
(Matu 9:1-8, Mak 2:1-12)*

<sup>17</sup> Turu töa u lan e Iesu e hihatutsia turu katuun. U Parasi nu tson hihatuts tara Lo tere Mosis i gum has. Nori i lama turu han hoboto i Galili na i Judia na i la hasma i Jerusalem. Na nitagala tere Sunahan e kaia tere Iesu tego kato haniga pouts meraien u katuun ti ka mei a siki. <sup>18</sup> Ba pal tson e söate rimei a töa katuun a matekata a pöapöa. Nori i torohanan söata menaien iahana luma bate hake rien i matana e Iesu. <sup>19</sup> Kaba a makum e saputu koru tara katuun, na e möa ta makum tegi sila

meien. Ba nori e sei meren ieluna a luma me luba ner a töa makum tara pungana. Ba nori e hakoul gono meri a katuun a pöapöa i gusuna ti gonoia u katuun me hakerien i matana e Iesu. <sup>20</sup> E Iesu e atei sil ti hamana uaien i tanen me poeiena tara katuun a matekata, “A tsomi, alia e luba hakap nagula a markato a omi i tamölö.”

<sup>21</sup> Ba u tson hihatuts tara Lo na u Parasi e tanian hiarangrangatar me poeier, “Te ha uanen ba nonei temar ranga uana teka? Nonei e katsin guleiena a nitsunono tere Sunahan! E möa ta töa tego tatei luban a markato a omi, e Sunahan puku lasi a töa!”

<sup>22</sup> E Iesu e atei sil u hakats i taren me poeiena, “Aha te hula hakats memi limiou? <sup>23</sup> Aha te gi-gahana na ha te tiamana? Alia ego pei, ‘Alia e luba negu a markato a omi i tamölö,’ tsi alia ego pei, ‘Alö ego takei ba lö te lam?’ <sup>24</sup> Alia e haröto ragi limiou, alia tu butun Katunuma e ka megou a nitagala i puta tego luba has menai lia a markato a omi tara katuun.” Be Iesu e ranga mena a katuun a matekata me poeiena, “Alia e ranga megou lö, takei, ba lö te söatem a holholasa i tamölö bate laam i han!”

<sup>25</sup> Ba nonei tara pöata puku has teka ba nonei e takei seinä i matar u katuun hoboto me söatena a holholasa te opöien me soloseiena e Sunahan me lana i han. <sup>26</sup> Ba u katuun hoboto e asingoto korur me matout hakapar. Ba nori e soloseier e Sunahan me poeier, “Ara e tare lila a manka man kapan koru i romana!”

*E Iesu e ngöi e Livai  
(Matu 9:9-13, Mak 2:13-17)*

<sup>27</sup> I murina a ka teka, e Iesu e tari a töa katuun te lului a takis a solonen e Livai e gumia tara luman takis bate kuina. Be Iesu e poeiena i tanen, “Kukute moulia.” <sup>28</sup> Be Livai e takeina me la ba nena a mamanaka me kukutena e Iesu.

<sup>29</sup> Be Livai e katoena a kannou pan tere Iesu i luma i tanen. U katuun u parpara ti lului a takis na palair u katuun i nou gono meraien. A pal kapan turu Jiu i ngö raien u katuun u omi. <sup>30</sup> Ba palair u Parasi na u tson hihatuts tara Lo e tara raren me ranga sil rer u katunun tsitsilo tere Iesu, “Taraha tsiponi ba limiou te nou gono mera miou u katuun te lulueier a takis na palair u katuun u omi?”

<sup>31</sup> Be Iesu e ranga mera nen, “U katuun te möar ta siki ema tatei la uari tere dokta. E möa. U katuun lasi te ka mer a siki te lar. <sup>32</sup> Alia u ma la sile mei tegomi ngö merai u katuun u matskö. E möa. Alia u la silema tegomi ngö merai u katuun u omi bate habirits hamatsköer a toriren.”

*A markato te agono menari a kannou  
(Matu 9:14-17, Mak 2:18-22)*

<sup>33</sup> Ba u katuun e poeier tere Iesu, “U katunun tsitsilo tere Jon e roron agono ner a kannou bate singo uaier tere Sunahan. Na turu Parasi e markato has uaier iesana. Ga taraha tsiponi bu katunun tsitsilo i tamölö te namala agonori?”

<sup>34</sup> Be Iesu e poeiena i taren, “Tara pöata te hi-akökoto gono meria a halis, a tsonun hitöl te kana na pala tara tson ema tatei agonori. E möa. <sup>35</sup> Kaba a pöata e la nama romana ba tsonun hitöl te luba nariou. Ba pala i tanen te agono riou nonei tara pöata.”

*E Iesu e haharuein u hihatutsuna i manasa na u hihatuts u tsimus*

<sup>36</sup> Na e Iesu e ranga has meraien u haharuei teka: “E möa ta katuun tega kiis ban ta makumun labalaba ta tsimus bate tupe neien a tabutu turu labalaba u toutounei. Te markato uanen teka, ba u labalaba u tsimus ti kiisi tema tatei taratara haniga gono menei u labalaba u toutounei. <sup>37</sup> Na e möa ta katuun tega tatei kis naia u uain u tsimus tara pikpiköna meme te toutouneina. Tega markato uen teka, ba nitagala turu uain u tsimus te gololona bate pan susuluna, bate kato butena a kaan osul a toutounei tema antunan talas nei. Ba uain te tatsu uana i puta, ba pikpiköna meme te omi hasina. <sup>38</sup> U uain u tsimus tegi kis naia turu pikpikö u tsimus. <sup>39</sup> Na e möa ta katuun tega ngil a uain a tsimus i murina te ua hakape nen a uain a toutounei. Taraha? Nonei e poeiena, ‘A uain a toutounei te niga balana.’ ”

## 6

*U Hirarina turu Lan u Göagono turu Jiu  
(Matiu 12:1-8, Mak 2:23-28)*

<sup>1</sup> E Iesu e silaia iahana u kuin wit turu Lan u Göagono. Ba u katunun tsitsilo i tanen e patsikeier a bakun wit me musase ren me noue ren. <sup>2</sup> Kaba a palair u Parasi i tara raien me poeier, “Aha tsiponi te kato memi limiou a ka te hapiou nena a Lo i tarara egima katoe ii turu Lan u Göagono?” <sup>3</sup> Be Iesu e ranga palis ranen, “Alimiou ego mala rit hanigeiam a ka te katoe e Devit. Tara töa pöata nonei na u katuun i tanen i möa ta kannou ba nori e besir. <sup>4</sup> Ba nonei e tasuna i luma tere Sunahan me luena u beret u göagono ti hakeia i matana e

Sunahan. E Dedit e noueien me hala has rena u katuun i tanen. A Lo turu lotu i tarara e hapiou nena tegima nou menai a beret teka. U pris peisa te tatei noue ren.”<sup>5</sup> Be Iesu e hakapena u ranga me poeiena, “Alia tu butun Katunuma e tsunono negu u Lan u Göagono.”

*A katuun a limamate  
(Matiu 12:9-14, Mak 3:1-6)*

<sup>6</sup> Turu tana u Lan u Göagono e Iesu e la uu tara töa luman lotu me hihatutsina. A töa katuun a pal matou i lima nen te mate e ka tara pöata teka.<sup>7</sup> A palair u tson hihatuts tara Lo na u Parasi i pepeito kapiin ta ka ta omi tega katoe e Iesu. Ba nori e pepeito kap hatagala koru naren tega kato haniga pouts menaien ta katuun turu Lan u Göagono.<sup>8</sup> Kaba e Iesu e atei sil u hakhakats i taren me poeiena tara katuun a limamate, “Alö ego takei ba lö tena tuol mia i hagus.” Ba katuun e takeina me tuoluna.<sup>9</sup> Be Iesu e poeiena i taren, “Alia e rangata ragou limiou, aha te hatangana nena a Lo i tarara tegi kati ra turu Lan u Göagono? A niniganiga tsi a niomi? Aragi taguhu a katuun bate töatöa poutsuna tsi aragi atung hamateien?”<sup>10</sup> Ba nonei e hula tara uana i taren hoboto me poeiena tara katuun, “Hasoa nema a limamölö!” Ba nonei e hasoa nena a limanen me niga poutsuna.<sup>11</sup> Kaba u Parasi na u tson hihatuts i raharaha koru me hiararanga ner ta ka tegi katoeien tere Iesu.

*E Iesu e hopö kapir a maloto na huol a aposol  
(Matiu 10:1-4, Mak 3:13-19)*

<sup>12</sup> Tara pöata teka e Iesu e la sei uu turu töa u pokus me singo uana tere Sunahan tara töa bong a ohots.<sup>13</sup> Ba tara bongbong ba nonei e ngörena

u katunun tsitsilo i tanen me hopö kap rena a maloto na huol a katuun me ngö raneien u aposol. <sup>14</sup> A soloren ere Saimon (ti ngö hasei e Pita) na e toulana e Saimon e Endru. Na palai has i taren ere Jemis mere Jon na e Pilip ne Batolomio. <sup>15</sup> Na e Matiu ne Tomas, na e Jemis a pien tson tere Alpius ne Saimon na i Silot.\* <sup>16</sup> Na e Judas a pien tson tere Jemis na e Judas Iskariot, a tson tena harötein e Iesu i matar u pakö i tanen.

*E Iesu e hihatuts na e kato haniga pouts hasir u katuun*

*(Matiu 4:23-25)*

<sup>17</sup> Be Iesu e koul gono mere namen turu pokus, ba nonei e tuol gono merena u katunun tsitsilo u parpara i tanen tara töa makum a tataabala. U katuun u parpara koru i ka has, u katuun ti lama tara mamana han iahana provins i Judia na tara taun i Jerusalem, na pala has ti lama i tasi tara taun i Tair na i Saidon. <sup>18</sup> Nori i la silema tegomi hengo uaien tere Iesu na tego kato haniga pouts meraien e Iesu tara man siki i taren. U katuun has ti ka mei u lillahanei u omi i lama me mi kato haniga pouts raier. <sup>19</sup> U katuun hoboto i torohanan hasebeleia i tanen. Taraha? A nitagala e butuma i tanen me kato haniga pouts ranen hoboto.

*A nisasaala na nitaatagi*

*(Matiu 5:1-12)*

<sup>20</sup> E Iesu e tara uu turu katunun tsitsilo i tanen me poeiena,

---

\* **6:15:** E Saimon ema solo uanei tanen e Selot, e Selot e mouna uana teka: a katununa tara töa hun katuun ti ngil a han i Israel ega tarakap pepeisein a peisanen.

“Sasaalaiam, alimiou ti möa ta ka.  
Taraha? A Nipepeito tere Sunahan e ka uana  
i tamilimiou!

21 Sasaalaiam, alimiou te bes miou i romana.

Alimiou e hamasul rariou!

Sasaalaiam, alimiou te tabe miou.

Alimiou e golgol mou!

22 Sasaalaiam tara pöata te omi raria limiou,

na te tori hasoala raria limiou,

na te ranga homi raria limiou,

na te tsuga raria limiou,

te hamana uami limiou i tar, alia tu butun  
Katunuma.”

23 “Sasaalaiam tara pöata te butuna romana  
a manka teka, bate sani memiou a nisasaala!  
Taraha? U hamatana pan e haka bera rilimiou  
i Kolö. U tuburen i markato homi has merai u  
propet u niga teka.

24 Kaba a nomi pan e ka uanou i tamilimiou u  
katuun te ka mer a moni a parpara i ro-  
mana.

Alimiou u lu hakapeiam a pöatan sasaala i  
tamilimiou.

25 A nomi e ka uanou i tamilimiou te masul miou.

Alimiou e na bes mou!

A nomi e ka uanou i tamilimiou te golgol miou.

Alimiou e ton mou bate tabe miou.

26 A nomi e ka uanou i tamilimiou u katuun te  
saala rer u katuun hoboto.

Taraha? U tuburen i mar ranga has uu iesana  
turu propet u gamogamo.”

*Ngil raiam u pakö*

*(Matiu 5:38-48, Matiu 7:12)*

27 “Kaba lia e ranga mera goulimiou eresi te  
hengoe riou lia, ngil raiam u pakö i tamilimiou.



Kato haniga mia turu katuun te omi rariou limiou. <sup>28</sup> Kalala raiam u katuun te ranga homi ria i tamilimiou, ba limiou te singo sil ramiou u katuun te kato homi ria i tamilimiou. <sup>29</sup> Tega tapaleia ta töa ta katuun a abuabu mölö, hatapala hasiin a hapala. Tega lueia ta töa u hasobö pan i tamölö, hala hasei u hasobö u tetenei i tamölö. <sup>30</sup> U katuun hoboto te rangata ner ta ka i tamölö, halari. Na tara pöata te lue ria a manka i tamölö, ma rangata nai tego lu pouts menaien lö. <sup>31</sup> Kato merai a palai temar ngil has uamölö tegi markato uaien i tamölö.

<sup>32</sup> “Te ngil puku ramia lö u katuun te ngile rioulö, gaha tegi kalala silei lö? U katuun u omi e ngil has raier u katuun te ngil raren. <sup>33</sup> Na tego kato haniga peisa uu lö turu katuun te kato haniga ria i tamölö, gaha tsiponi tegi kalala silei lö? Te markato has uaier u katuun u omi. <sup>34</sup> Na te hala peisa ramia lö u katuun te pei mia lö nori e tatei hala pouts ner a manka, gaha tegi kalala silei lö? U katuun u omi e hala has raier u katuun u omi, kaba nori e ngilin lu pouts nariou a man haroho hoboto i murimuri. <sup>35</sup> Kaba limiou go ngil raiam u pakö i tamilimiou bate kato haniga ramen. Alimiou go hala pukpukuia, kaba ma hakats nami tego lu pouts menami ta ka. Ba limiou te lue miou romana u hamatana pan, bate haröto has namiou alimiou a galapien tere Sunahan Iasa Koru. Taraha? Nonei e niga has na turu katuun u omi tena mala haniga uari tere Sunahan. <sup>36</sup> Alimiou ego taatagi raiam u katuun, temar taatagi has mera nei limiou e Tamamilimiou e Sunahan.”

*E möa tego ona mena milimiou a tana katuun  
(Matiu 7:1-5)*

<sup>37</sup> Be Iesu e rangana me poeiena, “Ma ona rami a palai, ba limiou tema ona has raroui. Ma kato sil rami a palai gi hahuner, ba limiou tema hahuna has raroui. Alimiou ego nolo pouts raiam u katuun ti kato homia i tamilimiou, ba limiou te nolo pouts has rariou. <sup>38</sup> Hala naiam a hitaguhu turu katuun ba palai te kato has uariou iesana i tamilimiou. Ba u katuun te hala haniga raroui limiou a skel i tamilimiou antunana te saputu nen bate pururukuna. A mar skel te roron hala rami limiou u katuun, tara mar skel teka te hala hapopo pouts has naria romana i tamilimiou.”

<sup>39</sup> Be Iesu e hatei raneien u haharuei teka. “A katuun a matakiou ema tatei peige nei a taina katuun a matakiou. Tegi markato tala uaien teka, ba nori hoboto tena tsia roa tara holö. <sup>40</sup> A katuun tsitsilo ema tatei pan nanei a tson hihatuts i tanen. Kaba tara pöata te hakape ria u katuun u skul i taren, ba nori hoboto te töan here rari u tson hihatuts i taren. <sup>41</sup> Taraha ba lö te tarem a tsi köahu i matana e toulamölö, ba lö tema taremi a makumun ruei i matamölö pouts? <sup>42</sup> Aha te pei mölö tere toulamölö, ‘Alia ego luban a tsi köahu i matamölö’ ba lö tema taremi a makumun ruei i matamölö pouts? Alö a gamogamo! Luba mam bin a makumun ruei te kana i matamölö, ba lö te tara haniga mou bate töan luba nem a tsi köahu i matana e toulamölö.”

*U ruei na hua i tanen  
(Matiu 7:16-20, Matiu 12:33-35)*

<sup>43</sup> Be Iesu e poeiena, “U ruei u niga ema tatei ka menei a hua a omi, na u ruei u omi ema ka

has menei a hua a niga. <sup>44</sup> U mamana u ruei e atei silanaria tara hua i taren. Alimiou ema tatei lue mia ta kutu tara pata, na limiou ema tatei lu hase mia ta huan lahou turu korkoru. <sup>45</sup> A katuun a niga te ka mena u hakats u niga i torinen e habutena a markato na man raranga a man niga. Na katuun a omi te kamena u hakats u omi i torinen e habutena a markato na man raranga te omina. Taraha? A runguna a katuun te roron ranga nena a manka te saputena a torinen.”

*A huol a tsonun kukui luma  
(Matiu 7:24-27)*

<sup>46</sup> Be Iesu e poei hasena, “Taraha ba limiou te ngöe milia ‘O Tsunono, Tsunono,’ batema katoemi a manka ti hatei rai limiou? <sup>47</sup> A katuun te la uanama i tar bate hengoena u raranga i tar bate kukutie nen, alia e haröto ragoui limiou ime te markato uanen. <sup>48</sup> Nonei e here nei a katuun te kaho uu iogana me hopöeiena u simen turu lapo me kuiena a luma ieluna u simen. Ba u uolo pan e la nama me mi torohanan söatena a luma. Kaba ema gaseien. Taraha? A luma i kui hanigei. <sup>49</sup> Kaba a katuun te hengoena u raranga i tar batema kukutie neien e here nei a katuun te kuiena a luma turu tsiktsiki puku batema haka mamme nei tu simen. Ba pöata te la nama u uolo pan, batemi söatena a luma ba luma te tarura hakapa nitöana.”

## 7

*E Iesu e kato haniga poutsi a tsonun kui  
(Matiu 8:5-13)*

<sup>1</sup> Pöata te ranga hakapa naia e Iesu a manka teka turu katuun, ba nonei e la uana tara taun i Kapenium. <sup>2</sup> A töa katuun pan turu soldia e kaia i Kapenium. Nonei e ka mei a tsonun kui te ngil bala korueien. A tsonun kui i tanen e ka mei a siki pan me katsin matena. <sup>3</sup> Ba pöata te hengo naia a katuun pan teka e Iesu, ba nonei e tahul rena a palair u katuun pan turu Jiu e gina rangateien tega lä uamen batemi kato haniga poutsena a tsonun kui i tanen. <sup>4</sup> Ba nori e la uaruma tere Iesu memi rangata hataatagi ria i tanen, “Nonei a katuun a niga, alö go taguheien. <sup>5</sup> Taraha? Nonei e ngil koru rena u katuun i tarara na han i tarara na nonei e kui hasi a luman lotu i tamulam.” <sup>6</sup> Be Iesu e la gono mera nen. Pöata te susukuien tara luma ba katuun pan turu soldia e tula rena u hahikapien i tanen e gina hateien, “A tsi tsunono, alö goma la sokö uamei i luma i tar. Alia ema katuun a niga korugi ba lö te la uamuma iahana luma i tar. E möa. <sup>7</sup> Na lia ema niga hantuegi tego la uu lia i tamölö. Alö ego hala tuun nema u raranga ba tsonun kui i tar te niga pouts nou. <sup>8</sup> Alia has e ka gia i kopina a nitagala turu katuun pan i tar, na lia e ka has megu u soldia te ka puta ria i tar. Alia ego ranga mei a töa bate poeiegu, ‘La’ ba nonei te lana. Na lia ego ranga mei a tai, ‘Lama’ ba nonei te la nama. Na lia ego ranga mei a tsonun kui i tar, ‘Kato a ka teka’ ba nonei te katoe nen.” <sup>9</sup> Be Iesu e asingoto korunena te hengo menaien a man ranga teka. Ba nonei e habirits kopisina me poeiena turu katuun u para ti kukuteien, “Alia e hatei ragou limiou, alia u mamala sabe ii ta töa ta toun Israel tega ka mei u mar nihamana pan te kamena a tson teka.” <sup>10</sup> Ba u tson hibus e la pouts uaier tara luma

tara katuun pan turu soldia ba nori e na sabeier te niga pouts uu a tsonun kui i tanen.

*E Iesu e hatakei poutsi a pien tson tara amoaba*

<sup>11</sup> E ma lehanai be Iesu e la uana tara töa taun a solonen i Nain. U katunun tsitsilo i tanen na katuun a para koru i la gono meien. <sup>12</sup> Tara pöata ti susukuien tara tamana tara taun, ba töa tson a mate te söata halakase rima tegina ngaho menaien. Nonei a töa puku a pien tson tara amoaba. U katuun u parpara koru tara taun i la gono mei nonei a amoaba. <sup>13</sup> Na tara pöata te tareia a Tsunono a tahol teka, ba nonei e taatagi koru nanen me poeiena i tanen, “Möa tu tabe.” <sup>14</sup> Be Iesu ena sebeleiena a bokisin mate, ba u katuun ti söateien e tuol hakakamotor. Ba nonei e poeiena, “Tson a hitots, alia e poeiegu i tamölö, takei!” <sup>15</sup> Ba tson te mate e takeina me tanian rangana. Be Iesu e hala poutse neien e tsinanen. <sup>16</sup> U katuun hoboto i matout koru, me solo seier a solona e Sunahan me poeier, “A propet te kamena a solo pan e butu hakapaia i gusurara! E Sunahan e la silema e gomi taguhir u katuun i tanen!” <sup>17</sup> Ba u raranga te hatein e Iesu e la hobotona tara provins i Judia na tara man han i sukuuku.

*E Jon a Tsonun Baptais e hala mera mei u katuun tere Iesu*

*(Matiu 11:2-19)*

<sup>18-19</sup> Ba u katunun tsitsilo tere Jon e hateie rien a manka teka. Be Jon e ngö rena a huol a aposol i tanen me tula mera neien tara Tsunono tegina rangata menaien, “Alö e Mesaia tego lama, tsi alam ego hahalosi ta tabi?” <sup>20-21</sup> Tara pöata teka e Iesu e kato haniga poutsir u katuun u para ti

ka mei a mamana mar siki na man liliahanei a man omi. Na nonei e kato hatara pouts hasir a man matakiou a man para. Pöata ti butuma u katunun tsitsilo tere Jon ba nori e poeier tere Iesu, “E Jon a Tsonun Baptais e tula rena moulam e gomi rangata, ‘Alö e Mesaia tego lama, tsi alam go hahalosi ta tabi?’ ” <sup>22</sup> Be Iesu e ranga palis ranen me poeiena, “La poutsiam batena hateie mi e Jon a manka te tare mula limiou na te hengoe mula limiou: u matakiou e tara haniga poutsur, na u mou omi e tataala haniga poutsur, nu toba e gogoso poutsur, na u talinga tupu e hengo poutsur, nu katuun ti mate e hatakei pouts rer bate töatöar, na u Bulungana u Niga e hatei naria turu katuun ti möa ta ka. <sup>23</sup> A katuun tema hapolase nei te hamana uanen i tar e sasaala nou!”

<sup>24</sup> Tara pöata ti la hakapaia u tson hibus tere Jon, be Iesu e ranga hatei mera nei u katuun e Jon me poeiena, “Tara pöata tu la uaiam limiou tara makum a palaka tegona tara menami e Jon, alimiou u hakats naiam nonei a saha mar katuun? E here nei u nga te hula bahunena a lomolomo bate haharuei nena a katuun te hula hakatsina? E möa. <sup>25</sup> Tsi alimiou u la sileiam tegona tara menami a katuun te hasogo haniga koruna? Kaba a mar katuun teka e kana tara luma pan a tsmala koru. E ma tatei ka neia tara makum a palaka! <sup>26</sup> Tsi alimiou u la sileiam tegona tara menami a propet? Aa, e Jon a propet hamana. Na nonei a katuun te pan bala nena u propet hoboto. <sup>27</sup> Taraha? U Buku u Göagono e ranga hatei nanen:

‘Hengo! Alia e hala negou romana a tson hibus i tar tego mam naiou lö,

bate hamatsköena romana a maroro i tamölö.  
<sup>28</sup> “Na lia e ranga mera goulimiou, e Jon e pan bala rena u katuun hoboto ti posa raia i puta. Kaba a katuun papala koru tara Nipepeito tere Sunahan te pan bala has nena e Jon.” <sup>29</sup> (Pöata ti hengoeia u katuun hoboto na u tson lulu takis u raranga tere Iesu, ba nori e poeier a maroro tere Sunahan e matskö mei ti habaptais uaien tere Jon. <sup>30</sup> Kaba u Parasi na u tson hihatuts tara Lo i rama koruni u ngil tere Sunahan tima habaptais uaien tere Jon.) <sup>31</sup> Be Iesu e poeiena, “Alia ego pei alimiou u katunura i romana e heremi aha? A saha ka te tatei haharuei ranou limiou? <sup>32</sup> Alimiou e here rami a galapien te hirata ria tara makumun töana, ba palai i taren te poeier, ‘Alam e katoe mula u kömana tara hitöl, kaba limiou ema sani mulei! Na lam e hahuri has mula, kaba limiou ema tabe mulei!’ <sup>33</sup> E Jon a Tsonun Baptais e roron agonein a kannou na ema ua hase ii ta uain. Ba limiou e pei miou, ‘Nonei a popolöana!’ <sup>34</sup> Na lia tu butun Katunuma e tatei nouegu a mamana kannou na e tatei ua hasegu uain. Ba limiou e pei miou, ‘Pua! Nonei a katuun a nonou pala na uaua pala! Na nonei e kapiena has rena u tson lulu takis na u palair u katuun u omi!’ Alimiou emar ranga uamiou teka. <sup>35</sup> Kaba u katuun hoboto te kukutier u hihatuts u niga tere Sunahan e haröto ner te mana uanen.”

### *E Iesu e kaia i luma tere Saimon a Parasi*

<sup>36</sup> A töa katuun turu Parasi a solonen e Saimon e ngöi e Iesu e gana nou gono meien. Be Iesu e la uana i luma i tanen mena gumuna tega nouaien.  
<sup>37</sup> Tara taun teka a töa tahol a omi e kaia i tanen. Nonei e hengoen te nou uu e Iesu tara luma tere

Saimon, ba nonei e la menama a töa botolo turu uapi u soksoka. <sup>38</sup> Ba nonei ena tuolna i rehina e Iesu i pal mounen ba nonei e tabena me hapuluse nei a man mouna e Iesu u sulunmata i tanen. Ba nonei e hapalake nei a man mounen a hulunen, me mutsie nen\*, me tsue nei a man mounen u uapi u soksoka. <sup>39</sup> Pöata te tareia e Saimon a ka te kati a tahol, ba nonei emar hakats tuun uana teka, “Sanena tega propet hamanaia a tson teka, ba nonei te tatei atei silena a saha mar tahol te sebele nen, nonei a tahol a omi!” <sup>40</sup> Be Iesu e poeiena tara Parasi, “O Saimon, alia e ka megu a tsi raranga te katsin ranga megi lia alö.” Be Saimon e poeiena, “Hateie moulia, Tson Hihatuts.” <sup>41</sup> Be Iesu e poeiena, “A huol a katuun i harohein a moni tara katuun te roron halan a monin haroho. A töa e harohein a 500 denarius. Na tai e harohein a 50 denarius. <sup>42</sup> Ba i murinen nori hoboto ima antunan palis poutsei a moni, ba katunun halhala moni e hakapena a haroho tara huol. Gesi te ngil bale nou a katunun halhala moni?” <sup>43</sup> Be Saimon e poeiena, “Toum a katuun te ka mei a haroho pan.” Be Iesu e poeiena, “U ranga i tamölö e matsköna.”

<sup>44</sup> Be Iesu e habirits uana tara tahol me poeiena tere Saimon, “Alö go röto tara tahol teka. Alia e tasu guma i luma i tamölö, kaba lö ema halei mulei lia tu ramun tego galuse ii lia a mour. Kaba nonei e toböe lalei a man mour u sulunmata i tanen me hapalake neien a hulunen. <sup>45</sup> Alö ema mutsie mulei a abuabur. Kaba a tahol teka ema hapolasan mutsie lalei a man mour e antuna noana te tuku gula lia. <sup>46</sup> Alö ema hakei mulei tu uapi i bakur. Kaba

---

\* **7:38:** Nonei e mutsi u huol u mou tere Iesu.



nonei e kise lalei a mour u uapi u soksoka. <sup>47</sup> Alia e hatei goulö, u pannen u ngil te hatara nanen e hatei nena a markato a omi a parpara i tanen e luba hakapa nalila. Kaba a katuun ti luba nai a markato a omi a tetenei ema ngil bala korue nei e Sunahan.” <sup>48</sup> Be Iesu e poeiena tara tahol, “A markato a omi i tamölö e luba hakapa nalila!” <sup>49</sup> Ba pala ti nou gono meien e hiararangar me poeier, “Esi banei nonei teka? Nonei e luba has nena a markato a omi?” <sup>50</sup> Be Iesu e poeiena tara tahol, “U nihamana i tamölö e lu poutse lalou lö! La tala, a torimölö e tatei tagolala poutsuna.”

## 8

### *A touhaliou ti lala gono mei e Iesu*

<sup>1-2</sup> Tara tana pöata be Iesu e hula lauana tara man taun na man han, me hatei la nena u Bulungana u Niga tara Nipepeito tere Sunahan. A maloto na huol a katunun tsitsilo i la gono meien, na palair a touhaliou has ti tsuga barai a man liliahanei a man omi na man siki has. Nori a man touhaliou teka: e Maria Matalina, ti tsuga banai a tohit a liliahanei a omi. <sup>3</sup> Na e Joana, a tahol tere Kusa a töa tson pepeito tere Herot. Na e Susana, na palair a touhaliou has u parpara ti taguhi e Iesu na u katunun tsitsilo i tanen bate hala rarien a manka ti ngileien.

### *U haharuei tara katuun te tsihasein a man ngal (Matiu 13:1-9, Mak 4:1-9)*

<sup>4-5</sup> U katuun i la noa hasima tara mamana taun, na tara pöata ti gonoia u katuun tere Iesu, ba nonei e hatei raneien u haharuei teka: “A töa katuun ena tsihasein a man ngalina kannou. Ba pöata

te tsihasaien, a palai i pururukuia tara maroro ti tötö raien, ba u apena emi nou raren. <sup>6</sup> Na palai i pururukuia turu tsiktsiki te ka mei u lapo, ba pöata ti pusukuien ba nori e langor. Taraha? E möa tu ramun. <sup>7</sup> Na palair u ngal i pururukuia turu tsiktsiki te ka mei a kolits a hihitoka, ba u kolits e pusuku hapan gono mera nen me kato homi raier a man kaan leba teka. <sup>8</sup> Na palair u ngal i pururukuia turu tsiktsiki u niga. Ba nori e pusuku hapanir me hua korur.” Be Iesu e ranga hapanina me poeiena, “A katuun te ka mena u talinga te atein hengona ega hengo!”

*Aha te haharuei sil e Iesu?  
(Matiu 13:10-17, Mak 4:10-12)*

<sup>9</sup> Ba u katunun tsitsilo tere Iesu e rangate rien a mouna u haharuei teka. <sup>10</sup> Be Iesu e ranga palisina, “E Sunahan e haröto ranei limiou a manka ti hamousi tara Nipepeito i tanen. Kaba palai e hengo tuner u haharuei.

Taraha? Nori e tarar kaba ema tara mareieri,  
na nori e hahengor kaba ema ateiri.”

*E Iesu e ranga hatararein u haharuei tara man ngal*

*(Matiu 13:18-23, Mak 4:13-20)*

<sup>11</sup> Be Iesu e poeiena, “A mouna u haharuei e markato uana teka: a ngal e here nei u raranga tere Sunahan. <sup>12</sup> A man ngal ti pururukuia tara maroro e herenei a pala te hengoer u raranga tere Sunahan, kaba e Satan emi luba nena u raranga te kana i toriren. Taraha? Nonei e rama nena tegi hamana uaien be Sunahan te lu pouts ranen. <sup>13</sup> Na man ngal ti pururukuia turu tsiktsiki te ka mena

u lapo e hatei nena a pala te hengoer u raranga bate sasaala koru meren. Kaba u raranga ema la koru uanei turu hakhakats i taren. Bate hamana meier a tsitabubun pöata, ba pöata te butuna u hiamus, ba nori te kurapa hobotor. <sup>14</sup> Na man ngal ti pururukuia tara makum te kamena a kolits a hihitoka e hatei nena a pala te henger, kaba nori e ka mer u hakhakats pan tara nitöatöa na i puta, bate hakats koru ner a moni na man nisasaala na i puta. Na manka teka e pil kap nena u raranga tere Sunahan batema habute nei ta markato ta niga turu katuun teka. <sup>15</sup> Ba man ngal ti pururukuia turu tsiktsiki u niga e hatei nena a pala te hengoer u ranga bate hake rien turu hakhakats u niga i toriren, ba nori te pile kap hakarapoto naren. Ba u raranga te kato hanigeiena a markato turu katuun teka.”

*U haharueina turu ualesala  
(Mak 4:21-25)*

<sup>16</sup> Be Iesu e poeiena, “A katuun te hakulu-pena u lam ema kopo kap naneien a tabeli na ema hake neien i kopina a inana. E möa, e ron hake nen tara makumun gumgum turu lam iasa ba u katuun te tatei tarer u ualesala tara pöata te tasu rien. <sup>17</sup> Na e markato has uana iesana, a mamanaka hoboto te mousuna i romana e habuteriou. Na mamanaka tema atei sileri u katunura i romana, nori e atei sile roien i murimuri. <sup>18</sup> Alimiou ego tara kap haniga naiam temar hengo uami limiou. Taraha? A katuun te ka mena niatei, e Sunahan e hala lele noien romana ta niatei. Kaba a katuun te raman ateina, e Sunahan e luba nanou a tsitabubun niatei te pei nen ega ka meien.”

*E tsinana e Iesu na u toulanen  
(Matiu 12:46-50, Mak 3:31-35)*

<sup>19</sup> E tsinana e Iesu na u toulanen i la uama i tanen, kaba nori ima antunan la hasukusuku uai i tanen. Taraha? A katuun e gono. <sup>20</sup> Ba töa katuun e poeiena tere Iesu, “E tsinamölö na u toulamölö e tuol ria ielesala, nori e ngilin tare rioulö.” <sup>21</sup> Be Iesu e poeiena i taren hoboto, “E tsinar na u toular nori u katuun te hengoer u raranga tere Sunahan bate kukutie ren.”

*E Iesu e haselohi a lomolomo pan  
(Matiu 8:23-27, Mak 4:35-41)*

<sup>22</sup> Turu töa u lan e Iesu e osa gono mer u katunun tsitsilo i tanen tara töa tolaala tara Ramun i Galili, ba nonei e poeiena i taren, “Aragi aroho uu i hapalana a ramun.” <sup>23</sup> Ba nori e la talar, be Iesu e sohona. Ba u ualupu pan e butuna tara ramun ba u ramun e posa hongo beiena a tolaala me katsin kato harukue nen. <sup>24</sup> Ba nori e guleier e Iesu me poeier, “Tsunono, Tsunono! Ara e katsin ruku talara!” Ba nonei e takeina me abis hatagaleiena a lomolomo nu ramun te posa here mei u tasi pan. Ba lomolomo e la puta poutsuna ba seloho pan e butuna. <sup>25</sup> Ba nonei e poeiena turu katunun tsitsilo i tanen, “I me te kana u nihamana i tamilimiu?” Ba nori e asingoto korur me matoutur, me hiarangrangatar, “A saha koru a mar katuun teka? Te hala nena u raranga tara lomolomo nu ramun te posa koruna ba ka te selohona!”

*E Iesu e tsuga bani a lillahanei a omi tara katuun  
(Matiu 8:28-34, Mak 5:1-20)*

<sup>26</sup> Ba nori e lar mena sung ria tara makum ti kaia a hun katuun ti ngörai u Gerasin. A han teka e kana

i hapalana a Ramun i Galili. <sup>27</sup> Be Iesu e koul na tara tolaala ba nonei e sunguna me tareiena a tōa katuun tara han teka, u liliahanei u omi i kaia i tanen. Nonei ema pousei tu labalaba tara pōata lehana, na ema ka hasia ta tōa ta luma. E ka lasia i kahokaho tara man kioun mate. <sup>28</sup> Pōata te tareien e Iesu, ba nonei e ku hapanina me tuhatukun nena i matana e Iesu. Ba nonei e ku hohomi koruna me poeiena, “O Iesu a Pien Tson tere Sunahan Iasa Koru! Aha te ngil memi lö alia? Alia e singo hataatagi gia i tamölö, ma hahunei lia!” <sup>29</sup> Nonei e markato uu teka, taraha, e Iesu e ranga hakapa mei a liliahanei a omi ega lakasa ban a katuun teka. (Tara pōata teka a parpara a liliahanei a omi e pile kapiin a katuun teka. U katuun i taratara kap nitōa naien me kitseri a limanen na mounen a tsien. Kaba nonei e roron kato kotskotsi a tsien, na liliahanei e roron hapiata menaien tara makum a ski.) <sup>30</sup> Be Iesu e rangate nen, “Esi a solomölö?” Ba nonei e ranga palisina me poeiena, “A solor e Ami!” Taraha? Nonei e kamei a liliahanei a omi a para koru ti kaia i tanen. <sup>31</sup> Ba u liliahanei e singo hatagala koru uaier tere Iesu me poeier, “Alö go ma hala merai lam tara kiou te möa ta nönöanen!” <sup>32</sup> A tōa heis poum pan i nouia i sukuuku i rehina u pokus. Ba u liliahanei e singo ria tere Iesu me poeier, “Alö go hala merai lam tara heis poum!” Be Iesu e hanigana. <sup>33</sup> Ba nori e koul ba ner a katuun teka me na sei ria turu poum. Ba heis poum e hiapiata gala hoboto sila ria turu uarahana. Ba nori e na rus ria i ramun me ruku hakapar.

<sup>34</sup> Ba u katunun taratara kap turu poum e tarer a ka teka me bus kukuter, me na polaseria u

raranga tara taun na turu han. <sup>35</sup> Ba u katuun e mi tarer a ka te butu. Ba nori e la uarima tere Iesu me tarer a katuun ti lakasa ban u liliahanei u omi. Nonei e gum ia i puta i rehina e Iesu bate haseiena u hasobö, ba u hakats i tanen e niga poutsuna. Ba nori e matoutur. <sup>36</sup> Ba u katuun ti tara a ka teka e hatei rer a palai temar niga pouts uu a katuun a popolöana. <sup>37</sup> Ba u katuun hoboto tara han turu Gerasin e tahuler e Iesu ega la pouts i han i tanen. Taraha? Nori i matout koru. Be Iesu e osa poutsina tara tolaala, tega la pouts uaaien. <sup>38-39</sup> Ba katuun ti lakasa ban u liliahanei u omi e poeiena tere Iesu, “Alia e go la gono meiou lö.” Kaba e Iesu e hala poutseien me poeiena, “Alö go la pouts i han i tamölö ba lö tena rarariem a ka te kato bela lei lö e Sunahan.” Ba katuun teka e la uana tara mamana makum iahana taun me habulungana la nena a ka te kato beien e Iesu.

*A pien tahol tere Jairas, na tahol te sebeleia turu hasobö tere Iesu*

*(Matiu 9:18-26, Mak 5:21-43)*

<sup>40</sup> Pöata te tuku poutsia e Iesu i hapalana a ramun, bu katuun e sasaala mer te la pouts uamen. Taraha? Nori hoboto i hahaloseien. <sup>41</sup> Ba töa tson pepeito tara luman lotu, a solonen e Jairas, e tuhatukun nena i matana e Iesu me singo hataatagi silena tega la uu e Iesu i luma i tanen. <sup>42</sup> Taraha? Nonei e ka mei a töa koru a pien tahol te ka mei u maloto na u huol u hiningal i tanen e katsin mate.

Be Iesu e lana ba u katuun e hiapaspasasa sile ren. <sup>43</sup> Na töa tahol e kaia i gusuren te posa nitöan u rahatsing e antunaia turu maloto na u huol u hiningal. Nonei e hala hakapein u moni i tanen

turu dokta, na e möa ta töa tega antunan kato haniga poutseien. <sup>44</sup> Ba nonei a tahol teka e la hasukusuku uana i murina e Iesu me hasebelena i runguna u hasobö tere Iesu, ba u rahatsing i tanen e kapa soköna. <sup>45</sup> Be Iesu e rangatana, “Esi te sebele lala i tar?” Ba u katuun hoboto e holisir, be Pita e poeiena, “Tsunono, u katuun e tuol hahise rioulö bate hiasösongor!” <sup>46</sup> Kaba e Iesu e pei, “A töa katuun e hasebele lala i tar. Alia e hasagohe gula a tsi nitagala e lakasa lala i tar!” <sup>47</sup> Ba tahol e atei sil hamanasena te mous ba menaien e Iesu, ba nonei e toltololo mena a nimatout. Ba nonei ena tuhatukun nena i matana e Iesu. Na i matar u katuun hoboto, nonei e hatei e Iesu a mouna a ka te hasebele sileien i tanen, na e hatei hasin ime temar niga boroboro pouts uaien. <sup>48</sup> Be Iesu e poeiena i tanen, “A tsi tahol, a nihamana i tamölö e kato haniga poutse lalou lö. La tala, na torimölö e tatei tagolala poutsuna.”

<sup>49</sup> Pöata te ranga noaia e Iesu, ba töa katununa tara luma tere Jairas e la nama me mi hateie nen, “A pien tahol i tamölö e mate hakapa lala. Alö goma hakui lelei a Tson Hihatuts.” <sup>50</sup> Pöata te hengoia e Iesu, ba nonei e poeiena tere Jairas, “Ma matouti. Hamana tuun lasi, ba nonei te niga pouts nou.” <sup>51</sup> Be Iesu e na tukuna tara luma ba nonei e hapiou rena u katuun tegi tasu gono menaien i luma, e Pita lasi mere Jemis ne Jon na e tamana pien ne tsinanen. Nori puku ti tasu gono mei e Iesu. <sup>52</sup> Na u katuun hoboto i tabe na i hahuri sil a pien teka. Be Iesu e poeiena i taren, “Alimiou goma tabe mi. A pien ema mate nei, e soho tununa.” <sup>53</sup> Ba nori e gol hahamana

naren. Taraha? Nori i atei sil te mate hakapa uu a pien. <sup>54</sup> Kaba e Iesu e lui a limana a pien me ranga hapanina me poeiena, “A tsi pien, alö go takei!” <sup>55</sup> Ba u namnamei tara pien e la pouts uanama i tanen, ba nonei e takei soköna. Be Iesu e ranga mera nen me poeiena, “Halemi ta ka ga noueien.” <sup>56</sup> E tamana a pien ne tsinanen i asingoto koru. Kaba e Iesu e ranga hatagala meraien me poeiena, “Ma hahateiemi ta töa ta katuun a ka te butu lala teka.”

## 9

*E Iesu e halan a toukui tara maloto na huol a aposol i tanen*

*(Matiu 10:5-15, Mak 6:7-13)*

<sup>1</sup> E Iesu e ngö gögoneir a maloto na huol a aposol i tanen me hala raneien a nitagala pan tegi tatei tsuga ba meraien u liliahanei u omi hoboto na tegi kato haniga pouts has merai u katuun ti ka mei a man siki. <sup>2</sup> Ba nonei e hala mera neien tegina hihatutsla menaien a Nipepeito tere Sunahan na tegina kato haniga pouts meraien u katuun. <sup>3</sup> Ba nonei e poeiena i taren, “Möa tu söateiam ta ka te la uamilimiou, e möa tu tukana na ta pora, na ta kannou na ta moni, na e möa has tu hahuoluna tu hasobö. <sup>4</sup> Tena haniga roa ta hun katuun i tamilimiou, ba limiou te sösoho moa tara töa luma, e antunana te laba namoua limiou a taun teka. <sup>5</sup> Tema haniga raria limiou u katuun, tohu ba naiam u köahu i pitpitana a moumilimiou bate laba namiou a taun i taren. A markato teka e haröto ranoien a niomi e butu noua i taren.” <sup>6</sup> Ba u aposol e taker me la sila ria iahana man han, me



hihatuts laner u Bulungana u Niga me kato haniga pouts raier u katuun tara mamana han.

*A nitutu tere Herot  
(Matiu 14:1-12, Mak 6:14-29)*

<sup>7</sup> E Herot a Kingina i Galili e hengoein a manaka te katoe e Iesu ba nonei e hatutue na aha koru te butu. Taraha? U katuun i pei, “E Jon a Tsonun Baptais e takei poutsia tara tou mate i tanen!” <sup>8</sup> Ba palai te poeier, “E Ilaitsa e butu pouts,” na palai i pei, “A tana propetina i manasa e tōatōa pouts.” <sup>9</sup> Be Herot e poeiena, “Alia u hangats pagotein e Jon! Gesi nonei a katuun te roron hengo negu lia?” Ba nonei e ngilin tara koru nena e Iesu.

*E Iesu e hanour u 5,000 tara katuun  
(Matiu 14:13-21, Mak 6:30-44, Jon 6:1-14)*

<sup>10</sup> Ba u aposol e kopis pouts rima tara nilala i taren memi hateieri e Iesu a mamananaka ti katoe men. Ba nonei e lu ranen me peigi pepeisa meraneien tara taun ti ngöe ii Betsaida. <sup>11</sup> Pöata ti hengo naia u katuun te kaia e Iesu ba nori e kukutie ren. Ba nonei e haniga ranen me ranga mera neien a Nipepeito tere Sunahan, me kato haniga pouts rena a pala ti siki. <sup>12</sup> Pöata te tsirukuia a pitala, ba maloto na huol a katunun tsitsilo e la uarima i tanen me poeier, “Alö go hala bar u katuun bate la uaier turu han te susukur batena sakier ta kannou na ta makumun soho. E möa ta kannou teka.” <sup>13</sup> Be Iesu e poeiena i taren, “Alimiou go hanou ramen!” Ba nori e ranga palisir, “Alam e ka puku mem a tolima beret na huol a iena. Alö e ngilem alam gona hol ta kannou turu katuun hoboto teka?” <sup>14</sup> A pal tson peisa i antuna

toumia turu 5,000. Be Iesu e poeiena turu katunun tsitsilo i tanen, “Hagum raïam u katuun, tolima u maloto tara man tötöa man hagum.” <sup>15</sup> Ba u katunun tsitsilo e markato has uaier temar ranga uu e Iesu. <sup>16</sup> Be Iesu e luena a tolima a beret na huol a iena, me tara sei uana i Kolö, me haniga uana tere Sunahan. Ba nonei e posepose ranen me hala raneien u katunun tsitsilo egi molamola raïen u katuun. <sup>17</sup> Ba nori hoboto e nour me masulur. Ba u katunun tsitsilo e onger a maloto na huol a kalobaka tara kannou ti nouba naien.

*E Pita e ngöei e Iesu e Mesaia  
(Matiu 16:13-19, Mak 8:27-29)*

<sup>18</sup> Tara töa pöata e Iesu e ka pepeisa me singo uana tere Sunahan, ba u katunun tsitsilo e la uarima i tanen. Ba nonei e rangata ranen, “U katuun e ngöe rilia esi?” <sup>19</sup> Ba nori e ranga palise ren, “A palai e ngöe rilö e Jon a Tsonun Baptaï e takei pouts. Na palai e ngöe rilö e Ilaïtsa, na palai e poeier alö a tana propetina i manasa te tötötöa poutsuma.” <sup>20</sup> Ba nonei e rangata ranen, “Ga limiou? Alimiou e ngöe milia esi?” Be Pita e ranga palisina me poeiena, “Alö e Mesaia tu lama tere Sunahan!”

*E Iesu e hatei mamin a kamits na tou mate i tanen*

*(Matiu 16:20-28, Mak 8:30-9:1)*

<sup>21</sup> Be Iesu e hala raneien u raranga u tagala koru, nori gima hate ii ta töa ta katuun tara ka teka. <sup>22</sup> Ba nonei e rangana me poeiena, “Alia tu butun Katunuma e sagohe gou romana a kamits pan. Ba pal kapan nu pris pan na u tson hihatuts tara Lo te

tor tsuga nariou lia. Alia ena kato hamatie riou romana, kaba turu hatopisana u lan ba lia te hatakei poutse riou.”<sup>23</sup> Ba nonei e poeiena i taren hoboto, “A katuun te ngilin la gono menoulia ega haka putei a peisanen bate sōatena a kuruse i tanen ba nonei te kukutie noulia.”<sup>24</sup> A katuun te peits nena a nitōatōa i tanen ena hatie nen romana. Kaba a katuun te hataia sile nei a nitōatōa i tanen te ngil mena neien lia, nonei ena sabie nen romana.<sup>25</sup> Saha a niniganiga te kame nou a katuun te luena a mamanaka i puta bate hatia tsiponena u namnamei i tanen? E möa tala.<sup>26</sup> Sanena ta tōa ta katuun ega matsingolo naioulia na u ranga i tar, ba lia tu butun Katunuma te matsingolo has nagen romana tara pōata te la meguma lia romana u ualesala i tar na tere Tamagulia na turu angelo u göagono.<sup>27</sup> Alia e hatei hamana ragou limiou, a palair u katuun teka ema mate roui romana e antunana tena sabie rien a Nipepeito tere Sunahan.”

*U tuenrei tere Iesu e palis  
(Matiu 17:1-8, Mak 9:2-8)*

<sup>28</sup> Turu tōal u lan i murina te ranga naia e Iesu a manka teka, ba nonei e luena e Pita mere Jon ne Jemis me la sei uaier ieluna u pokus tina singouaien.<sup>29</sup> Pōata te singoien, ba matanen e palisina, na u hasobō i tanen e butun hiaka koru, me pirahana.<sup>30-31</sup> Ba huol a katuun e songots butu merima u ualesalana i Kolō me ranga gono mer e Iesu. Nori ere Mosis mere Ilaitsa, u propetir i manasa. Ba nori e ranga gono mer e Iesu tegona mate uaien i Jerusalem bate hakape nou u ngil tere Sunahan.<sup>32</sup> I mam tara pōata teka e Pita na pala ti ka gono meien i topi koru me sohor. Kaba

nori i tagule me tarer u ualesala tere Iesu na huol a katuun ti tuol gono meien. <sup>33</sup> Pöata ti katsin laba naia a huol a katuun teka e Iesu, be Pita e poeiena i tanen, “O Tsunono, e nigana te ka uamia lam teka. Alam go kui a topisa taluhu, a töa i tamölö, na töa tere Mosis, na töa tere Ilaitsa.” Kaba e Pita ema atei sile ii a ka te ranga naien. <sup>34</sup> Pöata te ranga noaien, bu töa u köasi e butuna bu oho i tanen e hoho ranen. Ba u katunun tsitsilo e matoutur te kopo kap meraien u köasi. <sup>35</sup> Bu töa u raranga e butu nama turu köasi me poeiena, “Nonei a Pien Tson i tar teka, tu hopö kapiin lia. Alimiou go hengo mia i tanen!” <sup>36</sup> Pöata te kapaia u ranga, be Iesu e ka pepeisana. U katunun tsitsilo i kakamoto kap koruni a ka teka, na nonei tara pöata nori ima hate ii ta töa ta katuun tara ka ti tareien.

*E Iesu e kato haniga poutsi a pien tson te ka mei a liliahanei a omi*

*(Matu 17:14-18, Mak 9:14-27)*

<sup>37</sup> Turu tana u lan ba nori e koul rima turu pokus, ba u katuun u parpara emi tupaler e Iesu. <sup>38</sup> Ba töa katuun e kuna i gusur u katuun, “Tson Hihatuts, alia e singo hataatagi gia i tamölö, alö gona röto tara töa puku a pien tson i tar! <sup>39</sup> A töa liliahanei a omi e roron pile kap nanen, ba nonei te songots ku hapanina.\* Na liliahanei teka e roron hula tula hohomi koru nanen, antunana te butuna u poepoe i rungunen. Nonei e roron kato homi koruena a tuenrei nen, na nonei ema roron laba boroboro naneien. <sup>40</sup> Alia u ranga hataatagi koruia turu katunun tsitsilo i tamölö egi

---

\* **9:39:** Ema liliahanei nei te ku, kaba nonei te kato hakukui a katuun.

tsugeien, kaba nori ima antuna ii.” <sup>41</sup> Be Iesu e ranga palisina, “Alimiou u katuun u hahamana na limiou ema matskömi! Alia e sökana koru megu a nihahamana i tamilimiou! Hala mena mei a pien tson i tamölö i tar.” <sup>42</sup> Tara pöata te lama a pien, ba liliahanei e lapo ba nanen i puta me hula tula hohomi nanen. Be Iesu e tsuge iena a liliahanei, me kato haniga poutsena a pien, me hala poutse neien e tamanen. <sup>43</sup> Ba u katuun e asingoto hoboto koru ner a nitagala pan tere Sunahan.

*E Iesu e ranga lenin a tou mate i tanen  
(Matiu 17:22-23, Mak 9:30-32)*

U katuun i hakats hapara noan a mamananaka te kati e Iesu. <sup>44</sup> Ba nonei e poeiena turu katuunun tsitsilo i tanen, “Hakats kap haniga naiam u raranga teka: Alia tu butun Katunuma e susukun hala menari tara nitagala turu katuun.” <sup>45</sup> Kaba u katunun tsitsilo i ma atei sile ii a mouna u raranga teka. I hamous raien e gima atei sileien. Na nori i matoutun rangata naien a ka teka.

*Esi te panina?  
(Matiu 18:1-5, Mak 9:33-37)*

<sup>46</sup> U katunun tsitsilo i hialalati esi i taren te pan bala koru. <sup>47</sup> Kaba e Iesu e atei sil a ka ti hakats naien, ba nonei e luena töa pien me hatuole nen i rehinen. <sup>48</sup> Me poeiena, “A katuun te nigana tara pien teka tara solo i tar e here nei e niga hase noulia. Na katuun te nige noulia e niga hasena e Sunahan te hala namoulia. A katuun te teteneina i gusumilimiou nonei a kapan hamana.”

*A katuun tema pal ranei limiou e pala uana i tamilimiu*

*(Mak 9:38-40)*

<sup>49</sup> Be Jon e poeiena, “O Tsunono, alam u tari a katuun e tsuga ba neia u liliahanei u omi tara solomölö. Ba lam e ranga hapiou namen. Taraha? Nonei ema pala uanei i tarara.” <sup>50</sup> Be Iesu e poeiena i tanen na turu katunun tsitsilo, “Ma torohanan hapiou nami. Taraha? A katuun tema pal ranei limiou e pala uana i tamilimiu.”

*A töa han i Samaria i ramani e Iesu*

<sup>51</sup> A pöata e susuku hakapa tegi lu menai e Iesu i Kolö, ba nonei e hakats hakarapoto nena tega la uaien i Jerusalem, ba nonei e tanian lana. <sup>52</sup> Ba nonei e hala mam rena u tson tataala, ba nori e na tuku ria tara töa han iahana provins i Samaria tegina hamatskö mam menaien a manka. <sup>53</sup> Kaba u katuun tara han teka ima ngile ii e Iesu. Nori i atei sil nonei e la uu turu lotu halhal i Jerusalem. <sup>54</sup> Pöata ti hengo sabe naia ere Jemis mere Jon a ka teka, ba nori e raharaha korur me poeier, “Tsunono, alö e ngilem alam ego ngö hakouli u tula i Kolö batemi kato homi ranen?” <sup>55</sup> Be Iesu e habiritsina me ngena ranen. <sup>56</sup> Ba nori e la lekir tara tana han.

*U katuun ti ngilin kukutein e Iesu*

*(Matiu 8:19-22)*

<sup>57</sup> Tara pöata ti la ien tara maroro, ba töa katuun e poeiena tere Iesu, “Alia e kukutie goulö tara mamana han te la uamou lö.” <sup>58</sup> Be Iesu e poeiena i tanen, “U muki u hie e ka mer u kiou i taren, na u apena e ka mer u suhana. Kaba lia tu butun Katunuma u möa ta makumun soho.”

<sup>59</sup> Be Iesu e poeiena tara tai, “Kukutie moulia.” Ba nonei e poeiena, “O Tsunono, alö go haniga ba lia te la pouts bugu batena kaho bunaguma e tamar, ba lia te töan kukute goulö.” <sup>60</sup> Be Iesu e poeiena i tanen, “Hakar u mate bate kaho ner u mate pouts i taren. Kaba lö gona habulunganein a Nipepeito tere Sunahan.”

<sup>61</sup> Ba tabi e poeiena, “Alia e kukute gou lö, O Tsunono. Kaba lö go hala buna moulia ba lia tena röto polasa buguma tara pala i tar.” <sup>62</sup> Be Iesu e poeiena i tanen, “A katuun te tanian kukutie noulia bate roron tara pouts uana i murinen, ema antunanei tara Nipepeito tere Sunahan.”

## 10

### *E Iesu e hala rela u tohit u maloto tara katuun*

<sup>1</sup> I murina a ka teka ba Tsunono e hopö kap rena u tohit u maloto tara katuun.\* Nonei e ngilin hala huhuol mam mera leien tara man taun na man han hoboto te katsin la uaien. <sup>2</sup> Be Iesu e poeiena i taren, “A kui e tangoho hakapa kaba e möa ta katuun ta para tega hagali a kannou. Alimiou go singo uaiam tara Tsunono bate hala renama u katuun batena hagale rima a kannou a tangoho. <sup>3</sup> La tala mula. Tara, alia e hala here ragi limiou u tunan sipsip te la uaier i gusur u muki u hie. <sup>4</sup> Alimiou goma la memi ta pous moni tsi ta pora tsi tu sendol. Na e möa tu tuol bate ranga gono mem ta katuun i maroro. <sup>5</sup> Na tena tasu moa limiou ta luma, ba limiou te pei mamemiou, ‘A

---

\* **10:1:** A palaina man raranga turu Gospel ti retin u katunura i Grik i manasa e poeier, u tohit u maloto na palai e poeier u tohit u maloto na huol.

masalohana e tatei ka uana tara luma teka.’<sup>6</sup> Na te kanoa ta katununa tara masalohana tara luma teka, ba masalohana i tamilimiou te kanoa i tanen. Kaba te möa noa ta katununa tara masalohana, ba masalohana i tamilimiou te hakopis pouts has uanou i tamilimiou.<sup>7</sup> Alimiou go ka nitöa mia tara töa luma batema hula la uami tara man taina man luma.† Alimiou e tatei noue miou ne tatei ue miou a man saha manka te tatei hala naren. Taraha? A katunun kui egi halei a hihol i tanen.<sup>8</sup> Pöata tena butu moua limiou tara töa taun ba u katuun te lu mera rilimiou i luma i taren, alimiou go noueiam a saha kannou te hanou rarien limiou.<sup>9</sup> Alimiou go kato haniga pouts raiam u katuun te ka mer a siki nonei tara taun, bate mar ranga hatei meramien teka, ‘A nipepeito kap tere Sunahan e susuku hakapa uama i tamilimiou.’<sup>10-11</sup> Kaba tena butu moa limiou tara töa taun bu katuun tema haniga rari limiou, ba limiou tena tuol mia i maroro bate ranga meramen, ‘Alam e tohu ba nem u köahu tara taun i tamilimiou te rokotona i moumulam! Kaba limiou go hakats haniga iam: a Nipepeito tere Sunahan e la hasusuku hakapa uama i tamilimiou, kaba limiou ema ngil tsipone mien!’<sup>12</sup> Alia e ranga mera goulimiou, turu lanin hahuna tere Sunahan, u katuun tara taun teka e lue riou a nihahuna te pan bala nanou a nihahuna turu katuun u omi ra i Sodom.”

*U katuun tara man taun ti hahamana  
(Matiu 11:20-24)*

---

† **10:7:** E ranga nena, nori gi sohoia tara töa puku a luma kaba nori e tatei na hihatuts ria tara palaina man makum batemi soho pouts ria tara töa puku a luma.



13 E Iesu e hihatuts me poeiena, “A nomi pan koru e butuna romana i tamiliou u katunura i Korasin na i Betsaida! Sanena a man mirakol ti katoeia i gusumilimiou ti kato mameia i Taia na i Saidon i iomin, nori sanena i tori tsuga ban a man markato a man omi i taren bate ka ria turu gum. 14 Kaba turu lanin hahuna tere Sunahan, a nihahuna i tamiliou u katunura i Korasin na i Betsaida e pan bala nanou a nihahuna turu katunura i Taia na i Saidon. 15 Na limiou u katunura tara taun i Kapenium e ngilin soloseie miou a peisa milimiou iasa, kaba limiou e lapo ba has raroua i hel!” 16 Be Iesu e poeiena turu katunun tsitsilo i tanen, “U katuun te hengo rariou limiou e hengo hase riou lia, na u katuun te tori hasoala rariou limiou e tori hasoala has nariou lia. Na u katuun te tori hasoala narioulia e tori hasoala has ner e Sunahan te haleie moulia.”

*U tohit u maloto tara katuun i kopisima*

17 U tohit u maloto tara katuun i kopis mema a nisasaala pan me poeier tere Iesu, “O Tsunono, u liliahanei u omi has i hengo korui u ranga i tamulam tu tsuga meraien lam tara solo mölö!” 18 Be Iesu e ranga palis ranen, “Aa, alia u tari e Satan e rus here mei u kanaha i Kolö. 19 Hengoiam! Alia u hala hakapa railimiou a nitagala tego tötö mera milimiou u kökötsi na u kökoto. Na lia u hala hakapa has railimiou a nitagala tego tagala saluhe mena milimiou a nitagala hoboto tere Satan, a katuun te pakö ranou ra. Na e möa nou romana ta ka tega kato homi raiou limiou. 20 Kaba alimiou goma sasaala memi u liliahanei u omi te hengo mera ri ien limiou. Alimiou go sasaala meiam a solomilimiou i koloto hakapa naia i Kolö.”

*E Iesu e sasaala  
(Matiu 11:25-27, Matiu 13:16-17)*

<sup>21</sup> Nonei has tara pöata, e Iesu e ka mei a nisa-aala pan turu Namnamei u Göagono me poeiena, “O Tamar, alö a Tsunono pan i Kolö na i puta! Alia e haniga koru megia i tamölö te hamous me milö u raranga u mana turu katuun te poeier e ka mer a niatei, bate haröto namen turu katuun papala tema atei balari. Aa, O Tamagulia, alö e markato uaiem teka turu ngil peisa i tamölö balö te sasaala memen.” <sup>22</sup> Be Iesu e rangana turu katuun, “E Tamar e hale ii lia a mamanaka hoboto. Na e möa ta töa ta katuun tega atei sil a Pien Tson. E Tamar pepeisa lasi. Na e möa has ta katuun tega atei sil e Tamar. A Pien Tson pepeisa te atei silena e Tamanen, na esi a Pien Tson te hopö kap naien te tatei hatei butu narouen.” <sup>23</sup> Be Iesu e habirits uana turu katunun tsitsilo me poeiena i taren pepeisa, “Sasaaliam a man mata te tarer a manka te tare milimiou! <sup>24</sup> Alia e ranga mera goulimiou, u propet na u king u parpara i ngilin tara a manka te tare milimiou, kaba nori ima tareien. Nori i ngilin hengoe a manka te hengoe milimiou, kaba nori ima hengoeien.”

*U haharuei tara toun Samaria a niga*

<sup>25</sup> Turu töa u lan, a töa tson hihatuts tara Lo tere Mosis e tuol sei me torohane nei e Iesu u rangatasei teka, “Tson Hihatuts, aha tego kati lia ba lia te luegou a nitöatöa te ka nitöana?” <sup>26</sup> Be Iesu e poeiena i tanen, “Aha te ranga nena u Buku u Göagono? Alö e mar atei mena mien ime?” <sup>27</sup> Ba nonei e poeiena, “U Buku u Göagono e poeiena, ‘Alö go ngil koru a Tsunono i tamölö e Sunahan turu

tori hoboto i tamölö nu namnamei na nitagala na u hakats hoboto i tamölö, bate ngil has menami a tana katuun temar ngil mena milö a peisam.’ ”

<sup>28</sup> Be Iesu e poeiena i tanen, “Alö e ranga hamatskö mula. Markato uu teka ba lö te töatöa hamana mou.” <sup>29</sup> Kaba a tson hihatuts tara Lo e ngil u katuun egi pei nonei a katuun a matskö, ba nonei e rangatena e Iesu, “Esi nonei a katuun tego ngili lia?” <sup>30</sup> Be Iesu e ranga palisina me poeiena, “A töa katuun e la ban i Jerusalem me gala uana i Jeriko, ba u kopkop e atung hohomie ren me lueier a mamanaka, ba nori e laba naren. <sup>31</sup> Nonei tara pöata, a töa pris turu Jiu e gala silaia tara maroro teka, kaba pöata te tareien a katuun ba nonei e la hapalis ba nanen. <sup>32</sup> I murinen a töa Livai e gala sila hasia tara maroro teka, kaba pöata te tareien a katuun ba nonei e la hapalis ba has nanen. <sup>33</sup> Kaba a töa toun Samaria e gala sila hasia tara maroro teka. Ba pöata te tareien nonei a katuun me taatagi koru nanen. <sup>34</sup> Ba nonei ena hakis nena u uapi na uain tara man takiraha na man ngats i peisanen, me pouenen. Ba nonei e hose nen tara rongki i tanen me lu mena neien tara töa luman soho mena tara kap nanen. <sup>35</sup> Turu hamahö ba nonei e lousena a huol a denarius moni me hale neien a katuun terena luman soho me poeiena, ‘Pakoko hanigei a katuun teka. Na te noue noen ta moni lel i tamölö, ba lia temi palis poutse gouen tara pöata te sila pouts guma lia teka.’ ” <sup>36</sup> Be Iesu e pei lelana, “Esi tara topisa katuun teka te ngil korui a tana katuun?” <sup>37</sup> Ba tson hihatuts tara Lo e poeiena, “A katuun te taatagi naien.” Be Iesu e poeiena i tanen, “Bara. Alö e markato has uu te mar kato uaien.”

*E Iesu e roroia tere Marta mere Maria*

<sup>38</sup> E Iesu na u katunun tsitsilo i tanen i la uu tara maroro mena butu ria tara töa han, ba töa tahol a solonen e Marta e lu mera neien tara luma i tanen.

<sup>39</sup> E toulanen e Maria e gum ia i mouna e Iesu bate hahengona turu hihatuts i tanen. <sup>40</sup> Kaba e Marta e kato sil korui a man toukui tega katoeien.

Ba nonei e la nama memi poeiena, “Tsunono, alö ema hakats nami e toular e laba nena moulia ba lia te kato pepeisegu a man toukui? Alö go ranga memen bate mi taguhe noulia!” <sup>41</sup> Ba Tsunono e ranga palise nen, “O Marta, Marta! Alö e toku korum na e hakats hatagala nem a mamanaka.

<sup>42</sup> Kaba töa puku a ka te pan balana. E Maria e hopö kap nena a ka a niga teka, na ema antunan luba naroiën.”

## 11

*E Iesu e hihatutsin tegi mar singo uu  
(Matiu 6:9-13, Matiu 7:7-11)*

<sup>1</sup> E Iesu e singoia tara töa makum ba pöata te singo hakapaien, ba töa katunun tsitsilo i tanen e poeiena i tanen, “Tsunono, hatuts ramei lam temar singo uaier, temar hatuts merai e Jon u katunun tsitsilo i tanen.”

<sup>2</sup> Be Iesu e poeiena i taren, “Pöata te singo mia limiou, alimiou go mar singo uaiam teka:

‘O Tamamulam,  
a solomölö egi hagöagoni.

Alö go mi tsunone rilam.

<sup>3</sup> Alö go hala ramei lam a kannou na i romana.

<sup>4</sup> Balö te hapolasa bera mi lam a man markato a man omi i tamulam

te hapolasa has mena mi lam a man markato a man omi ti katoeia u katuun i tamulam. Na lö goma hala merai lam tara pöata turu hiamus.’ ”

<sup>5</sup> Be Iesu e poeiena turu katunun tsitsilo i tanen, “Sanena ta töa i tamilimiou ega ka mei ta hahikapien i tanen bate la uana tara luma i tanen tara gusuna bong batena hateie nen, ‘O hahikapien, alia go haroho bin ta topisa ta beret. <sup>6</sup> Taraha? A tana hahikapien i tar e la nama i lehana me butuna i luma i tar, kaba lia u möa ta kannou tego haleien!’ <sup>7</sup> Na hahikapien i tamölö e tatei soul nama iahana luma, ‘Ma tuke balei lia! A tamana e pili hakapa lala, na lam mera galapien i tar e opöm, na lia ema takei goui bate hale goulö ta ka.’ <sup>8</sup> Bara, alia e ranga megou lö, nonei e tatei takeina bate hale noui lö a mamanka te ngile mölö. Kaba mana tara nihikapien i tamölö? E möa. Kaba nonei e sökanan hengo tunena te ku birbirits uana a hahikapien i tanen, bate haleneien a manka te ngilenen. <sup>9</sup> Na lia e poeiegu i tamilimiou, rangataiam ba limiou te lue mouen romana. Sakeiam ba limiou te sabie mouen romana. Porokeiam a tamana bate kalate riou. <sup>10</sup> Taraha? U katuun te rangrangatar e lue rouen romana, na u katuun te sakesaker e sabie rouen, na u katuun te porporoko riou e kalata bera roui a tamana. <sup>11</sup> Esi i tamilimiou te tatei hale nei a pien tson i tanen a kökötsi tega singo menaien ta iena? <sup>12</sup> Tsi tega singoeien ta nata, alö e hale moien a kökoto? <sup>13</sup> Alimiou u katuun u omi e atein hala noa has namiou a manka man niga tara galapien i tamilimiou. Na e Tamarara i Kolö te niga balana e hala has nanou u Namnamei u

Göagono turu katuun te singor bate harangata ria i tanen!”

*E Iesu mere Belsebul*  
(*Matiu 12:22-30, Mak 3:20-27*)

<sup>14</sup> E Iesu e tsuga ban a liliahanei a omi te roron kato habirui a töa katuun. Tara pöata te lakasaia a liliahanei, ba katuun e taniaan rangana. Bu katuun e asingoto korur. <sup>15</sup> Kaba palai taren i pei, “Nonei e tsuga ba rena u liliahanei u omi tara nitagala tara tsunono i taren e Belsebul!”

<sup>16</sup> Ba palai e torohane ren me rangate rien tega kato menaien tu töa tu hiharötona i Kolö tega harötein nonei e lama tere Sunahan. <sup>17</sup> Kaba e Iesu e ate sil u hakhakats i taren me poeiena i taren, “Tegi hiatatung poutsia u katuun iahana töa han, ba han teka tena omi nou. Na tegi hiatatung poutsia u katuun tara töa hun katuun, ba u katuun teka tena tasata has riou. <sup>18</sup> Na tegi hiatatung poutsia a pala tere Satan, ga ime temar tuol hakarapoto uanou a nipepeito i tanen? Nonei a ka temar ranga sila uagu lia teka, te pei mena milimiou e Belsebul te hale nei lia a nitagala tego tsuga ba merai lia u liliahanei u omi. <sup>19</sup> Tego tsuga ba merai lia u liliahanei u omi tara nitagala tere Belsebul, ba tara nitagala teresi te tsuga ba mera rien u katunun tsitsilo i tamilimiou? U katuun pouts i tamilimiou te haröto ner alimiou e ranga homi miou. <sup>20</sup> Kaba te tsuga ba ragia lia u liliahanei u omi tara nitagala tere Sunahan, ba ka teka te hatara nena a Nipepeito tere Sunahan e la hakapa uama i tamilimiou.

<sup>21</sup> “Tara pöata te ka mena a katuun a tagala a man kaan hiatatung i tanen bate tara kap haniga

nena a luma i tanen, a mamananaka i tanen e niganana. <sup>22</sup> Kaba tega butuia ta katuun ta tagala bala koru bate atunge nen tega tagala saluhe naien, ba nonei te söata hakape iena a man kaan hiatatung te kahete kap meien a peisanen. Na mamananaka hoboto te söateien, nonei e molamola naien tara palair u katuun.

<sup>23</sup> “A katuun tema katuun uanei i tar e omie noulia. Na katuun tema hagala taguhu gono menei lia a kannou e tsihasa ranen.”

*A liliahanei a omi e kopisima*  
(Matiu 12:43-45)

<sup>24</sup> Be Iesu e pei lelana, “Tara pöata te lakasa ba nena a liliahanei a omi a katuun, ba nonei te hula lana tara makum a palaka bate sake la nena ta makum tega husa ien. Kaba tema sabie neien ta makum, ba nonei te hakats pouts nena nonei a katuun te laba namen, ‘Alia e la pouts uagou tara luma tu laba nema lia.’ <sup>25</sup> Ba nonei e la poutsuna mena sabiena a luma e gogoso na e tara hanigana. <sup>26</sup> Ba nonei ena peigi renama a tohit a liliahanei a omi te omi bala naien. Ba nori e la rima memi tasu ria nonei tara katuun. I murimuri nonei e omi bala koru nanou te mar ka mam uaien.”

*A nisasaala hamana*

<sup>27</sup> Tara pöata te ranga hakapa naia e Iesu a ka teka, ba töa tahol e ranga seinä i gusura u katuun me poeiena i tanen, “A tahol te poseiou lö na te hauseiou lö ega sasaala!” <sup>28</sup> Be Iesu e ranga palisina me poeiena, “U katuun te hengoer u raranga tere Sunahan bate kukutie ren egi sasaala baba koru.”

*U katuun i ngilin tarein tu mirakol*  
(Matiu 12:38-42)

<sup>29</sup> Pöata ti gono hahiseia u katuun e Iesu, ba nonei e ranga noa hasina i taren me poeiena, “U katunura i romana u katuun u omi. Nori e roron kato siler tegi tara menaien tu mirakol. Kaba e möa tu mirakol tegi hatara raien, u mirakol lasi tere Jona. <sup>30</sup> E Jona e here ii a hatöatongo, a katunun pöpöa turu katunura i Ninive. Na Alia tu butun Katunuma e here hase goi a katunun pöpöa turu katunura i romana. <sup>31</sup> Turu Lanin Hahuna i murimuri, a tetahol panina i Siba e takei nou bate saka ranoui u katunura i romana u ranga. Taraha? Nonei a tetahol te lama i lehana koru tegomi hengo menai u hihatuts u niga tere Solomon a King. Na i romana a katuun te pan bala nena e Solomon e kana teka, kaba limiou ema hengoe mien! <sup>32</sup> Turu Lanin Hahuna ba u katunura i Ninive te saka raroui u katunura i romana u ranga. Taraha? A tei Ninive i hengo u raranga tere Jona me hapolaser a markato a omi i taren. Na i romana a töa katuun te pan bala nena e Jona e kana teka, kaba limiou e ma hapolasa noa hasemi a man markato a man omi i tamilimiou!”

### *U ualesala*

*(Matiu 5:15, Matiü 6:22-23)*

<sup>33</sup> E Iesu e ranga lel me poeiena, “E möa ta töa ta katuun tega hakulupi u lam bate hamouse nen tsi e kopo kap naneien a tabeli. Nonei e roron hake nen tara makumun gumgum i tanen iasa, ba u katuun te tasur te tatei tareren. <sup>34</sup> Na matamölö e here nei u lam turu tuenrei. Te nigana u mata, alö e ka mia turu ualesala. Kaba te omina u mata, alö e ka mia turu kuhil. <sup>35</sup> Alö go hanei haniga. Ualesala iahamölö e namots kuhilina. <sup>36</sup> Te alesala hoboto na iahamölö, bate möana tu kuhil, ba nonei



te alesala sokö na, te kato uana u lam te alesala uana i tamölö.”

*Hanei sileiam u tson hihatuts tara Lo na u Parasi*

*(Matiu 23:1-36, Mak 12:38-40)*

<sup>37</sup> Pöata te ranga hakapaia e Iesu, ba töa katuun turu Parasi e ngö mena neien i luma i tanen tegina nou uaien. Be Iesu e gum sil talena tega nouaien.

<sup>38</sup> Ba nonei a Parasi e asingoto nena te nou u e Iesu batema galus mamme nei a limanen ti markatou u Jiu. <sup>39</sup> Ba Tsunono e poeiena i tanen, “Alimiou u Parasi e roron kato hagogose miou a murina kap na pelete, kaba i torimilimiou, alimiou u gulgulka na e saputu memiou a mamana a markato a omi.

<sup>40</sup> Alimiou u tutu! E Sunahan te kato u tuenreina ielesala na u tuenrei hasina iogana. <sup>41</sup> Kaba alimiou go hala naim a manka te ka memi limiou tara katuun te möa ta ka, ba limiou te töan gogoso hamana miou.

<sup>42</sup> “Alimiou u Parasi, a nomi pan e butuna romana i tamilimiou. A mamana matsi kaan haksoka a matsi tetenei te kana tara kui, alimiou e roron patsike miou a matsi maloto a matsi makum bate halemi e Sunahan a man hamalotona man makum. A markato te hala menari a hamalotona a makum tere Sunahan e nigana. Kaba limiou e roron totone miou u mar hihatuts pan tara Lo te markato uana teka: a markato te hamou hamatskö menari u raranga turu katuun, na markato te ngil menari u katuun e Sunahan.

<sup>43</sup> “Alimiou u Parasi, a nomi pan e butuna romana i tamilimiou. Alimiou e ngil korue miou ego gum mia turu gungum tara pal kapan tara luman lotu, na limiou e ngil hase miou u katuun

egi hapan raia limiou tara töana. <sup>44</sup> A nomi pan e hahaloso ranou limiou. Alimiou e heremi a man kioun mate tema tareri u katuun. Bate tataala ria ielunen, kaba ema atei sileri a ka a omi e kana iogana.”

<sup>45</sup> Ba töa tson hihatuts tara Lo e poeiena i tanen, “Tson Hihatuts, tara pöata te ranga namia lö a ka teka, alö e saka has ramien lam!” <sup>46</sup> Be Iesu e ranga palisina me poeiena, “A nomi pan e butuna romana i tamilimiou has u tson hihatuts tara Lo! Alimiou e roron hake mia a man nitiamu turu katuun bate lagi sösöate ren, kaba limiou e namala taguhu ramien. <sup>47</sup> A nomi e butuna romana i tamilimiou. Alimiou e roron kuie miou u kahokaho u niga turu propet, u tubumilimiou ti atung hamate raian. <sup>48</sup> Alimiou e haröto nemiou te hatangana mena milimiou a markato turu tubumilimiou: nori i pulir u propet ba limiou te kuie miou u kahokaho i taren. <sup>49</sup> E Sunahan, te ka mena u hakhakats u niga, e pei, ‘Alia e hala ragou u propet na u katunun raranga i taren. Ba nori te kato homi rer romana a palai i taren, bate atung hamate raier a palai.’ <sup>50-51</sup> Ba limiou, u katunura i romana te alate mou romana u propet hoboto ti atung hamatier i mam noa, e taniaia tere Ebol ti atung hamati, bate noana tere Sakaria ti atung hamateia i hagusuna a makumun haats na Luman Lotu Pan. Aa, alia e ranga mera goulimiou, alimiou u katunura i romana e alate moen romana!” <sup>52</sup> Be Iesu e poeiena, “A nomi e butu noa i tamilimiou u tson hihatuts tara Lo. Alimiou e rama namiou a maroro tega kalati a niatei hamana tere Sunahan. Alimiou ema lu bemi a peisamiou a niatei teka, na limiou e hapiou has

ramiou u katuun te ngilin lue ren!”<sup>53</sup> Pöata te laba naia e Iesu a makum teka, bu tson hihatuts tara Lo na u Parasi e taniau tuts sil korue ren me rangate rien u rangrangatana tara mamanaka.<sup>54</sup> Nori i torohanan gamo naien bate ngilin sake ner tu raranga tu omi tega katoeien.

## 12

### *Hanei sile iam u gamo* (*Matiu 10:26-27*)

<sup>1</sup> Tara pöata ti gono hobotoia u katuun u para koru, ba palai e töeier a mour a palai. Be Iesu e ranga mam na turu katunun tsitsilo i tanen me poeiena, “Alimiou go hanei sileiam u is turu Parasi, nonei a man gamo i taren.<sup>2</sup> A mamanaka te hia kopkop naier i romana ena lukapa banariou i murimuri. Na mamanaka te hamouseier i romana ena hatara nariou i murimuri.<sup>3</sup> Na manka tu ranga niam limiou turu kuhil e hengoe roua turu alesala. Na manka tu ranga hamous niam limiou ena ranga halakasa ner romana.”

### *Alimiou go matouteiam e Sunahan* (*Matiu 10:28-31*)

<sup>4</sup> Be Iesu e poeiena, “Alia e ranga mera goulim-iou a man hahikapien i tar, ma matout rami u katuun te puli hamatier u tuenrei kaba nori i möa ta nitagala tegi kato homi menaien u namnamei.<sup>5</sup> Alia e hatei ragi limiou esi tego matouteiam limiou: alimiou go matouteiam e Sunahan. Taraha? Nonei e antunan kato hamatiena u tuenrei, na nonei e ka has mena a nitagala tego lapo ba meraien u katuun i hel! Aa, alia e ranga mera goulim-iou, nonei tego matouteiam limiou!”<sup>6</sup> A

tolima a apena e holeri a moni a tetenei. Kaba e Sunahan ema solopala noa hase nei ta töa i taren. <sup>7</sup>Kaba limiou e niga bala koru ramiou u apena. Ma matoutmi. E Sunahan e ase hakapa hasi u hulu hoboto i baku milimiou.”

*Alimiou goma holis nami e Kristo*

*(Matiu 10:32-33, Matiü 12:32, Matiü 10:19-20)*

<sup>8</sup> E Iesu e ranga lel me poeiena, “Alia e ranga mera goulimiou: esi te hatei na noa lia turu katuun, alia tu butun Katunuma ena hatei has ragou u angelo tere Sunahan nonei a katuun i tar.\*

<sup>9</sup> Kaba esi te holis nena nonei a katuun i tar i matar u katuun, balia tena holis has nagoen romana i matar u angelo tere Sunahan. <sup>10</sup> A katuun te ranga homi nanou lia, Alia tu butun Katunuma, e Sunahan e luba noa has nanou a markato a omi i tanen. Kaba a katuun te ranga homi nena u Namnamei u Göagono, e Sunahan ema luba nanoui a markato a omi i tanen. <sup>11</sup> Na pöata te kout raroen limiou ba limiou te tuol mia iahana u luman lotu na i matar a pal kapan, e möa tego hakats hapara uaiam limiou bate pei miou, ‘Ime temar ranga uagou lia?’ <sup>12</sup> Taraha? U Namnamei u Göagono te hatuts ranei limiou romana a ka tego ranga naiam limiou.”

*U haharuei tara tson moni a tutu*

<sup>13</sup> A töa a katuun te kaia i gusur u katuun e pei tere Iesu, “O Hihatuts, alö go ranga mei e toular ba nonei te lu kakatena a manka te mate ban e tamamulam bate hale nei lia a pala i tar.”

---

\* **12:8:** U raranga teka e mar mouna uana teka, Esi te hatei ranei u katuun nonei e hamana na i tar ne ka uana tara pala i tar, alia ena hatei has ragoen turu angelo tere Sunahan.

<sup>14</sup> Be Iesu e poeiena i tanen, “Esi te hopö kapiin tego ona menai lia a manka i tamili miou bate lu kaakata ragen?” <sup>15</sup> Ba nonei e poeiena i taren hoboto, “Hanei iam bate taratara kap namiou a peisa milimiuou tara markato hoboto tara katuun te gulena a mamanaka. Taraha? A mouna a nitöatöa ema lue ria tara mamanaka a para te ka mena a katuun.”

<sup>16</sup> Be Iesu e hatei raneien u töa u haharuei me poeiena, “A töa tson moni e ka mei u tsiktsiki te hapusukeien a kannou a parpara koru. <sup>17</sup> Ba nonei e mar hakats uana teka: ‘Alia u möa ta makum tego haputeia lia a kannou a parpara koru i tar. Aha tego katoi lia?’ <sup>18</sup> Ba nonei e poeiena, ‘Bara, alia e rure gou a man luman haputu i tar bate hatakei gou a man luma a man kapan. Ba lia te hapute goua a kannou na man tana manka hoboto teka. <sup>19</sup> Ba lia te ranga pouts megou romana a peisar bate poeiegu, Möa lel! Alia e ka megu a mamanaka a niga te antunan kaka pala nou turu hiningal u parpara. Balia te nou haniga gou bate uagu, bate roro haniga gou bate sasaalagu.’ <sup>20</sup> Be Sunahan e poeiena i tanen, ‘Alö a katuun a tutu! Tara bong i romana noahas ba lö te mate mou! Gesi te lue nou a mamanaka hoboto ti haputi lö?’ ” <sup>21</sup> Be Iesu e poeiena, “E markato has uana iesana tara katuun te gono benei a peisanen a mamanaka, kaba i matana e Sunahan nonei e möa ta ka ta niga.”

*Ma matout mi*  
(*Matiu 6:25-34*)

<sup>22</sup> Be Iesu e poeiena turu katunun tsitsilo, “Nonei lasi te hatei ragi lia alimiuou: ma hakats hapara silemi a nitöatöa nu tuenrei na i puta, na ha

te noue mou limiou na ha te hasoge mou limiou. <sup>23</sup> Taraha? A nitöatöa ema ka sile nei a tou nou, na u tuenrei ema ka sil hase nei u hasobö. <sup>24</sup> Rötoiam turu apena te ngö rari u kokou. Nori ema leberi a kannou na ema hagala hase rien, na nori ema ka has meri ta luman haputu tara kannou. Kaba e Sunahan noahas te hanou ranen! Na limiou e niga bala ramiou u apena! <sup>25</sup> Esi i tamilimiou te tokuna bate gamon hangahangahe nou a nitöatöa i tanen i puta te toku uanen? E möa tala. <sup>26</sup> Na tema antunan kato namia limiou a tsitabubun ka teka, ga taraha ba limiou te toku sile miou a man tabina manka?

<sup>27</sup> “Rötoiam temar pan uaier a man palaua a man hie. Nori ema kuiri na ema katoeri tu labalaba i taren. Na lia e ranga mera goulimiou, e Solomon a King e ka mei u hasobö u tara haniga koru, kaba a tsi töa puku a tsi plaua teka e tara haniga bala nena u hasobö tere Solomon. <sup>28</sup> E Sunahan e katoeiena u palaua u niga, te pusukuna i romana na te haats hase roua turu tula i mahö. Na nonei ema hala has ranoui limiou tu hasobö? Alimiou e ka memiou u nihamana u tetenei. <sup>29</sup> Na limiou goma hakats hapara silemi a ka tego noueiam limiou na tego ueiam limiou. <sup>30</sup> U katuun u hahamana ra i puta e roron hakats sil koruer tegi lu menai a mamanaka teka. Kaba e Tamamilimiou i Kolö e atei silena te ngil mena milimiou a manka teka. <sup>31</sup> Kaba limiou go hakats sileiam a Nipepeito tere Sunahan, ba nonei te hala has ranoui limiou a manka teka.”

*A manka man niga na i Kolö  
(Matiu 6:19-21)*

<sup>32</sup> Be Iesu e poeiena, “Alimiou a matsi katuun i tar, alimiou goma matout mi. Taraha? E Tamamil-

imiou e sasaala mena tego hala meraien limiou a Nipepeito i tanen. <sup>33</sup> Hahol naiam a manka i tamilimiou bate hala namiou a moni turu katuun ti möa ta ka. Alimiou go kui hatagala sileiam a manka tema tatei omiri, a manka man niga na i Kolö te ka nitöana, na u katuun u kopkop ema antunan lue rien romana, ne möa ta kokoros tega kato homieien. <sup>34</sup> Tara han te kana a manka man niga bala i tamilimiou, nonei lahas te ka noa a torimilimiou.”

*U katunun kui u niga*

<sup>35</sup> Be Iesu e pei lelana, “Hapouseiam u hasobön kui bate hakulupe miou a man lam bate hahalose miou a saha toukui te butu nou. <sup>36</sup> Bate heremi u katunun kui te hahaloser a katuun pan i taren tega kopis pouts uamen tara kannouna tara hitöl. Pöata te tuku nen ba nonei te porokona, ba nori te kalata boroboro narien a tamana. <sup>37</sup> Te sabie nen u katunun kui i tanen e hahalose ren bate ma sohori, ba u katunun kui te sasaala korur. Alia e ranga mera goulimiou, nonei a katuun pan e kato here nanoi a peisanen a katunun sösöata kannou, bate hagum ranen bate hanou ranen. <sup>38</sup> Na tega la memen a gusuna bong, tsi tara pal bongbong koru, bate tarena nori e kalata noar bate hahalosor, ba u katunun kui teka te tatei sasaala korur. <sup>39</sup> Alimiou go hakats naiam a ka teka: Sanena tega atei sil mameia a katuun terena luma i hangisa koru tega lama a katuun a kopkop, ba nonei te hatongo kap nena a katuun teka bate ma heleie nei a luma i tanen bate tasuna. <sup>40</sup> Na limiou has go hanei iam. Taraha? Alia tu butun Katunuma e la guma romana tara pöata alimiou ema hakats nami romana tego la uama lia.”

*A tson mammam a niga na tson mammam a omi  
(Matiu 24:45-51)*

<sup>41</sup> Be Pita e poeiena, “Tsunono, u haharuei teka alö e hatei ramien lam pepeisa, tsi alö e ranga na mien turu katuun hoboto?” <sup>42</sup> Ba Tsunono e ranga palisina, “Esi i tamilimiou te here nei a tson mammam hamana te hakats hanigana? A katuun pan i tanen e hataratara kap naneien romana a palair u katunun kui i tanen. Nonei te tatei hala ranoien a kannou tara pöata hamatskö. <sup>43</sup> A mar tson mammam teka e tatei sasaalana tega mi sabe menai a katuun pan i tanen te markato uanen teka tara pöata tego la pouts men i han. <sup>44</sup> U mana koru alia e ranga mera goulimiou, a katuun pan i tanen emi hataratara kap naneien romana a mamanaka hoboto i tanen. <sup>45</sup> Kaba te omina a tson mammam, ba nonei temar hakats uana teka, ‘A katuun pan i tar ema sesein la pouts namei romana.’ Ba tson mammam te hatanian singata rena a palair u katunun kui, a pal tson na touhaliou, ba nonei te nouna bate ueiena u uain bate tutuna. <sup>46</sup> Ba katuun pan tara tson mammam teka te la hasingoto nama romana tara pöata tema hakats naneien tega lamen. Ba katuun pan te hahuna korue nou a tson mammam a omi teka bate hake noen turu katunun kui tema tara kap haniga nari a toukui i taren.

<sup>47</sup> “A katunun kui te atei silena a toukui te ngilena a kapan i tanen batema hanei sile neien, na ema katoe nei a ka te ngilena a kapan i tanen, nonei te singata hapan koruier romana. <sup>48</sup> Kaba a katunun kui tema atei sile nei a ka te ngilena a kapan i tanen, bate katoena a ka te antunana tara nihahuna, nonei te singata hateteneier romana. A



katuun ti hale ii a ka a para ega hala hapara has. Na katuun ti hataratara kap nai a toukui a kapan e ga kato haniga korui a toukui teka.”

*E Iesu e lu kaakata ranou u katuun  
(Matiu 10:34-36)*

<sup>49</sup> E Iesu e ranga lel me poeiena, “Alia u la silema tegomi hala menai u tula i puta, na lia e solon ngil koruegu u tula teka ega kulupu boroboro! <sup>50</sup> Alia e ka megou a kamits pan tego lui lia, na torir e tiama koru silena tega kapa uaien romana. <sup>51</sup> Ime temar hakats uami limiou? Alia u la silema tegomi hala menai a masalohana i puta? E möa. Alia e ranga mera goulimiou, alia u la silema tegomi lu kaakata merai u katuun! <sup>52</sup> Tara man pöata te la nama, a tolima katuun te ka roua tara töa luma e ma hianiganiga roui bate katoeriu a huol a pala. A topisa te pal rer romana a huol, ba huol te pal raier a topisa. <sup>53</sup> U munmun tamana e hiapalpalir romana, a galapien tson nu tamaren. Na u munmun tsinana e kato has uariou iesana bate hiapalpalir, a galapien touhaliou nu tsinaren. A tahol te pal nena romana a pien tahol a halöanabei i tanen, ba pien tahol te pal nena romana a tahol a halöanabei i tanen.”

*Tara marei a pöata  
(Matiu 16:2-3)*

<sup>54</sup> Be Iesu e pei hasena turu katuun, “Pöata te tare mia limiou u köasi te butu nama tara pala te tsiruku uana a pitala, ba limiou te pei miou, ‘A langits e polo nou,’ ga langits e polo noahas nou. <sup>55</sup> Na pöata te hasagohe mia limiou a lomolomo a belbelaha, ba limiou te pei miou, ‘A ka e hiski

nou,' ga ka e hiski noahas nou. <sup>56</sup> Alimiou e tatei röto uamiou turu tsiktsiki na i kolö bate atei sile mou ime te mar mouna uanen. Kaba limiou u gamogamo! Taraha ba limiou tema atei silemi te mouna uana a manka te butuna i romana?"

*Hamatskö gono meiam u katuun te kamer a niomi i tamilimiou  
(Matiu 5:25-26)*

<sup>57</sup> Be Iesu e poeiena, "E hana ba limiou tema ona peisemi a ka te matsköna? <sup>58</sup> Tara pöata te la gono memia lö a katuun te ngilin kout neno lö, na tara pöata te ka noa mia limiou i maroro, alö go torohanan hamatskö gono meien. Nonei e namots las mena nei lö tara katuun pan turu kout bate hala nanoua lö tara polis, ba polis te hake noua lö tara karabus. <sup>59</sup> Alia e ranga megou lö, alö ema tatei lakasa mumei romana e antunana tara pöata te hala namia lö a mamana hiholuna turu kout."

## 13

*Hapolis banaiam a man markato a man omi*

<sup>1</sup> Nonei tara pöata teka, a palair u katuun ti ka, i hahatei e Iesu e Pailat e ha atung hamatir u katunura i Galili tara pöata ti haats uaien tere Sunahan. <sup>2</sup> Be Iesu e ranga palis ranen, "Nori u katunura i Galili i omi koru balein a tei Galili hoboto ti mar mate uaien teka? <sup>3</sup> E möa koru lasi. Ga lia e hatei ragi limiou, tema palis ba namoui limiou a man markato a man omi i tamilimiou, ba limiou hoboto te mate has mou! <sup>4</sup> Na limiou go hakats has naiam te rus ia a luma a pia i Siloam me kono hamatiena a maloto na töal a katuun. Nori ti omi koru balein a palair u katuun hoboto ti kaia i

Jerusalem? <sup>5</sup> E möa has. Na lia e hatei ragou limiou, tema palis ba namoui limiou a man markato a man omi i tamilimiu, ba limiou hoboto te mate has mou!”

*U ruein fik te möa ta hua*

<sup>6</sup> Be Iesu e ranga mera neien u haharuei teka. “A katuun e ka mei u ruein fik te pusukuia tara kuin grep i tanen. Nonei e na sake ta hua me lagi sakesakena. <sup>7</sup> Ba nonei e poeiena tara katuun te tara kapiiin a kui i tanen, ‘Tara, turu topisa u hiningal alia u lala uama teka timi sake menai ta hua turu ruein fik teka, kaba lia u ma mala sabe ii ta hua. Bara, ngats ban! Nonei e namots hakapa pinopinoena a kannou turu tsiktsiki.’ <sup>8</sup> Ba katunun kui e ranga palisenen me poeiena, ‘A tsi tsunono, haka ban ega ka patubi u töa u hiningal. Ba lia te kaho hahise gen romana bate hakeiegu u tei. <sup>9</sup> Te hua tala nen romana turu hiningal te la nama, e niga nou. Kaba te möa nen, e ngats ba nariou.’ ”

*E Iesu e kato haniga poutsi a töa tahol turu Lan u Göagono*

<sup>10</sup> Turu töa u Lan u Göagono e Iesu e hihatutsia tara töa luman lotu turu Jiu. <sup>11</sup> E ka mei a töa tahol e ka, te ka mei a liliahanei a omi te katoeien me ka mena a siki turu maloto nu töal u hiningal. Nonei e turu nitöa, ema antunan tuol hamatskö ii. <sup>12</sup> Tara pöata te tareia e Iesu nonei a tahol teka, ba nonei e ngöe nen me ranga menen, “A tsi tahol, a siki i tamölö e kapa!” <sup>13</sup> Ba nonei e hatakopena a limanen i tanen ba tahol e tuol sei hamatskö soköna me hatsunonena e Sunahan! <sup>14</sup> Ba tson pepeito tara luman lotu e raharahena e Iesu te

kato haniga pouts menaien a tahol turu Lan u Göagono. Ba nonei e poeiena turu katuun, “Ara e ka mera u tönomo u lan tegi kui meira. Alimiou e tatei la muma nonei tara man lan teka ba siki temi kato haniga poutseier, kaba turu Lan u Göagono e möa!” <sup>15</sup> Ba e Iesu e mar ranga palis mena neien teka, “Alimiou u katuun u gamogamo! Ga limiou e ron la uamiou tara luman bulmakau turu Lan u Göagono bate purese miou a man bulmakau tsi a man rongki i tamilimiou batena haua ramun ramen, boka? <sup>16</sup> Na tahol teka, a töa hatutubunei tere Abraham, e Satan e pile kapiin a tahol teka turu maloto nu töal u hiningal, ema tatei purese ba has nari a tou kits i tanen turu Lan u Göagono?” <sup>17</sup> U ranga palis i tanen e hamatsingoler u pakö hoboto i tanen. Ba u katuun hoboto e sasaala mer a mamanaka a niga te katoeien.

*U haharueina turu ngalin mastet  
(Matiu 13:31-32, Mak 4:30-32)*

<sup>18</sup> Be Iesu e rangatana, “Ime te markato uana a Nipepeito tere Sunahan? Aha te tatei haharuei nanen? <sup>19</sup> Nonei e here nei a ngalin mastet te luena a katuun bate lebe nen tara kui i tanen. Ba nonei te panina, ba u apena temi tö ria tara man kala.”

*U haharueina turu is  
(Matiu 13:33)*

<sup>20</sup> Be Iesu e rangata lenina, “Ta ha lel tego haharuei gono mei lia a Nipepeito tere Sunahan? <sup>21</sup> Nonei e here nei u is. A tahol e luena u is bate sohale neien a töa taram palaua, ba i murinen ba palaua teka te la seinä.”

*A tamana a teki  
(Matiu 7:13-14,21-23)*

<sup>22</sup> E Iesu e la silaia tara man taun na man han, me hihatuts na turu katuun te la uaien i Jerusalem. <sup>23</sup> Ba töa katuun e rangate nen, “O Tsunono, e Sunahan e taguhe nou a topisa puku a katuun?” <sup>24</sup> Be Iesu e ranga palise nen me poeiena turu katuun ti ka gono meien, “Alimiou go torohana hatagalaiam bate sila moua tara tamana a tekteki. Taraha? Alia e ranga mera goulimiou, a katuun a parpara e torohanan tasur romana kaba ema antuna roui. <sup>25</sup> A katuun terena luma e takeina romana bate hapiliena a tamana. Ba limiou tena tuol mia romana ielesala bate ku miou bate poei miou, ‘O Tsunono, kalata berai lam a tamana!’ Kaba nonei e ranga palis ranou limiou romana bate poeiena, ‘Alia ema atei silegi ime te la muma limiou!’ <sup>26</sup> Ba limiou temar ranga palis uamiou romana, ‘Alam u nou na ua gono meiou lö, na lö u hihatuts hasia tara taun i tamulam!’ <sup>27</sup> Kaba nonei e pei lлена romana, ‘Alia ema atei silegi ime te la muma limiou. Laba namou lia, alimiou u katuun hobotora tara markato a omi!’ <sup>28</sup> Alimiou e tare mou romana e Abraham ne Aisak na e Jekop na u propet hoboto te ka ria romana tara Nipepeito tere Sunahan, kaba limiou e lapo ba raria romana ielesala. Ba limiou te tabe hohomi koru miou romana bate kutu hangilngilike miou a liho milimiou. <sup>29</sup> U katuun e la romana rima i pal Iis, Ues, Not, na i Saut, batemi gum ria tara kannou tara Nipepeito tere Sunahan. <sup>30</sup> Hengoiam, u katuun papala ra i romana nori tena pan riou tara pöata, ba pala te panir i romana tena katuun papala riou!”

*E Iesu e taatagir u katunura i Jerusalem  
(Matiu 23:37-39)*

<sup>31</sup> Nonei has tara pöata ba palair u Parasi e la rima me poeier tere Iesu, “Alö go la ban a han teka bate la uaiem tara tana han. Taraha? E Herot e ngilin atung hamate na noulö!” <sup>32</sup> Be Iesu e ranga palis ranen, “La mula batena ranga memiou Herot nonei a katuun a gamogamo, ‘Alia e tsuga ragou u liliahanei u omi na e kato haniga pouts ragou u katuun i romana na i mahö, ba u hatopisana u lan ba lia tena tuku goua tara han te la uagu lia.’ <sup>33</sup> Alia go la noa hasia tara maroro i romana na i mahö na ielisa, batena butu goua i Jerusalem. Taraha? E ma niga nei tegi atung hamate menai a propet tara tana han, egina atung noahasia i Jerusalem.

<sup>34</sup> “A tei Jerusalem, a tei Jerusalem! Alimiou e roron atung hamate ramiou u propet na e titi hatu ramiou u katunun raranga te hala mera mei e Sunahan i tamilimiou. A pöata a para tu ngilin gono mera mei lia limiou i tar bate hatongo kap ragou limiou, temar gono mera nei a keriou u tuna i kopina pakapakanen. Kaba limiou u rama iam!

<sup>35</sup> Ba han i tamilimiou te kaka pukuna romana. Alia e ranga mera goulimiou, alimiou ema tatei tara lele moi lia e antunana te pei moa limiou, ‘A katuun te la nama tara solona a Tsunono ega sasaala!’ ”

## 14

*E Iesu e kato hanigei a katuun turu Lan u Göagono*

<sup>1</sup> Turu töa u Lan u Göagono, e Iesu ena nouia i luma tara töa katuun pan turu Parasi. Ba u katuun

e taratara kap ner ta saha ka tego katoeien. <sup>2</sup> Na e kamei a töa katuun, a mounen na limanen e puku hapan koru me laua nama tere Iesu. <sup>3</sup> Be Iesu e rangata rena u tson hihatuts tara Lo na u Parasi me poeiena, “A Lo i tarara e haniga nena tegi kato haniga pouts menai a katuun turu Lan u Göagono, tsi e möa?” <sup>4</sup> Kaba nori ima ranga nai ta ka. Be Iesu e luena nonei a katuun, me kato haniga poutsenen nen me hala ba nanen. <sup>5</sup> Ba nonei e poeiena i taren, “Ga sanena ta töa i tamilimiou ega ka mei ta pien tson tsi ta bulmakau bate tsirukuna tara kioun ramun turu Lan u Göagono, e hana alimiou ema las sei pouts hase moien turu Lan u Göagono?” <sup>6</sup> Kaba nori ima ranga palise ii u harangata teka.

### *Aragi hala putei a peisarara*

<sup>7</sup> E Iesu e tarer u katuun ti la uama tara kannou teka i ngilin gum lasia turu gungum tara pal kapan. Ba nonei e hala raneien u haharuei teka. <sup>8</sup> “Pöata te ngö mena nei lö a katuun tara kannouna tara hitöl, möa tuna gum ia turu gungum turu tsunono. E möa. Alö ema atei silemi tegi ngö menai ta katuun te pan bala nanoulö. <sup>9</sup> Te markato tala uanouen teka, ba katunun hihanou, te ngö hoboto raiou limiou, te la nama romana bate poeiena i tamölö, ‘Alö go hale ii a makum teka a katuun pan ili.’ Ba lö te matsingolo tala mou batena gum moua tara makum turu katuun papala koru. <sup>10</sup> Kaba tega ngöeia ta katuun alö ba lö te lam tara kannou, ba lö tena gum mia tara makum turu katuun papala koru. Ba katuun te ngöe lalou lö te la nama romana bate ranga menoulö, ‘O hahikapien, alö gomi gum ia tara

makum turu tsunono.’ Te markato uanen teka, ba lö te ka memou a solo pan i matar u katuun hoboto te nou gono merioulö. <sup>11</sup> Taraha? A katuun te hapanena a solonen e hala puteier romana. Na katuun te hala puteiena a solonen, nonei ena luenana romana a solo pan.”

<sup>12</sup> Be Iesu e poeiena tara katuun te ngö meraleien tara kannou, “A pöata te katoe mia lö a kannou, ba lö tema antunan ngö rami u hahikapien i tamölö, tsi u toulamölö, tsi u katuun i tamölö, tsi u katunun moni te atei sil remölö. Taraha? Nori e ngö hase riou lö romana tara kannou i taren bate hamatana poutse rioulö.

<sup>13</sup> Pöata te katoe mia lö a kannou, ngöri u katuun ti möa ta ka, na u tuenrei omi, nu mou omi, na u matakiau. <sup>14</sup> Ba lö te sasaalam romana. Nori ema antunan hamatana poutse roui lö romana. Kaba e Sunahan e hamatane nou lö romana tara pöata te takei pouts ria u katuun u niga tara tou mate.”

### *U haharuei tara kannou pan*

*(Matiu 22:1-10)*

<sup>15</sup> A töa katuun te gum ia tara kannou e hengo a ka teka me poeiena tere Iesu, “A katuun tena nouna romana tara kannou tara Nipepeito tere Sunahan ega sasaala koru.” <sup>16</sup> Be Iesu e poeiena i tanen, “A töa katuun e kato a kannou pan, me ngö rena u katuun u para. <sup>17</sup> Tara pöata tara kannou, nonei e hatataalela a katunun kui i tanen egona tahul rema u katuun bate poeiena, ‘La muma, a pöata hamanasa tara kannou!’ <sup>18</sup> Ba nori hoboto e ramar, me katoeier u mamana u mar ranga tegima la uaien tara kannou. A töa katuun e ranga mei a katunun kui, ‘Alia u holi a töa kui, na lia



ena ngilin tara nagen. Alia e rangate goulö, alö go haniga tegoma la uai lia.’ <sup>19</sup> Ba tai e poeiena, ‘Alia u holi a maloto a bulmakau, na lia ena ngilin torohana ragen. Alia e rangate goulö, alö go haniga tegoma la uai lia.’ <sup>20</sup> Ba tai e poeiena, ‘Alia e hagou hitöl gi, nonei tema antunan la megi lia.’ <sup>21</sup> Ba katunun kui e la poutsuna mena hateie nei a tsunono i tanen a manka teka. Ba torina a tsunono e si koruna me poeiena tara katunun kui i tanen, ‘Hasesei boroboro uu tara man maroro a man kapan na tara maroro a man tetenei iahana taun teka. Ba lö tena lu ramuma u katuun ti möa ta ka, na u tuenrei omi, nu matakiou, na u mou omi, ba lö temi piou ramien i luma i tar.’ Ba katunun kui ena markato has uana teka. <sup>22</sup> E ma manasai ba nonei emi poeiena tara tsunono i tanen, ‘O tsunono, alia e katoe gula a ka te ranga namula lö, kaba a kannou e antuna hasina, a palai gi la noama.’ <sup>23</sup> Ba tsunono e poeiena i tanen, ‘La tala uu tara man maroro pan na man maroro a man tetenei ielesala tara taun, ba lö te las mera mumei u katuun tara kannou. Alia e ngilegu a luma i tar ega saputu. <sup>24</sup> Alia e hateie goulö, e möa ta töa turu katuun ti ngö mam rela tegimi nouia romana tara kannou i tar!’ ”

*Ime temar butun katunun tsitsilo uaier?  
(Matiu 10:37-38)*

<sup>25-26</sup> A katuun a parpara koru i tataala gono mei e Iesu. Ba nonei e habiritsina me poeiena i taren, “A katuun te la uanama i tar ega ngil bala korue ioulia, na u ngil teka ega pan balein u ngil i tanen temar ngil mena neien e tamanen ne tsinanen na tahol i tanen na galapien i tanen, na

u toulanen na u hahinanen na nonei has. Te möa nen, nonei ema antunan katunun tsitsilo uanei i tar. <sup>27</sup> Esi tema antunan söata nanei a kuruse i tanen ema antunan katunun tsitsilo uanei i tar. <sup>28</sup> Tega hakats naia ta töa i tamilimiou tega kui menaien ta luma ta pia, nonei e ha nou? Nonei e gum mam bunou bate hakats nena a lahisa moni te antunenou a luma teka. Ba nonei te hakats has nanou tega antuna uu a moni tega hakapa meien a luma. <sup>29-30</sup> Te möanen, nonei e tanie nou a luma, ba nonei tema antunan hakape noien. Ba eresi te tarer a ka teka te gol sile ren romana bate poeier, ‘A katuun teka e hatanian hatakei a luma, kaba ema antunan hakapa naneien!’

<sup>31</sup> “Na sanena ta töa ta king ega katsin la gono mei u 10,000 tara soldia i tanen, batena hiatatung gono mena a tana king tega ka mei u 20,000 tara soldia, ba nonei te gum mam buna bate hakats nena tega tagala hantuna uaien. <sup>32</sup> Tema antuna neien, ba nonei te hala nena u katunun raranga i tanen bate la kap ner a tana king tara pöata te lehana noa nen, ba nonei te rangata nena tegi antunan hiakaka haniga pouts uaien. <sup>33</sup> Na e markato has uana iesana i tamilimiou a man tötä. Alö go tula ban a mamanaka te ka memölö. Te möa nen, alö ema antunan katunun tsitsilo uamoi i tar.”

*U sol tema mal lel nei  
(Matu 5:13, Mak 9:50)*

<sup>34</sup> Be Iesu e poeiena, “U sol e nigana, kaba te taia na a nimal i tanen, e möa lel ta maroro tegi kato haniga pouts menaien. <sup>35</sup> U mar sol teka ema antunan taguhu nanei u tsiktsiki tsi a man kaan

leba tara kui. Ara e tatei kato baba tuun las naren. A katuun te ka mena u talingan hengo ega hengo!”

## 15

### *U haharuei tara sipsip te taia*

*(Matiu 18:12-14)*

<sup>1</sup> U katunun lulu takis u parpara na palair u katuun u omi i lama memi hahengo ria tere Iesu. <sup>2</sup> Ba u Parasi na u tson hihatuts tara Lo e ranga haraharaha ner e Iesu me poeier, “A katuun teka e kapiena rena u katuun u omi na e nou gono has mera nen!” <sup>3-4</sup> Be Iesu e hatei ra neien u haharuei teka, “Tego ka meia ta töa i tamilimiou a 100 tara sipsip ba töa i taren te taiana, gaha tega katoeien? Nonei ga la bar a 99 sipsip tara makum te ka rien batena sakiene a sipsip te taia, e antunana tego sabe pouts menaien. <sup>5</sup> Pöata tena sabe poutse nen a sipsip te taia, ba nonei te sasaala koruna bate hopöe nen i halahalanen. <sup>6</sup> Ba nonei te söata pouts mena neien i han batena ngö gögono rena u hahikapien i tanen na u katuun te sukusukur bate poeiena i taren, ‘Sasaala gono memoulia. Taraha? Alia u sabe poutsi a sipsip i tar te taia!’ ” <sup>7</sup> Be Iesu e poeiena, “Na lia e ranga mera goulimiou, e markato has uana iesana, i Kolö e sasaala koru has meriou a töa katuun a omi te palis ba nena a man markato a man omi i tanen. Na nisasaala teka e pan bala nanou a markato te sasaala mena rouien a 99 tara katuun a niga.”

### *U haharuei tara moni te taia*

<sup>8</sup> Be Iesu e poeiena, “Ga sanena ta töa ta tahol ga ka mei a maloto a silva moni ba töa te tiana, ga nonei e katoe nou aha? Nonei ega hakulupi

u lam, bate sasaloena a luma i tanen, bate tara haniga koruna tara mamana makum, e antunana tego sabe pouts menaien a moni. <sup>9</sup> Pöata te sabe poutse nouen a moni, ba nonei te ngö gögono rena u hahikapien i tanen na u katuun te sukusukur bate poeiena, ‘Sasaala gono memoulia. Taraha? Alia e sabe poutse gula a moni tu hatie lia.’ ” <sup>10</sup> Be Iesu e poeiena, “Na lia e ranga mera goulimiou, e markato has uana iesana, u angelo tere Sunahan e sasaala koru has meriou a töa katuun a omi te palis banena a man markato a man omi i tanen.”

### *U haharuei tara pien tson te taia*

<sup>11</sup> Be Iesu e poeiena, “A töa katuun e ka mei a huol a pien tson i tanen. <sup>12</sup> Ba hahuoluna a pien e ranga mena e tamanen me poeiena, ‘O Tamar, alö go hale mei lia a manka tu hopö kap bei lö alia ba lia te pile peisa nagen.’ Be tamanen e lu kaakata talena a manka i tanen me hala raneien a huol a pien tson i tanen. <sup>13</sup> Ema mala pina koru ii ba hahuolina a pien te hahol nena a mamananaka hoboto i tanen me luena a moni me la uana tara han i lehana. Ba nonei ena hakapa pinopinoena a moni i tanen tara man markato a man omi te katoeien. <sup>14</sup> Nonei e hihol ba hakapein a man moni hoboto i tanen, ba pan nen a bes e butu hobotona tara han te ka ien, nonei ema ka lel tala mei ta ka. <sup>15</sup> Ba nonei ena kuina tara töa katununa tara han teka. Ba katuun teka e hala mena neien tara makum te kaia a heis poum i tanen, ba nonei ena taratara kap rena u poum. <sup>16</sup> Nonei e bes koru na kannou tena hanou raien u poum e tara hanigan töa. Kaba e möa ta katuun tega haleien ta ka.

<sup>17</sup> “Ba pöata te talesala sil poutseia u hakats i tanen a manka te katoeien, ba nonei e poeiena, ‘U katunun kui tere tamar e ka mer a kannou a para, kaba lia e ka gia teka bate mate koru megu a bes!

<sup>18</sup> Alia e takei gou bate la pouts uagou tere tamar ba lia tena pei gou, O Tamar, alia u kato homi ia i matana e Sunahan na i tamölö. <sup>19</sup> Ema antuna len tale nei alia egi ngö lelei a pien i tamölö. Alö go kato here namei lia a katunun kui i tamölö.’ <sup>20</sup> Ba nonei e takeina me la uana tere tamanen.

“Nonei e ka noaia i lehana be tamanen e tara sabie nen me taatagi koru nanen. Ba nonei e piata uana i tanen mena lukute nen me taatagi koru nanen. <sup>21</sup> Ba pien tson e poeiena i tanen, ‘O Tamar, alia u kato homi ia i matana e Sunahan na i tamölö. Ema antuna tale nei alia gi ngö lelei a pien i tamölö.’ <sup>22</sup> Kaba e tamanen e pei turu katunun kui i tanen, ‘Lue muma u hasobö u niga batemi hasoge mien. Hasesei iam! Ba limiou te hasogo hase miou a ring a goul i kabelenen na u sendol i mounen! <sup>23</sup> Na lue muma a tunan bulmakau a pan haniga koru batemi nase men, ba ra te katoera a kannou pan bate sasaalara. <sup>24</sup> Taraha? A pien tson i tar e here ii a katuun te mate, kaba e töatöa poutsuna. Nonei e tia me butu pouts nama.’ Ba nori e taniau nou talar me sasaalar.

<sup>25</sup> “Turu lan teka a pien tson a hamua e ka noa ma i kui. Ba nonei e gala uanama i han me hengoena u katuun i köma bate sani ria i luma.

<sup>26</sup> Ba nonei e ngöena a töa katunun kui me poeiena, ‘Aha te sasaala mer u katuun?’ <sup>27</sup> Ba katunun kui e poeiena i tanen, ‘E toulamölö e tuku pouts lala na e tamamölö e kato hamate hakape lala a tunan bulmakau a bokoko. Taraha? Nonei e lu poutse

lala a pien tson i tanen na nonei e niga noa hasina.’  
<sup>28</sup> Kaba pien a hamua e raharaha koru me raman tasuna. Be tamanen e lakasa nama me ranga hatamina i tanen. <sup>29</sup> Ba nonei e ranga palisena e tamanen me poeiena, ‘Alia u kui hatagala koruia i tamölö turu mamanu hiningal, na lia u mamala hipus nai u ranga i tamölö. Kaba lö u mamala hale ii lia ta töa ta tunan meme tego nou gono mei lia a man hikapien i tar. <sup>30</sup> Kaba a pien tson i tamölö teka e ba pinopino naia a moni i tamölö turu touhaliou ri maroro! Kaba pöata te la pouts uana men i han, ba lö te kato hamate bemien a tunan bulmakau a bokoko!’ <sup>31</sup> Be tamanen e poeiena i tanen, ‘A tsi pien i tar, alö e ka gono nitöa memou lia, na mamanka hoboto i tar emu manka has lö. <sup>32</sup> Aragi sasaala bate masa korura. Taraha? E toulamölö e here ii a katuun te mate, kaba e töatöa poutsuna! Nonei e tia kaba e la poutsuma!’ ”

## 16

### *A tson pepeito a atein gamo*

<sup>1</sup> E Iesu e pei turu katunun tsitsilo i tanen, “A töa tson moni e ka mei a tson pepeitokap i tanen. Ba tana katuun e hateiena a tson moni, ‘A tson pepeitokap i tamölö e kato baba tuun nena a moni i tamölö!’ <sup>2</sup> Ba nonei a katuun pan e ngöena a tson pepeitokap i tanen me poeiena, ‘Alia e hengo negu a saha ka te katoe mölö? Alö gona koloti tu raranga te hatei noi lia ti mar pepeitokap menai lö a manka i tar. Taraha? Alö ema tson pepeito kap lel uamou ii tar.’

<sup>3</sup> “Ba tson pepeitokap e mar hakats uana teka, ‘A tsunono i tar e tsuge noa lia tara toukui i tar.

Gaha tego kati lia? Alia ema tagala hantunagi tego kaho menai a holö, na lia e matsingolon singo tuun lanegu ta moni. <sup>4</sup> Bara, alia e atei silegu aha te katoe gou lia! Na tego kato menai lia a ka teka, ba u katuun te lu menari lia turu luma i taren tara pöata tega tsugeia lia a tsunono i tar tara toukuin pepeitokap.’ <sup>5</sup> Ba tson pepeito e ngö gögono rena u katuun ti ka mei a haroho tara tsunono i tanen. Ba nonei e rangatena a katuun tutuun, ‘A lahisa tu harohen lö tara tsunono i tar?’ <sup>6</sup> Ba nonei e ranga palis uana i tanen, ‘A 100 taram uelin olip.’ Ba tson pepeito e poeiena, ‘U pepa teka e ka mena u hihase i tamölö. Gum boroboro ba lö te koloto nem u 50.’ <sup>7</sup> Ba tson pepeitokap e rangata lel na tara tai, ‘A lahisa tu harohen lö?’ Ba nonei e ranga palisina me poeiena i tanen, ‘A 100 bek palaua.’ Ba tson pepeito kap e poeiena, ‘U pepa turu hihase i tamölö teka. Alö go kolotein u 80.’ <sup>8</sup> Ba tsunono tara tson pepeitokap e hengo nena a ka teka me ranga sesei koru nanen. ‘Nonei a tson pepeitokap a atein gamo koru.’ U katunura i romana e atein gamo koru rer u katuun, na tara markato teka nori e atei saluhe raier u katunura turu ualesala.”

<sup>9</sup> Be Iesu e poeiena, “Na lia e ranga mera goulim-iou, alimiuu go lueiam a moni i tamilimiuu bate taguhu ramiu u katuun ba nori te kapiena rariu limiuu. A moni e taia nou romana, kaba pöata te mate moa limiuu, ba limiuu te ngö mera roi i Kolö. <sup>10</sup> A katuun te taratara kap haniga nena a manka man tetenei e taratara kap haniga has nena romana a manka man kapan. Na a katuun te kui hagamona tara manka man tetenei e kui hagamo hasna romana tara manka man kapan.

<sup>11</sup> Sanena limiou goma taratara kap haniga nami a manka na i puta teka, gesi te hataratara kap ranei romana limiou a manka man niga hamana? E möa tala. <sup>12</sup> Na sanena limiou goma taratara kap haniga nami a manka tara tana katuun, gesi te hala ranei romana limiou a manka hamatskö i tamilimiu? E möa has.

<sup>13</sup> “E möa ta katunun kui tega antunan kui bei a huol a tsunono. Nonei e ngile nou a töa bate rama nanou a tai. Tsi, nonei e karous nanou a töa bate hengo hanigeiena a tai. Alimiu ema antunan hatsunonemi e Sunahan na moni.”

*A man hihatuts tere Iesu  
(Matiu 11:12-13, Matiu 5:31-32, Mak 10:11-12)*

<sup>14</sup> U Parasi i hengoe a manka teka, ba nori e ranga hahakos ria tere Iesu. Taraha? Nori i ngil korui a moni. <sup>15</sup> Be Iesu e poeiena i taren, “Alimiu e kato here nami a peisa milimiu u katuun u niga i matar u katuun, kaba e Sunahan e atei silena u hakhakats i tamilimiu e omina. Taraha? A ka te panna i matar u katuun e here nei a ka pinopino i matana e Sunahan.

<sup>16</sup> “A Lo tere Mosis na u nikoloto turu propet e tagala hantunaia tara pöata tere Jon a Tsonun Bap-tais. Kaba tara pöata tere Jon te noana i romana, u Bulungana u Niga tara Nipepeito tere Sunahan i hatei lan, ba u katuun hoboto e tagala sil koruer tegi tasu uaien. <sup>17</sup> U kolö na u puta e antunan tia nou romana, kaba a tsi töa a tsi makum tara Lo ema antunan tia noi. <sup>18</sup> A tson te pekoena a hitöl i tanen bate tölena tana tahol, nonei e tsikolona. Na tson te tölena a tahol te peko mami a hitöl i tanen, nonei e tsikolo hasina.”



### *A tson moni ne Lasarus*

<sup>19</sup> Be Iesu e poeiena, “A töa tson moni e roron hasai u hasobö te ka mei a hihol pan, na nonei e noui a kannou a niga turu mamanu lan. <sup>20</sup> Na töa katuun te möa ta ka a solonen e Lasarus i roron hopöeia i rehina tamana tara ololo i matana luma tara tson moni teka. A peisanen e saputi a pi. <sup>21</sup> Nonei e matesil korui tega nou hamasul meien a matsi nouba te rusia turu tebol tara tson moni. Ba u muki temi ramram has ria turu pi i tanen. <sup>22</sup> Ba katuun teka e matena, ba u angelo e söate ren mena hagume rien i rehina e Abraham. Na tson moni e mate has me kaho ner. <sup>23</sup> Nonei ena sagoi a kamits pan i hel, ba nonei e tara seinä me tarena e Abraham i lehana, ne Lasarus e kaia i rehinen. <sup>24</sup> Ba tson moni e kuna me poeiena, ‘O Tamar, O Abraham, alö go taatagi namou lia! Alö go hala nema e Lasarus ba nonei te hapuluse nama a kopuluna a kabelenen turu ramun batemi haboutena a miar. Taraha? Alia e sagohegu a kamits pan koru turu tula teka!’ <sup>25</sup> Be Abraham e poeiena, ‘A tsi pien, alö go hakats pouts hasiin a pöata tu töatöa noaia lö i puta. Alö u lu nitöan a mamana a niga i tamölö i puta, be Lasarus te luena a mamana a omi. Kaba i romana nonei e ka haniga talana teka ba lö te sagohem a kamits. <sup>26</sup> Na tana ka, a töa pannen a sia e ka kap ranou ra. Eresi te karia tara pala teka ema antunan aroho ri, na eresi te karia tara pala i tamölö ema antunan aroho has uarumei i tamulam.’

<sup>27-28</sup> “Ba tson moni e poeiena, ‘E noahasina, o Tamar, kaba alia e ranga hataatagi koru megou lö tego tula menai lö e Lasarus tara luma tere tamar te ka ria a tolima a toular. Ba nonei tena ranga

hatagala mera nen, egi hanei sil nori e namots la has uarima tara hanin kamits teka!’<sup>29</sup> Be Abraham e poeiena, ‘Nori e ka mer a man buku te koloti e Mosis na u propet. A man toulamölö ena tatei hengoe ria u raranga i taren.’<sup>30</sup> Ba tson moni e poeiena, ‘O Tamar, e möa tegi kato menaien romana a ka teka. Kaba tega töatöa poutsia a katuun te mate bate la uana i taren, ba nori te töan hakape riou a man markato a man omi i taren.’<sup>31</sup> Be Abraham e poeiena i tanen, ‘Tema hengoe roien u raranga tere Mosis na turu propet, nori ema hengo hase roi a katuun te mate bate töatöa poutsuna!’ ”

## 17

### *A markato a omi (Matiu 18:6-7,21-22, Mak 9:42)*

<sup>1</sup> Be Iesu e poeiena turu katunun tsitsilo i tanen, “Mamanaka a omi e roron las rena u katuun bate kato homir, kaba a nomi pan e butu noua romana tara katuun te las mena a katuun tara tou hiamus!

<sup>2</sup> Kaba tega kato homieia ta katuun ta töa tara galapien teka te hamana uaier i tar ba pien te kato homina, e niga balana tegi kits menai ta hatu pan i totongolona a katuun teka batena harukue ria i loul! <sup>3</sup> Alimiou go tara kap haniga naiam a peisa milimiou.

“Sanena tega kato homia a hahatoulana i tamölö, alö go ranga hapiou meien. Na tega palis ba naien a markato a omi i torinen, ba lö te hapolasa ba nem a markato a omi i tanen. <sup>4</sup> Te kato homi nen i tamölö tara tohit a pöata turu töa u lan, ba nonei te la uanama i tamölö tara tohit has a pöata bate poeiena, ‘Alia e palis ba negu a

markato a omi i tar,' ba lö te hapolasa hasem a markato a omi te katoeien.”

*A markato turu nihamana*

<sup>5</sup> Bu Aposol e poeier tara Tsunono, “Alö go kato hapane iema u nihamana i tamulam.” <sup>6</sup> Ba Tsunono e ranga palisina me poeiena, “A ngalin mastet e tetenei koruna, kaba e habutena a kaan leba te pan soköna. U nihamana e markato has uana iesana. Noahasina te tetenei koruna u nihamana i tamilimiou, alimiou e tatei ranga noa has mia turu rui teka bate poeiemiou, ‘Alö go takalapama batena taleba pouts moua i tasi,’ ba nonei te kukute hase nou u ranga i tamilimiou!”

*A markato tara tsonun kui*

<sup>7</sup> Be Iesu e ranga lenina me poeiena, “Sanena ta töa i tamilimiou ega ka mei ta tsonun kui bate tara kap nena a kui tsi u sipsip, ba tara pöata tega la uamen i han, ga lö e tatei mar ranga has uaiem teka, ‘Mi nou sokö tala?’ <sup>8</sup> E möa koru! Alö e tatei poeiem i tanen, ‘Alö go nas bema a kannou i tar, bate hapousem u labalaban nas balö te söate muma a kannou i tar bate mi hahalosom, balia te nou bugu. Ba lö te töan nou moto mou.’ <sup>9</sup> A tsunono e haniga hase nou a tsonun kui tega kukute tuun menaien u ranga i tanen? E möa. <sup>10</sup> Na e markato has uana iesana i tamilimiou. Pöata te hakape mia limiou a manka ti ranga merai limiou tego katoeiam limiou, alimiou goma ngilemi tegi hapan merai limiou. Taraha? Alimiou u kato talaseiam a toukui ti hopö kap merai limiou.”

*E Iesu e kato haniga poutsir a maloto a katuun a toba*

<sup>11</sup> Pöata te la uu e Iesu i Jerusalem, nonei e silaia tara maroro i gusuna man provins i Samaria na i Galili. <sup>12-13</sup> Nonei e tukuia tara töa han, ba maloto a katuun a toba e sabie ren. Nori i tuol ia i lehana me kur, “O Iesu! Tsunono! Alö go taatagi ramou lam!” <sup>14</sup> Be Iesu e tara ranen me poeiena i taren, “La mula, ba limiou tena hatara namiou a peisa milimiuu turu pris.” Ba pöata ti la noaien i maroro, ba peisaren e gogosona!

<sup>15</sup> Kaba a töa i taren e tara sabi te gogoso uaien me habirits poutsina me ranga hapanina te hat-sunono menaien e Sunahan. <sup>16</sup> Ba nonei e tuhopö nena i mouna e Iesu me haniga uana i tanen. A katuun teka a toun Samaria. <sup>17</sup> Be Iesu e rangatana, “Alia e kato haniga pouts regula a maloto a katuun. Ga ime te ka ria a tosie?” <sup>18</sup> E möa ta taina ta katuun tega kopisima batemi soloseiena e Sunahan, a töa puku lasi teka a katununa tara tana han?” <sup>19</sup> Be Iesu e poeiena i tanen, “Takei, balö te lam. A nihamana i tamölö te kato haniga poutse lalou lö.”

*A Nipepeito tere Sunahan e butu nama romana  
(Matiu 24:23-28,37-41)*

<sup>20</sup> A palair u Parasi i rangati e Iesu a pöata tega butuma romana a Nipepeito tere Sunahan. Be Iesu e ranga palis ranen me poeiena, “A Nipepeito tere Sunahan ema tatei mar butu uana mei romana tegi tara menaien. <sup>21</sup> E möa ta töa tega poeiuu romana, ‘Tara, a Nipepeito tere Sunahan teka’ tsi, ‘Nonei ili!’ E möa. A nipepeito tere Sunahan e kana i torimilimiuu.” <sup>22</sup> Be Iesu e poeiena turu katunun tsitsilo, “E ka menou a pöata i murimuri te ngilin tara koru namoia limiou alia

turu tōa u lan, alia tu butun Katunuma, kaba alimiou ema tare moi lia. <sup>23</sup> U katuun e poeier romana i tamilimiou, ‘Tara iam, nonei te kanama ili’ tsi, ‘Nonei teka!’ Kaba limiou goma tatei kukute ramien. <sup>24</sup> Pōata te kulupuna u kōasi, u kanaha e roron alesala uana tara mamana makum i kolō. Na e markato has uana romana iesana tara pōata te butu pouts guma lia romana, Alia tu butun Katunuma. <sup>25</sup> Kaba alia ego sagoho mam bi a kamits a para. Ba u katunura i romana te tori tsuga nariou lia. <sup>26</sup> A pōata te la pouts guma lia romana e markato has uana romana te kato uu a pōata tere Noa i manasa. <sup>27</sup> Tara man lan i mam turu uolo pan, u katuun i nou me uar me hitōlur, me noana turu lan te tasuia e Noa tara tolaala. Ba u uolo pan e la nama me atung hamate hobotontōa rena u katuun. <sup>28</sup> Na e markato has uana romana te markato uu a pōata tere Lot. U katuun i nou me uar, me hiholur me haholur, me lebar a man kui me hatakeier u luma. <sup>29</sup> Kaba turu lan te laba naia e Lot a taun i Sodom, bu tula u ahiil e rus here namei a langits i kolō me kato hamate rena u katuun hoboto. <sup>30</sup> Na e markato has uana romana teka tara pōata te butu pouts guma romana lia, Alia tu butun Katunuma.

<sup>31</sup> “I murina nonei turu lan teka, ta katuun tega kaia i oluna a luma e goma koul ii bate tasuna batena luena a manka i tanen. Na katuun has te kana romana tara kui i tanen ema tatei kopis uana mei romana i luma i tanen. <sup>32</sup> Hakats kopis naiam a ka a omi te butuia tara tahol tere Lot. <sup>33</sup> A katuun te peits nena a nitōatōa i tanen ena hatie nen romana. Kaba a katuun te hataia sile nei a nitōatōa i tanen te ngil mena neien lia, nonei ena

sabie nen romana. <sup>34</sup> Alia e ranga mera goulimiou, nonei tara pöata i murimuri a huol a katuun te soho gono ria romana tara töa inana tara bong. A töa e luba ner romana ba tai te kakana. <sup>35</sup> A huol a tahol e kono hoboter romana a kannou. A töa e luba ner romana ba tai te kakana. <sup>36</sup> A huol a tson e kui ria romana i kui. A töa e luba ner romana ba tai te kakana.” <sup>37</sup> Ba u katunun tsitsilo e rangate ren, “O Tsunono, ime tena butu noua a manka teka?” Be Iesu e ranga palisina, “A makum te kana u tuenrei u mate, nonei a makum te gonogono ria u apena te nounouer a ka a koreme.”

## 18

### *A tahol a amoaba na tsonun ona*

<sup>1</sup> Be Iesu e hatei ranei u katunun tsitsilo u haruei teka, u hihatutsuna tegi singo nitöa uaien tere Sunahan batema sökanari. <sup>2</sup> Ba nonei e ranga mera nen, “Tara töa taun, a tsonun ona e ka. A katuun teka ema tatei matoute ii e Sunahan nema tara marei has rai u katuun. <sup>3</sup> A töa tahol a amoaba e kaia tara taun teka e roron lala uu i tanen bate poeiena, ‘A katuun te paköe noulia e ngilin kato homie noulia. Alö go taguhe moulia.’ <sup>4</sup> A katuun pan teka ema mala hengo koru ii tara pöata a ngangaha koru, kaba i murinen ba nonei e poeiena i tanen pouts, ‘Alia ema matoutegi e Sunahan, na lia ema tara marei has rai u katuun. <sup>5</sup> Kaba tahol a amoaba teka emi roron ranga nitöana. Bara, alia e taguhe goien turu kout. Taraha? Nonei e namots la nitöa nama bate kato hasökanena a peisar.’ ”

<sup>6</sup> Ba Tsunono e ranga lenina me poeiena, “Alimiou go hengoeiam u raranga te kati a tsonun

ona a omi teka. <sup>7</sup> Ga e Sunahan ema taguhu ranoui romana u katuun hamatskö i tanen te singo nitöa uaier i tanen tara lan na bong? Nonei e taguhu boroboro koru ranouen batema antunan hahaloso nei. <sup>8</sup> Alia e ranga meragou limiou, nonei e kato hakapa boroboro tune nou u kout i taren. Kaba pöata te la pouts guma lia romana i puta, alia tu butun Katunuma, alia e sabe has ragou u katuun te hamanar?”

*A Parasi na tson lulu takis*

<sup>9</sup> E Iesu e hatei hasiin u haharuei teka turu katuun ti pei nori te matskör bate sigala raier a palair u katuun. <sup>10</sup> Ba nonei e poeiena, “A huol a katuun i sei uu tara Luman Lotu Pan mena singor. A töa a Parasi, na tai a lulu takis. <sup>11</sup> A Parasi e tuol pepeisa me mar singo uana teka, ‘O Sunahan, alia e haniga uagu i tamölö te namala kato homi uagi lia te kato uaier a palair u katuun. Alia ema kopkop gi, nema gamogamo gi, nema tsikolo gi. Na lia ema kato homi has uagi te markato uana a lulu takis i tioum. <sup>12</sup> Turu huol u lan iahana u mamamu wik alia e roron agono negu a kannou, na tara moni i tar alia e roron hale gilö a hamalotona a makum.’ <sup>13</sup> Kaba a tson lulu takis e tuol ma i lehana me tötörököna. Ba nonei e mukumukeiena a lumlumanen te taatagi uaien me poeiena, ‘O Sunahan, alö go taatagi namoulia a katuun a omi.’ ” <sup>14</sup> Be Iesu e poeiena, “Alia e ranga mera goulimiou, a katuun teka te matsköna i matana e Sunahan tara pöata te la pouts uaien i han, kaba a Parasi e möa. A katuun te hala seiena a peisanen ena hala putei riou. Na katuun te hala puteiena a peisanen ena hala seie riou.”

*E Iesu e kalaler a matsi galapien  
(Matiu 19:13-15, Mak 10:13-16)*

<sup>15</sup> U katuun e mi piou raia a galapien u göama tere Iesu ba nonei e sebele ranen. Ba u katunun tsitsilo e tarer a ka teka me ranga hapiou raren.

<sup>16</sup> Kaba e Iesu e ngö merai a galapien i tanen me poeiena turu katunun tsitsilo, “Haka raiam a galapien egi la uama i tar. E möa tego hapiou mera mien limiou. Taraha? A Nipepeito tere Sunahan e ka uana turu mar katuun teka. <sup>17</sup> Alia e hatei hamana ragou limiou, a katuun tema hengo hanige nei u raranga tere Sunahan temar hengo haniga uana a pien, nonei ema antunan tasu noi tara Nipepeito tere Sunahan.”

*A tson moni  
(Matiu 19:16-30, Mak 10:17-31)*

<sup>18</sup> Ba töa katuun pan turu Jiu e rangatena e Iesu, “O Tson Hihatuts a niga, aha tego kati lia bate luegou a nitöatöa te ka nitöana?” <sup>19</sup> Be Iesu e ranga palis uana i tanen, “Aha te ngö sile milö alia a katuun a niga? E Sunahan lasi te nigana. <sup>20</sup> Alö e atei silem a man lo tere Sunahan. Hena: ‘Alö goma tsikolo ii. Alö goma hipuli ii. Alö goma kop ii. Alö goma gamogamo ii. Alö go hapani e tamamölö na e tsinamölö.’” <sup>21</sup> Ba katuun e poeiena, “Alia u kukuti a man lo teka e taniama tu tetenei noa ma lia.” <sup>22</sup> Pöata te hengoeia e Iesu a ka teka, ba nonei e poeiena i tanen, “A töa patu a ka tego kati lö. Alö go haholin a manka hoboto i tamölö bate hala rami u katuun ti möa ta ka. Ba lö te ka memou romana a mamanaka a niga i Kolö. Ba lö te töan kukutie mumou lia.” <sup>23</sup> Kaba pöata te hengo naia a katuun a ka teka, ba nonei e tara hataatagi koruna. Taraha?



Nonei e ka mei a moni a parpara koru. <sup>24</sup> E Iesu e tari te taatagi uaien me poeiena, “U katunura tara moni e ka mer romana a toukui pan tegi tahongo uaien tara Nipepeito tere Sunahan! <sup>25</sup> E palpal koruna tega tasu uu a katunun moni tara Nipepeito tere Sunahan, temar palpal has uana a kemol te katsin sipina tara tabutu tara salum.” <sup>26</sup> Ba u katuun ti hengo e rangatar, “Gesi len te antunan tasuna?” <sup>27</sup> Be Iesu e ranga palisina, “A ka tema antunan kato nanei a katuun e Sunahan e antunan kato nanen.” <sup>28</sup> Be Pita e poeiena, “Tara! Alam u laba nema a han i tamulam me kukutie mumoulö.” <sup>29-30</sup> Be Iesu e poeiena i taren, “Alia e ranga hamana mera goulimiou, a katuun te kato hatagala silena a Nipepeito tere Sunahan bate laba nena a luma i tanen tsi a tahol i tanen tsi u hatoulana i tanen tsi e tamanen tsi e tsinanen tsi a galapien i tanen, nonei e luena romana a ka a para koru lel tara mankana i romana, bate lu hase nou a nitöatöa te ka nitöana tara man pöata te la nama.”

*E Iesu e ranga hatopisein a tou mate i tanen  
(Matiu 20:17-19, Mak 10:32-34)*

<sup>31</sup> Be Iesu e lu halhal rena a maloto na huol a katunun tsitsilo i tanen me poeiena, “Hengoiam! Ara e la uara i Jerusalem, na mamanaka ti kolotein u propet tega butuia i tar e butu hamana noua i Jerusalem. <sup>32</sup> Taraha? Alia ena hala naroua turu katuun tema Jiu ri, ba nori te hahakos ria romana i tar bate kato hohomie riou lia bate kahus has nariou lia. <sup>33</sup> Nori e lahuse riou lia romana bate atung hamate riou lia. Kaba turu hatopisana u lan ba lia te takei pouts gou.” <sup>34</sup> Kaba u katunun tsitsilo ima atei sile ii a manka teka. A mouna u

raranga teka i hamous ba raien, na nori ima atei sile ii a ka te rangein e Iesu.

*E Iesu e kato hanigei a katuun a matakiou  
(Matiu 20:29-34, Mak 10:46-52)*

<sup>35</sup> Pöata te sukusukuia e Iesu tara taun i Jeriko, a töa katuun a matakiou e gum ia i rehina a maroro bate singo la nena ta moni. <sup>36</sup> Pöata te hengoeien ti la karasa uu katuun u parpara koru ba nonei e rangatana, “Aha teka?” <sup>37</sup> Ba u katuun e ranga uaier i tanen, “E Iesu na i Nasaret te la karasana.” <sup>38</sup> Ba nonei e kuna, “O Iesu! A hatutubunei tere Devit! Alö go taatagi namoulia!” <sup>39</sup> Ba u katuun ti mam e raharahe ren me poeier, “Alö go kakamoto!” Kaba nonei e ku hapan koru lel, “A hatutubunei tere Devit! Alö go taatagi namoulia!” <sup>40-41</sup> Be Iesu e tuoluna me ranga nena a katuun a matakiou egimi piou naia i tanen. Pöata te la hasusuku men, be Iesu e rangate nen, “Aha te ngile mölö tego kato bei lia alö?” Ba nonei e ranga palisina, “O Tsunono, alia e ngilin taragu.” <sup>42</sup> Be Iesu e poeiena i tanen, “Bara, alö go tara pouts! A nihamana i tamölö te kato haniga poutse noulö.” <sup>43</sup> Ba nonei tara tsi pöata puku has teka ba nonei e tara poutsuna, me kukutiena e Iesu me haniga uana tere Sunahan. Ba pöata ti tareia u katuun a ka teka, ba nori e soloseier e Sunahan.

## 19

*E Iesu na e Sakias*

<sup>1</sup> E Iesu e la silaia iahana taun i Jeriko me la sokö uana i hapala. <sup>2</sup> Na töa katuun a solonen e Sakias a tson mammam turu katunun lulu takis, nonei

e ka has mei a moni a parpara. <sup>3</sup> Nonei e ngilin tari e Iesu, kaba nonei e makmakum koru mema antunan tara na neien taraha, a katuun a parpara koru. <sup>4</sup> Ba nonei e piata mam rena u katuun mena seinu turu ruein fik u pannen tego tara menaien e Iesu. Nonei e atei sil e Iesu ega sila ma tara makum teka. <sup>5</sup> Pöata te butuia e Iesu tara makum te kaien ba nonei e tara seinu me poeiena tere Sakias, “O Sakias, koul boroboroma. Alia ena ka goua i luma i tamölö i romana.” <sup>6</sup> Be Sakias e koul boroboroma me peigi mena nei e Iesu i luma i tanen me sasaala koruna. <sup>7</sup> Ba u katuun ti tari a ka teka e tanian ranga haraharaha hobotor, “A katuun teka ena kana tara luma tara katuun a omi!” <sup>8</sup> Be Sakias e tuoluna me poeiena tere Iesu, “O Tsunono! Alia e hala kata hamanasa nagou a manka i tar turu katuun ti möa ta ka! Na tu hagamo naia lia ta ka tara tana katuun, alia e palis poutse goen a tohats a pöata!” <sup>9</sup> Be Iesu e poeiena i tanen, “I romana e Sunahan e lu pouts hakapa ralala u katuun tara luma teka. Taraha? Alö e mar hamana uaiem temar hamana uu e Abraham. <sup>10</sup> Na lia tu butun Katunuma u la silema tegomi sake merai u katuun ti taia bate lu pouts ragen.”

*U haharuei tara maloto a tson pepeito kap  
(Matiu 25:14-30)*

<sup>11</sup> Pöata ti hahengo nouaia u katuun tere Iesu, be Iesu e ranga nena u haharuei teka. Taraha, Nonei e susuku hakapaia i Jerusalem, na nori i hakatsin a Nipepeito tere Sunahan e katsin butu hamanasa. <sup>12</sup> Ba nonei e poeiena, “A töa katuun pan e katsin la uu tara han i lehana tegina haking menaien me la pouts uanama i han. <sup>13</sup> Kaba i mam te laien, ba

nonei e ngö gögono rena a maloto a katunun kui i tanen me hala raneien a maloto a maina moni.\* Ba nonei e ranga mera nen, 'Alimiou e kui memou a moni teka e popona tena la pouts guma romana lia.' <sup>14</sup> Kaba palair u katuun tara han i tanen i tori homi koru naien, ba nori e hakukutie lila u katunun sösöata ranga eginanga rangaia tara han te kaien, 'Alam e rama nem a katuun teka ega king raiou lam.' Kaba nonei ena butun king noa has.

<sup>15</sup> "Ba katuun pan teka tina hakingi e kopis pouts nama. Pöata te tuku poutsien i han ba nonei e hangö gögono rena u katunun kui i tanen te hala raien a moni egi butu hoboto uama i matanen ba nonei te sakienga a lahisa moni ti lueien. <sup>16</sup> Ba katunun kui tutuun e la nama me poeiena, 'O tsunono, alö u halei lia a töa maina moni, na lia u lu leli a tana maloto a maina moni tara moni tu halei lö alia!' <sup>17</sup> Ba katuun pan e poeiena i tanen, 'Alö u kato haniga. Alö a katunun kui a niga! Alö u tara kap haniga korur a manka man tetenei. Ba lia te hale goi lö a nitsunono ba lö te tara kap nem a maloto a taun!' <sup>18</sup> Ba hahuoluna katunun kui e la nama me poeiena, 'O Tsunono, alia u lu leli a tana tolima maina moni tara moni tu hala nilö.' <sup>19</sup> Ba katuun pan e poeiena i tanen, 'Alö e tsunono nem romana a tolima taun.' <sup>20</sup> Ba tana katunun kui e la nama me poeiena, 'O Tsunono, a maina moni i tamölö teka. Alia u hamouseien tara makumun labalaba. <sup>21</sup> Alia u matouteiou lö. Taraha? Alö e roron hakui hatagala koru rem u katunun kui i tamölö. Na lö e roron luem a hihol tara toukui tara palair u katuun.' <sup>22</sup> Ba katuun pan

---

\* **19:13:** A töa maina moni e antunaia tara hihol tara topisa tsihou.

e poeiena i tanen, 'Alö a katunun kui a omi! Alia e kout megoi lö a man ranga pouts i tamölö! Alö e atei silem alia e roron hakui hatagala koru regu u katuun, na lia e roron lu hasegu a hihol tara toukui tara tana katuun. <sup>23</sup> Gaha tu ma haka naiälö ta moni i tar tara luman moni, ba lia te tatei lu pouts gono megien ta tana ta moni tara pöata tego kopis pouts malia?' <sup>24</sup> Ba katuun pan e poeiena tara pala ti tuol hasukusuku, 'Luba nami a katuun teka a maina moni bate halemi a katunun kui te ka mena a maloto a maina moni.' <sup>25</sup> Ba nori e poeier i tanen, 'O Tsunono, nonei e ka has mena a maloto a maina moni!' <sup>26</sup> Ba nonei e ranga palisina, 'Alia e ranga mera goulimiou, a katuun te ka mena a huhua tara toukui i tanen e hala hase roui a maroro tega kui menaien ta huhua lel. Kaba katuun te möa ta huhua tara toukui i tanen e luba noa has naroui a matsi ka pinopino te ka menen. <sup>27</sup> Na nori u pakö i tar te rama ner tego king meraien lia, lu mera mumei teka bate atung hamate ramen i matar!' "

*E Iesu e tuku here ii a king i Jerusalem  
(Matiu 21:1-11, Mak 11:1-11, Jon 12:12-19)*

<sup>28</sup> E Iesu e mar ranga uu teka me mam rena u katuun i tanen me la sei uana i Jerusalem. <sup>29</sup> Nonei e la hasukusukuia tara man han i Betpats na i Betani ti kaia i rehina u Pokus tara Ruein Olip, ba nonei e hamam rena a huol a katunun tsitsilo. <sup>30</sup> Me poeiena i taren, "Alimiou go la uamula tara han te ka nama ili, ba pöata tena tuku moa limiou ba limiou tena sabie mou a töa rongki a hitots ti kits kapiin na ti mamala osa noaia. Ba limiou te purese mumen batemi piou namen teka. <sup>31</sup> Te rangata noua ta katuun, 'Aha te purese sile mien

limiou,' ba limiou te hatei men, 'A Tsunono e ngile namen.' ”

<sup>32</sup> Ba huol a katuun e lar mena sabier a manaka e marka has uu temar ranga uala e Iesu.

<sup>33</sup> Tara pöata ti pureseien a rongki ba u katuun terera rongki e poeier i taren, “Aha te purese sile milimiu a rongki?”

<sup>34</sup> Ba nori e ranga palisir me poeier, “A Tsunono e ngile namen.” <sup>35</sup> Ba nori e mi piou naria a rongki tere Iesu me haholase ria a man hasobö pan i taren tara rongki me hose ria e Iesu i tanen.

<sup>36</sup> Pöata te osaia e Iesu tara rongki ba rongki e tataala menen, ba u katuun e haholaseier a man hasobö pan i taren tara kalana. <sup>37</sup> Ba pöata te tukuien tara maroro te la puta uu turu Pokus tara Ruein Olip te kaia i rehina i Jerusalem, ba u katuun u parpara koru i tanen e tanian köma hapan uaier tere Sunahan me solosei merien a man mirakol ti tareien. <sup>38</sup> Ba nori e poeier:

“Kalaleiam a king te la menama a solo tara Tsunono!

A masalohana ega kaia i Kolö, na solona e Sunahan ega pan koru!”

<sup>39</sup> Ba palair u Parasi i gusur u katuun e poeier tere Iesu, “Tson Hihatuts, alö go hakakamoter u katunun tsitsilo i tamölö.” <sup>40</sup> Ba e Iesu e ranga palisina, “Alia e hatei ragou limiou, te kakamoto roua u katuun teka ba u marats te ku riou!”

### *E Iesu e tabe sil i Jerusalem*

<sup>41</sup> E Iesu e la hasukusuku uu i Jerusalem, ba pöata te tareien a taun ba nonei e tabe sile nen.

<sup>42</sup> Ba nonei e poeiena tara taun teka, “Sanena limiou tu atei sileiam a ka te habutena a masalohana, i romana noa has, e Sunahan sane hala

raneilimiou a masalohana. Kaba a ka teka e mous ba tala ranou limiou ba limiou tema antunan tare mien. <sup>43</sup> A pöata e la nama, ba u katuun te pakö rariou limiou temi ololo hahis rariou limiou ba nori temi hatukap rariou limiou romana tara mamana makum. <sup>44</sup> Ba nori te kato rure riou romana a han i tamilimiou bate kato hohomi has rariou limiou na galapien has i tamilimiou te ka roua iahana taun. Na e möa nou ta marats tara ololo tego kaia romana i ieluna tai. Taraha? Alimiou uma tara marei mi a pöata te la silema e Sunahan egomi taguhu raiou limiou!”

*E Iesu e tsugar u katuun ti hahol ia tara Luman Lotu Pan*

*(Matiu 21:12-17, Mak 11:15-19, Jon 2:13-22)*

<sup>45-46</sup> Be Iesu e tasuna tara Luman Lotu Pan me tanian tsuga rena u katunun hahol, me poeiena i taren, “U raranga tere Sunahan i koloto naia turu Buku u Göagono e poeiena, ‘A luma i tar, a luman singo.’ Kaba limiou e kato here tsipon namien a kioun mous turu kopkop!” <sup>47</sup> E Iesu e hihatuts ia tara Luman Lotu Pan turu mamanu lan. Ba u pris pan na u tson hihatuts tara Lo na pal kapan turu Jiu e ngilin atung hamate naren. <sup>48</sup> Kaba nori ima sabe ii ta maroro tegi markato menaien. Taraha? U katuun hoboto i hengo nitöaia tara man raranga i tanen.

## 20

*Ime te lama a nitsunono tere Iesu?*

*(Matiu 21:23-27, Mak 11:27-33)*

<sup>1-2</sup> Turu töa u lan, e Iesu e kaia tara Luman Lotu Pan me hatuts rena u katuun me hatei raneien u Bulungana u Niga. Ba u pris pan na u tson

hihatuts tara Lo na u tsunono e la rima me mi poeier i tanen, “Hatei ramou lam, alö e ka mem a saha nitsunono ba lö te katoeiem a manka teka? Esi te hale ii lö a nitsunono?” <sup>3-4</sup> Be Iesu e ranga palis ranen, “Alia e rangata has ragoui limiou u töa u harangata. Alimiou go hateie mumou lia, ime te lueia e Jon a nitsunono tega baptais meraien u katuun? Tere Sunahan, tsi tara katuun tuun?” <sup>5</sup> Ba nori e hiararanga pouts ria i taren pouts me poeier, “Te pei rouara, ‘E Jon e ka mei a nitsunono tere Sunahan,’ be Iesu te pei nou i tarara, ‘Ga ha tsiponi tu ma hamana memi limiou e Jon?’ <sup>6</sup> Na te pei rouara, ‘E Jon e ka mei a nitsunono tara katuun,’ ba u katuun hoboto te titi hatu rariou ra. Taraha? Nori e hamana koruer e Jon a töa propet tere Sunahan.” <sup>7</sup> Ba nori e ranga paliser e Iesu, “Alam ema atei silemi ime te lama a nitsunono tere Jon.” <sup>8</sup> Be Iesu e poeiena i taren, “Na lia has ema hatei ragou ii limiou esi te hale mei lia a nitsunono balia te katoegu a man toukui teka.”

*U haharuei turu katuun u omi ti taratara kapiin a kuin grep*

*(Matiu 21:33-46, Mak 12:1-12)*

<sup>9</sup> Be Iesu e ranga mera nei u katuun u haharuei teka, “A töa katuun e lebei a kuin grep, be hataratara kap raneien u tsonun kukui grep me hakuin moni nanen, ba hapalana moni e la uana tara katuun terena kui. Ba nonei e la uana tara töa han i lehana mena keiena a pöata a ngahangaha koru. <sup>10</sup> Ba i murinen, te tangohoia a kui, ba nonei e hala mena nei a tsonun kui i tanen tara pal tson ti kui ia tara kuin grep. Nonei e ngilin lui ta tsi pala i tanen. Kaba nori i atungeien me tsuge ren ba



nonei e lala puku poutsuna. <sup>11</sup> Ba katuun terena kui e hala lelana a taina tson kui i tanen, ba nori e atung lel hase ren, me hamatsingole ren, ba nori e hala pukpuku poutse ren. <sup>12</sup> Ba katuun terena kui e hala lel nena a hatopisana a tsonun kui, ba u katunun taratarakap e kato hakamkamits hase ren me tsuge ren.

<sup>13</sup> “Ba katuun terena kuin grep e poeiena, ‘Aha tego kati lia? Alia e hala nagou a pien tson a tsomi i tar. Nori e tatei tara mareie rouen.’ <sup>14</sup> Ba nonei ena tukuna tara kuin grep. Nori a pal tson u omi i tareien me hiararanga, ‘A pien tara katuun terena kui teka te lue nou romana a kuin grep. Aragi atung hamatieien, ba kuin grep i tanen te ka uanou i tarara!’ <sup>15</sup> Ba nori e lapo ba naren tara kui me atung hamatie ren.”

Be Iesu e rangatana, “Ga katuun terena kui e katoe nou aha turu katuun u omi teka? <sup>16</sup> Nonei e la nama romana batemi atung hamate ranen, bate hala mena nei romana a kuin grep turu katuun u niga.” Ba pöata ti hengo naia u katuun a ka teka ba nori e poeier, “U katuun egima tatei kato homi uai teka!” <sup>17</sup> Kaba e Iesu e tara uu i taren me poeiena, “Alimiou go hakats naiam u raranga turu Buku Göagono te kato here nanei lia a marats. E markato uana teka:

‘A marats ti raman u katunun hatakei luma bate hapiraka ba ner,

nonei a marats te niga balana tara toukuin luma.’

<sup>18</sup> “U katuun hoboto te tsia roua tara marats teka e taptapeko riou. Kaba te konena romana a marats teka ta katuun, ba nonei te kono bulbul here nanoien u köahu!”

*A takis tere Sisa  
(Matiu 22:15-22, Mak 12:13-17)*

<sup>19</sup> U tson hihatuts tara Lo na u pris pan i ngilin pile kap hamanasein e Iesu. Taraha? Nori i atei sil e Iesu e saka raien u haharuei teka, kaba nori i matoutir u katuun. <sup>20</sup> Nori i tara kap nitöa nen me hol raier u katuun u gamogamo me hala hamous rari men tegimi tara kap menaien. U katuun teka i gamo me katoeier u harangata u parpara tere Iesu. Nori i ngil e Iesu ega kato tu ranga tegi kout meien bate hala naren tara nitagala tere gamman. <sup>21</sup> Ba nori e rangate ren me poeier, “O Tson Hihatuts, alam e atei silem alö a katununa turu mana. Alö e roron hihatuts hamana nem a maroro tere Sunahan. Taraha? Alö e mamala hakats silemi a nikapan turu katuun. <sup>22</sup> Bara, alö go ranga mera moulam, e niga hasina tara Lo i tarara tegi takis uu ra tere Sisa, tsi e möa?” <sup>23-24</sup> Kaba e Iesu e atei sil u gamo i taren me poeiena, “Hatara nemuma ta denarius moni. A bakune si na solone si te kana i tanen?” Ba nori e ranga palisir, “E Sisa.” <sup>25</sup> Be Iesu e poeiena, “Bara, halemi e Sisa a manka tere Sisa, bate hala hasemi e Sunahan a manka tere Sunahan!” <sup>26</sup> Nori ima antunan kout mei e Iesu tu töa tu ranga tu omi teka i matar u katuun, ba nori e asingoto koru ner te ranga palis haniga uaien me kakamotor.

*Pöata te töatöa pouts ria romana u katuun  
(Matiu 22:23-33, Mak 12:18-27)*

<sup>27</sup> U palair u Sadiusi i la uama tere Iesu. Nori u katuun ti pei e möa ta tou takei pouts tara tou mate. <sup>28</sup> Ba nori e poeier tere Iesu, “Tson Hihatuts, e Mosis e mar koloto menai a Lo teka i manasa: ‘Te mate ba nena a tson a tahol i tanen bate möana

ta pien, e toulanen ega töli a amoaba ba nori te hatuhaner ta pien ga butu be a tson te mate.’  
<sup>29</sup> Bara. E kamei a tohit u mun toulana i ka. Ba hamua e hitöluna, me matena kaba ema hatuhane ii ta pien. <sup>30</sup> Ba hahuol e töllelena a tahol a amoaba mena mate hasina bate möa noahasina ta pien. <sup>31</sup> Te mar kato has uaien tara hatopisa na turu munmun toulana hoboto teka. Nori i mate hoboto bate möar ta pien. <sup>32</sup> Ba i murinen ba tahol e mate hasina. <sup>33</sup> Na tara pöata te takei pouts ria romana u katuun tara tou mate i taren, ga tahol teka e tahol koru uana romana teresi? Taraha? A tohit hoboto u muntoulana ti töleien!”

<sup>34</sup> Be Iesu e ranga palis ranen, “A pal tson na touhaliou e hitöl ria i puta teka. <sup>35</sup> Kaba pal tson na touhaliou te haniga rena e Sunahan te tatei takei poutsur romana tara pöata i murimuri, nori ema hitölri romana. <sup>36</sup> Na nori ema mate lel has roui romana. Taraha? Nori e here roui u angelo tema tatei materi. Nori a galapien tere Sunahan te hatakei raria romana tara tou mate. <sup>37</sup> Na e Mosis e haröto haniga koruni te takei pouts uaiier romana u katuun ti mate bate töatöar. Turu raranga turu Buku u Göagono e hatei nena u ruei te kulupu, e Mosis e rangein a Tsunono me ngöe neien, ‘E Sunahan tere Abraham, ne Sunahan tere Aisak, na e Sunahan tere Jekop.’ <sup>38</sup> A ka teka e ranga nena nonei e Sunahan uana turu katuun te töatöar. E ma Sunahan uanei turu katuun u mate. Taraha? I matana e Sunahan, nori hoboto e töatöa noar.” <sup>39</sup> Ba palair u tson hihatuts tara Lo e ranga palisir me poeier, “U ranga palis u niga, o Tson Hihatuts!” <sup>40</sup> Nori i raman rangata lele ii e Iesu tu harangata.

*E Mesaia a pien teresi?*

*(Matiu 22:41-46, Mak 12:35-37)*

<sup>41</sup> Be Iesu e poeiena i taren, “Gaha te poei sila naria e Mesaia a hatutubunei tere Devit? <sup>42-43</sup> E Devit noa has te poei turu buku turu Sam:

‘A Tsunono e poei tara Tsunono i tar,

Gum ia tara pal matou i tar,

e antunana te katoe goii lia u katuun te paköe riou lö

u kaan tötö i tamölö.’

<sup>44</sup> “E Devit e ngöe ii e Mesaia ‘A Tsunono.’ Gime temar hatubuna uana e Mesaia tere Devit?” Kaba e möa ta katuun tega ranga palis.

*Hanei sil raiam u tson hihatuts tara Lo*

*(Matiu 23:1-36, Mak 12:38-40)*

<sup>45-46</sup> Pöata ti hengo hobotoia u katuun i tanen, be Iesu e poeiena turu katunun tsitsilo i tanen, “Hanei sil raiam u tson hihatuts tara Lo. Nori e ngilin hula la nitöa meier u hasobö pan u ngahangaha i taren, bate ngil koruer u katuun egi hapan raien tara töana. Na nori e ngil koru haser egi gum ia turu gungum u niga i matar u katuun iahana luman lotu na turu gungum has tara pal kapan tara kannou. <sup>47</sup> Nori e roron katoeier u singona turu lotu u ngahangaha turu rung tuun, bate lu tsipon beri a peisaren a manka turu amoaba. Kaba nori e lueier romana a nihahuna pan koru.”

## 21

*A tsi moni te halan a amoaba*

*(Mak 12:41-44)*

<sup>1</sup> E Iesu e tara me tarena u katunun moni bate honger a monin hitaguhu i taren tara bokisin

moni turu lotu. <sup>2</sup> Na nonei e tara has ba töa tahol a amoaba te möa koru ta ka te hongena a huol a toea. <sup>3</sup> Ba nonei e poeiena, “Alia e ranga mera goulimiou, a amoaba teka te möa koru ta ka e hala nelala a moni te para bala lala tara man moni te hala nelila u katuun. <sup>4</sup> Taraha? Nori e hala lila turu moni te kurapana tara moni i taren, kaba nonei e hala nelala a matsi moni hoboton töa i tanen.”

*A Luman Lotu Pan e rure riou  
(Matiu 24:1-2, Mak 13:1-2)*

<sup>5-6</sup> Ba palair u katunun tsitsilo e ranga siler a Luman Lotu Pan me poeier, “Taraia man marats a man niga na manka man tara haniga ti hala menai u katuun tara luma tere Sunahan!” Ba e Iesu e poeiena, “Hakats naiam a manka te tare milimiou. A pöata te la nama e möa koru nou ta töa ta marats tego ka lelia romana tara makum i tanen. Nori hoboton töa e lapo ba raria romana i puta.”

*A pöata a omi koru  
(Matiu 24:3-14, Mak 13:3-13)*

<sup>7</sup> Ba nori e rangate ren, “Tson Hihatuts, i hangisa te lapo baba naria romana u marats teka? Na u saha u hiharöto te haröto nena romana a pöata te butuna romana a ka teka?” <sup>8</sup> Be Iesu e poeiena, “Hanei iam, u katuun e namots gamo rariou limiou. Taraha? A katuun a parpara ena la rima romana bate ngöe roui a peisaren a solor batemi poeier, ‘Alia e Mesaia,’ na ‘A pöata hamanasa!’ Kaba ma kukute rami. <sup>9</sup> Alimiou e hengo namiou romana a man hiatatung na man pula, kaba ma matoutmi. A manka teka e butu mamuna romana,

kaba ema pei nei a kapakapana pöata e susukuna.”  
<sup>10</sup> Ba nonei e ranga lel noa hasina me poeiena, “A töa han ena hiatatung gono mena romana a tana han, na palair a man hun katuun e hiapulpular romana. <sup>11</sup> Na man nun pan koru e butu riou, na bes pan na mamana mar nomi pan e butu romana ria tara mamana han a parpara. A manka te hamatout rena u katuun e butuna romana, na man hiharöto hasina i kolö. <sup>12</sup> Kaba i mamina te butu noua a manka teka, ba limiou te pile kap rariou bate kato hohomi pinopino rariou. Alimiou e kout raria romana iahana a man luman lotu turu Jiu bate haka raria tara karabus. Na limiou e lu merari romana i matar u king na turu gamman te hamana uami limiou i tar. <sup>13</sup> Na nonei has a pöata teka tegona ranga namia limiou u Bulungana u Niga. <sup>14</sup> Hahengoiam! Alimiou goma hakhakats hapara mam nami tu raranga tegona ranga palis naiam romana limiou. <sup>15</sup> Taraha? Alia e hala ragi limiou romana a man raranga nu hakhakats u niga koru, ba u pakö i tamilimiou tema antunan tulaputa nari romana u raranga tego hala rilia limiou. <sup>16</sup> A pal katuun pouts i tamilimiou, u tamamilimiou nu tsinamilimiou nu toulamilimiou nu hahikapien i tamilimiou e hala raroua romana limiou turu pakö. Na palai i tamilimiou e kato hamate raier romana. <sup>17</sup> U katuun hoboto e omi rariou limiou romana te katuun uami limiou i tar. <sup>18</sup> Kaba e möana romana tu töa tu hulu tega taia ia romana i baku milimiou. <sup>19</sup> Alimiou go tuol hakarapoto sile iam a Tsunono ba nonei te lu pouts ranou limiou romana.”

*E Iesu e rangein te tia uana romana i Jerusalem  
(Matiu 24:15-21, Mak 13:14-19)*

<sup>20</sup> E Iesu e ranga lel me poeiena, “Pöata te tara romana mia limiou u soldia u parpara e gono hahiser i Jerusalem, nonei te atei sila namoa limiou a pöata hamanasa tegi kato homi hakapa menai a taun teka. <sup>21</sup> Ba pala te ka ria romana i Judia te bus uaier romana tara pokus. Kaba eresi te ka ria romana i Jerusalem egi laba nen, ba e resi te ka ria romana tara man han ielesala egima tatei tasuia romana i Jerusalem. <sup>22</sup> Taraha? Nonei a man lanin hahuna teka te kato hamanena romana a manka hoboto ti ranga mamin turu Buku u Göagono. <sup>23</sup> A nitaatagi pan koru e butuna romana tara touhaliou u pika, na tara touhaliou te hihasusur romana nonei tara pöata. A pöata a omi koru e butuna romana tara han teka, ne Sunahan e raharaha koru rena romana u katuun teka. <sup>24</sup> A palai e ngats hamate rari romana u kilatan hiatatung, ba palai te kits raier romana bate la merari tara man taina man han turu tsiktsiki i puta teka. Ba u katuun tema Jiu ri tena pita hohomier romana a taun i Jerusalem bate pile kap naren e antunana tega kapa uu romana a pöata turu katuun halhal teka.”

*E Iesu e la pouts nama romana  
(Matiu 24:29-31, Mak 13:24-27)*

<sup>25</sup> Be Iesu e poeiena, “U hiharöto e butuna romana tara pitala na tsihou na turu pitopito. Na u han u parpara i puta e tutu mer romana a nitaatagi pan, na e matouter romana u hahalou pan. <sup>26</sup> U katuun e maten topi mer romana a nimatout te hakats mena rouien a man nomi te

butuna romana i puta. Taraha? A mamanaka na i kolö e gagasina romana. <sup>27</sup> Ba nori te tarer romana alia tu butun Katunuma e la sila guma romana turu köasi i kolö na nitagala na u ualesala pan. <sup>28</sup> Tara pöata te taniaan butuna romana a manka teka, alimiou go ongoloiam bate sasaala miou. Taraha? A pöata tego lu pouts merai limiou e Sunahan e susuku hakapa!”

*U hihatuts turu ruei te suluna  
(Matu 24:32-35, Mak 13:28-31)*

<sup>29</sup> Be Iesu e hatei raneien u haharuei teka, “Hakhakats naiam a man ruei te tatei sulur. <sup>30</sup> Tara pöata te suluna u ngal, ba limiou te atei sile miou a pöatan nou turu ngal e susukuna. <sup>31</sup> Na e kato has uana iesana, pöata te tare mia romana limiou a manka teka, ba limiou te atei sil hase mou a Nipepeito tere Sunahan e susukun butu nama. <sup>32</sup> Alia e ranga hamana mera goulimiou, a mamanaka hoboto teka e butu romanana ba palair u katuun teka tema mate noari. <sup>33</sup> U kolö na u puta ena taiar romana, kaba u raranga i tar ema antunan taia nei romana.”

*U katunun tsitsilo egi tara kap haniga*

<sup>34</sup> Be Iesu e poeiena, “Tara kap haniga naiam a peisa milimiou! Ema niga nei tego hakats las mena milimiou a tou nou na tou roro ba limiou te ua hatutu miou bate toku sile miou a manka na i puta. Alimiou e namots asingoto namiou tego songots butu uama nonei u Lan Pan tara Tsunono. <sup>35</sup> Taraha? U Lan Pan teka e la here namei romana a tanga bate butuna tara man han na turu katuun hoboto te ka ria i puta. <sup>36</sup> Tara kap hanigaiam bate singo nitöa uamiou tere Sunahan, ba limiou



te ka memou a nitagala tego hakarasa ba menami limiou a man nomi teka te butu nouen, ba limiou te tatei tuol has mia romana i matar, alia tu butun Katunuma.”

<sup>37</sup> Mamanu lan e Iesu e hihatutsia tara Luman Lotu Pan. Ba tara man bong nonei e na sohoia turu pokus ti ngöei u Pokus tara Ruein Olip. <sup>38</sup> Ba u katuun hoboto e roron la uaier tara Luman Lotu Pan tara bongbong koru tina hahengo uaien i tanen.

## 22

*U korupakö tegi kato hamate menai e Iesu  
(Matiu 26:1-5,14-16, Mak 14:1-2,10-11, Jon 11:45-53)*

<sup>1</sup> A pöata e susuku hakapa tara Kannouna tara Beret te möa tu Is, ti ngö hasei u Paska. <sup>2</sup> Ba u pris pan nu tson hihatuts tara Lo e torohanan sake ner ta maroro tegi kato hamate momous menaien e Iesu. Taraha? Nori i matoutir u katuun.

<sup>3</sup> Be Satan e seinä tere Judas Iskariot, a töa tara maloto na huol a katunun tsitsilo tere Iesu. <sup>4</sup> Be Judas ena ranga gono merena u pris pan na u katuun pan turu tson kahete na tara Luman Lotu Pan, tega mar hala menaien e Iesu i taren. <sup>5</sup> Ba nori e sasaalar me kitser u raranga tegi hala menaien ta moni. <sup>6</sup> Be Judas e haniga nena a ka teka me tanian sake nena ta maroro tega hala hamous menaien e Iesu i taren.

*U Herokona tara Kannouna turu Paska  
(Matiu 26:17-25, Mak 14:12-21, Jon 13:21-30)*

<sup>7</sup> Tara pöata tara Kannouna tara Beret te möa ta Is, u lan tegi atung hamate merai u tunan sipsipina

туру Паска е буту hakapa. <sup>8</sup> Be Iesu e tula mera nei ere Pita mere Jon u raranga teka, “La mula ba limiou tena hamatskōe miou a manka, bara tena noue rou a kannouna туру Паска.” <sup>9</sup> Ba nori e rangate ren, “Alō e ngilem ime tegona herokeia lam a kannou teka?” <sup>10</sup> Ba nonei e poeiena, “A tōa tson te sōate nou a tōa tabeli ramun e hitupali gono mera nou limiou te butu moa limiou iahana taun. Ba limiou te kukutie moien batena tasu moa tara luma te la uanouen. <sup>11</sup> Ba limiou tena poe mou tara katuun terena luma, ‘A Tson Hihatuts e poe nama, Ime te kana a makum temi nou gono mera goua lia u katunun tsitsilo i tar a kannouna туру Паска?’ <sup>12</sup> Ba nonei te harōto ranoui limiou a makum pan iahana luma iasa te ka hakapa mei u tebol na man gungum. Nonei tara makum teka tena heroke moa limiou a mamanaka tara kannou.” <sup>13</sup> Ba nori e lar mena sabier a mamanaka temar ranga mera leien e Iesu, me heroko taleier a kannouna туру Паска.

*A Komunio Tutuun*

*(Matiu 26:26-30, Mak 14:22-26, 1 Korin 11:23-25)*

<sup>14</sup> A pōata e буту hakapa be Iesu nu aposol e gum ria туру tebol. <sup>15</sup> Ba nonei e poeiena i taren, “Alia e ngil koruegu tego nou gono merai limiou a kannouna туру Паска teka i mamina tegona sagoheia lia a kamits! <sup>16</sup> Taraha? Alia e ranga mera goulim-iou, alia ema antunan nou lele gouien romana e antunana tara pōata te буту hamanana a manka te haharuei nena a kannou teka tara Nipepeito tere Sunahan.” <sup>17</sup> Be Iesu e luena a kap uain me haniga uana tere Sunahan me poeiena, “Lueiam a kap teka ba limiou a man tōtōa te ua mia i tanen.

<sup>18</sup> Taraha? Alia e ranga mera goulimiou, alia ema ua lele gou ii u uain e antunana tara pöata te la nama romana a Nipepeito tere Sunahan.” <sup>19</sup> Be Iesu e lu hasena a beret me haniga uana tere Sunahan me posepose nen. Ba nonei e hala ranen me poeiena, “Nonei u tuenrei i tar teka tena mate sil ranou limiou. Alimiou ena markato has uamou teka bate hakats pouts namou lia.” <sup>20</sup> Ba i murina ti nou hakapaien, be Iesu e luena a kap uain me markato has mena neien iesana me poeiena, “A kap teka te takis bera noulimiou e haharuei nena u ranga hamana u tsimus tena kitse gou ii lia u rahatsing i tar.

<sup>21</sup> “Kaba taraiaam, a katuun te hala nanoua lia turu pakö i tar e nou gono has menou lia tara kannou teka! <sup>22</sup> E manana, alia tu butun Katunuma egona mate, temar hopö kap menai e Sunahan alia. Kaba a nomi pan e butu noua nonei tara katuun tena hala nanoua lia turu pakö!” <sup>23</sup> Ba u katunun tsitsilo e hiarangrangata naier esi koru ta töa i gusuren te katoe nou a ka teka.

### *Esi te tson mammam nou?*

<sup>24</sup> Ba u katunun tsitsilo e hialaalater esi tega mammamia i taren. <sup>25</sup> Be Iesu e poeiena i taren, “U king tara man han i puta e roron pile hakarapoto koru raier u katuun i taren, na u katuun pan e ngil beri a peisaren a solo ‘A Tsunono Pan a Niga.’ <sup>26</sup> Kaba a markato teka ema tatei ka neia i gusumilimiou. A katuun i tamilimiou te panina ega kato here nai a peisanen a katuun papala, na tsunono i tamilimiou e tatei here nei i katunun kui. <sup>27</sup> Esi te panina, a katuun te gumuna bate nouna, tsi a katuun te sösöatena a kannou? A katuun te

gumuna, nonei te panina. Kaba lia e ka gia i gusumilimiou e heregi a katunun sösöata kannou. <sup>28</sup> Alimiou u ka gono memoulia tara man pöata ti torohaneia lia u katuun. <sup>29</sup> Ba lia te hala ragou ii limiou a nitsunono tego king uaiam limiou, temar hala has menai lia e Tamar a nitsunono tego king uu lia. <sup>30</sup> Alimiou ena nou mou nena ua gono memou lia tara kannou tara Nipepeito i tar, ba limiou tena gum mia romana tara man gungum a man göagono turu king, ba limiou te tsonun onuna moua romana tara maloto na huol a hun katunura i Israel.”

*E Iesu e hatei mamin tega holis uu e Pita  
(Matu 26:31-35, Mak 14:27-31, Jon 13:36-38)*

<sup>31</sup> Be Iesu e poeiena tere Pita, “Saimon, Saimon, hengo! E Satan e rangata hatagala sil tega torohana meraien limiou hoboto, be Sunahan e hanigana. A nitorohana tere Satan teka e here nei a katuun te lu katena a kannou a niga na bita. <sup>32</sup> Kaba lia u singo hakapa sileiou lö, o Saimon, tegoma hapolasa menai lö a nihamana i tamölö. Ba tara pöata te hakopis pouts muma lö romana i tar, ba lö te hatagala rem u toulamölö.” <sup>33</sup> Be Pita e poeiena, “O Tsunono, alia e hanein la gono megou lö tara karabus na tou mate has!” <sup>34</sup> Kaba e Iesu e ranga me poeiena, “Alia e ranga megou lö, o Pita, i bong teka a keriou ema kekeretskö noa noi ba lö te holis namou lia tara topisa a pöata.”

*A pous moni na pora na u kilatan hiatatung*

<sup>35</sup> Be Iesu e poeiena i taren, “Tara pöata tu tula ra lia limiou, ba limiou ema la memule ta pous moni na ta pora na tu sendol, alimiou u makmakum ba

has naiam ta ka?” Ba nori e ranga palise ren me poeier. “E möa.” <sup>36</sup> Be Iesu e poeiena, “Kaba esi te ka mena a pous moni tsi a pora ega lueien. Na esi te möana tu kilatan hiatatung ega haholin u hasobö pan i tanen bate holena tu töa. <sup>37</sup> Taraha? Alia e ranga mera gilimiou a ka teka: u raranga turu Buku u Göagono ega butu hamana te poeiena, ‘Nonei i ngöe ii a katuun a omi.’ Nonei e ranga nanou lia, na u raranga ti koloto sile ii lia ega butu hamana.” <sup>38</sup> Ba u katunun tsitsilo e poeier, “Tsunono, u huol u kilatan hiatatung teka.” Ba nonei e poeiena i taren, “Hanöa iam!”

*E Iesu e singo uu tere Sunahan  
(Matu 26:36-46, Mak 14:32-42)*

<sup>39</sup> Be Iesu nu katunun tsitsilo e laba ner a makum iasa me la uaier turu Pokus tara Ruein Olip ti roron markato uaien. <sup>40</sup> Pöata ti tukuien tara makum teka, ba nonei e poeiena i taren, “Singo uaiam tere Sunahan. U hiamus e namots tagala saluhe bala rariou limiou.” <sup>41-42</sup> Ba nonei e gamon laba ranen, antunaia te lapo menari a hatu, me hatukununa me singona, “O Tamar, te ngil mia lö, ba lö te hatongo kap ba namoi lia a kamits teka te katsin butuna i tar. Kaba lö goma kato uai turu ngil i tar. Alö go markato uu turu ngil i tamölö.” <sup>43-44</sup> Ba töa angelona i Kolö e butuna i tanen me hatagale nen. Taraha? E Iesu e sagohi a nitaatagi pan koru. Ba nonei e singo hatagala koru lenina. Ba u sioung i tanen e butu here nei u rahatsing me rus uana i puta. <sup>45</sup> I murinen ba nonei e takeina me la pouts uana turu katunun tsitsilo i tanen mena sabe ranen ba nori te sohor. Taraha? Nori i mate koru mei a nitaatagi

pan. <sup>46</sup> Ba nonei e poeiena i taren, “Aha te soho memi limiou? Takei iam bate singo uamiou tere Sunahan. U hiamus e namots tagala saluhe rariou limiou.”

*E Iesu i pilein*

*(Matiu 26:47-56, Mak 14:43-50, Jon 18:3-11)*

<sup>47</sup> E Iesu e ranga noa has bu katuun te tukur. E Judas, a töa tara maloto na huol a katunun tsitsilo i tanen, te peigi ramen. Ba nonei e la uanama tere Iesu tegomi mutsi menaien abuabunen. <sup>48</sup> Be Iesu e poeiena, “Judas, alö e haröto namia lia turu pakö i tar te mutsi mena milö alia?”

<sup>49</sup> Pöata ti tareia u katunun tsitsilo a ka te butu hamanasa, ba nori e poeier, “O Tsunono, alö e ngilem alam go atung raien u kilata?” <sup>50</sup> Ba töa i taren e ngats ba nena u talinga tara pal matou tara katunun kui turu pris pan. <sup>51</sup> Kaba e Iesu e poe, “E antunana!” Ba nonei e sebeleiena a katuun me kato haniga poutsena a talinganen.

<sup>52</sup> Be Iesu e poeiena turu pris pan na u katuun pan turu tson taratara kap tara Luman Lotu Pan na u tsunono ti la silema tegimi lu menaien, “Aha te la sil memu mei limiou a man kilatan hiatatung na man baru batemi pile kap here nami lia a kopkop? <sup>53</sup> Alia u ka gono meraiou limiou turu mamana u lan iahana Luman Lotu Pan, kaba limiou ima pile kap nami lia. Kaba a pöata i tamilimiou teka, a nitagalana turu kuhil.”

*E Pita e holisin tega atei sil menaien e Iesu*

*(Matiu 26:57-58,69-75, Mak 14:53-54,66-72, Jon 18:12-18,25-27)*

<sup>54</sup> Ba nori e pile kap naier e Iesu me lu mena rien i luma tara tsunono pan turu pris. E Pita

e kukutema, kaba e lehana ba raien. <sup>55</sup> U tula i haatseia i gusuna makum i pal matana luma, be Pita e hasohalana turu katuun ti gum hahisi u tula. <sup>56</sup> Tara pöata te tareia a töa taholun kui e Pita te gum uaien i rehina u tula, ba nonei e tara hamatskö uana tere Pita me poeiena, “A katuun teka e ka gono has mei e Iesu!” <sup>57</sup> Be Pita e holisina me poeiena, “Alia ema atei sile gien!” <sup>58</sup> Ema lehanai, ba tana katuun e tare nen me poeiena tere Pita, “Alö has a töa i taren!” Be Pita e ranga palisina, “Alia u möa!” <sup>59</sup> Ba i murina töa aua, ba tana katuun e ranga hatagala lel nena e Pita, “U mana koru a katuun teka e ka gono has mei e Iesu. Nonei has a toun Galili!” <sup>60</sup> Be Pita e ranga palisina, “Alia ema atei silegi a ka te ranga nemölö!”

Tara pöata noa has te rangaia e Pita, ba keriou a tson te kekeretsköna. <sup>61</sup> Ba Tsunono e habiritsina me tara hamatskö uana tere Pita, be Pita e hakats sabe nena u ranga tara Tsunono te ranga mam naien, “I bong teka a keriou ema kekeretskö noa noi balö te holis namou lia tara topisa pöata.” <sup>62</sup> Be Pita e lakasana me na tabe hataatagi koruna.

*Nori i hahakosiin e Iesu me muke ren  
(Matiu 26:67-68, Mak 14:65)*

<sup>63-64</sup> Ba u katuun ti tara kapiin e Iesu e hahakos naren. Ba nori e kitser a matanen me muke ren me rangate ren, “Alö a propet? Bara, esi te muke lalou lö?” <sup>65</sup> Ba nori e katoeier u mamana u ranga u omi i tanen.

*E Iesu i hakeia turu Kout Pan  
(Matiu 26:59-66, Mak 14:55-64, Jon 18:19-24)*

<sup>66</sup> Tara bongbong ba u tsunono turu Jiu na u pris pan nu tson hihatuts tara Lo e gono hobotor, be Iesu e lu menari turu hagum i taren. <sup>67</sup> Ba nori e poeier i tanen, “Hatei ramoulam, alö e Mesaia?” Ba nonei e ranga palisina, “Sanena alia go ranga meraiou limiou, ba limiou tema hamane mi lia. <sup>68</sup> Na sanena alia go rangata raiou limiou tu töa tu harangata, ba limiou tema palise mi lia. <sup>69</sup> Kaba i murina a pöata teka, alia tu butun Katunuma ena gum gia romana tara pal matou tere Sunahan te Tagala Soköna!” <sup>70</sup> Ba nori hoboto e rangatar, “Alö banei a Pien Tson tere Sunahan?” Ba nonei e ranga palis ranen, “Alimiou peisa has te ranga miou.” <sup>71</sup> Ba nori e poeier, “Ara ema ngil lele rei ta katuun tega sakeien tu ranga! Ara e hengo hakape lila te ranga homi ua lalen.”

## 23

### *E Iesu i kout naia tere Pailat a gamman*

*(Matiu 27:1-2,11-14, Mak 15:1-5, Jon 18:28-38)*

<sup>1</sup> Ba u katuun hoboto e taker me la menari e Iesu i matana e Pailat. <sup>2</sup> Ba nori e tanian kout ner e Iesu me poeier, “Alam u tari a katuun teka e kato hatuturi u katuun i tamulam turu hihatuts i tanen. Nonei e ranga hapiouni tego hala menai lam a takis tere Sisa. Na nonei e roron ngöe nei a peisanen e Mesaia, a king.” <sup>3</sup> Be Pailat e rangate nen, “Alö a King turu Jiu?” Be Iesu e ranga palisina, “Alö peisa has te rangam.” <sup>4</sup> Be Pailat e poeiena turu pris pan na turu katuun u parpara ti gono, “Alia ema sabiegi ta ka ta omi tegi hahuna sile ii a katuun teka.” <sup>5</sup> Ba nori e ranga hatagala korur me poeier, “Nonei e roron hatutsir u katuun



туру han hoboto i Judia me kato hataktakei ranen. Nonei e taniama i Galili batemi hanöan töa na teka.”

*E Iesu i kout naia tere Herot a king*

<sup>6</sup> Pöata te hengoeia e Pailat a ka teka me rangatana, “A katuun teka a toun Galili?” <sup>7</sup> Ba nori e hatanganar, be Pailat e töan hala mena nei e Iesu tere Herot te ka hasia i Jerusalem nonei tara pöata. Taraha? E Herot e tara kapiin a provins i Galili. <sup>8</sup> Na nonei e sasaala koru te tara menaien e Iesu. Nonei e hengo nen na e solon ngil hasi tego tara menaien. Nonei e ngilin tari tega kato menai e Iesu tu mirakol. <sup>9</sup> Be Herot e rangate nei e Iesu a man harangata a man parpara, kaba e Iesu ema palise ii tu töa tu harangata i tanen. <sup>10</sup> Ba u pris pan na u tson hihatuts tara Lo e la hasusuku ruma me kout hatagala koru naier e Iesu. <sup>11</sup> Be Herot na u soldia i tanen e hahakos ner e Iesu me maman ranga naren. Ba nori e hasei rien u hasobön king me hala pouts mena rien tere Pailat. <sup>12</sup> E Pailat na e Herot i hiapalpal mam, kaba nonei turu lan teka nori i hiakaka haniga pouts.

*E Pailat e rangein e Iesu ga mate*

*(Matiu 27:15-26, Mak 15:6-15, Jon 18:39-19:16)*

<sup>13-14</sup> Be Pailat e ngö gögono rena u pris pan na u tsunono nu katuun me poeiena i taren, “Alimiou mi piou namia a katuun teka i tar bate pei miou nonei e kato hatutu u hakats turu katuun. Kaba lia e katoe gula u kout i tanen i matamilimiou, na lia ema sabie gulei ta ka ta omi i tanen te kout memien limiou. <sup>15</sup> Na e Herot has ema sabie namei ta ka ta omi i tanen. Taraha? Nonei e hala pouts mena meien i tamulam. Hengoiam,

a katuun teka ema katoe ii ta ka ta omi tega mate sileien. <sup>16</sup> Bara, alia e halahus nagoen bate hapuresse gen.” (<sup>17</sup> Turu mamana u hiningal tara pöata tara Kannouna turu Paska, e Pailat e roron hapuresse beraien a töa tson te kaia tara karabus.)

<sup>18</sup> Kaba u katuun i ku hoboto me poeier, “Atung hamateiam a katuun teka, bate hapuresse mena mumei e Barabas i tamulam!” <sup>19</sup> (E Barabas i haka mei tara karabus te hatakei menaien a hiatatung tara gamman iahana taun i Jerusalem, na nonei e atung hamate hasi a katuun.) <sup>20</sup> E Pailat e ngilin hapuresse e Iesu, ba nonei e ranga lel merena u katuun. <sup>21</sup> Kaba nori i ku hapan noa lasi, “Nila namia tara kuruse! Nila namia tara kuruse!” <sup>22</sup> Ba e Pailat e ranga hatopisana i taren, “A saha ka a omi te katoeien? Alia ema sabie gulei ta ka ta omi tega katoeien ba nonei te mate sile nen! Alia e halahus negoen bate hapuresse gouen.”

<sup>23</sup> Kaba nori i ku hapan koru noa has tegi nila menai e Iesu tara kuruse. Ba u ranga i taren e palisena u hakats tere Pailat. <sup>24</sup> Be Pailat e töa kukutiena u ngil i taren me kitsena u ranga tega mate uu e Iesu. <sup>25</sup> Ba nonei e hapuresseiena a katuun ti ngileien, a katuun teka i haka mei tara karabus te habutu menaien a hiatatung na te hihipuli uaien. Be Pailat e hala mena nei e Iesu i taren egina kato menaien ti ngil uaien.

*E Iesu i nila naia tara kuruse  
(Matu 27:32-44, Mak 15:21-32, Jon 19:17-27)*

<sup>26</sup> Pöata ti la meien e Iesu, ba nori e sabier a töa katuun a solonen e Saimon, a toun Sairini. Nonei e hagou tukuia i Jerusalem. Ba nori e pile naren me hasöate rien a kuruse tere Iesu, ba nonei

e kukutena i murina e Iesu. <sup>27</sup> Ba u katuun u parpara e kukutier e Iesu. A palair u touhaliou ti kaia i gusuren i taatagi koru me taber. <sup>28</sup> Be Iesu e habirits uana i taren me poeiena, “Touhaliou ri Jerusalem, ma tabe sile milia. Tabe sileiam a peisa milimiou na galapien i tamilimiou. <sup>29</sup> Taraha? A pöata e la nama te pei ria romana, ‘A touhaliou u kuba ti mamala pose ii ta pien na touhaliou tima hasuse ii ta pien, nori egi sasaala!’ <sup>30</sup> Nonei tara pöata u katuun e poeier romana tara pokus pan, ‘Kono kap ramoulam,’ na tara pokus a tetenei, ‘Hu kap ramoulam bate hamous ramoulam!’ <sup>31</sup> Te markato mena rien lia teka, alia te heregi u ruei u pelpeli, gime te markato uaren romana turu katuun te hereri u ruei u lango?”

<sup>32</sup> A huol a katuun a omi i lu has merai tegina kato hamate gono meraien e Iesu. <sup>33</sup> Tara pöata ti tukuien tara makum ti ngöe ii U Lakö, ba nori e nila naria e Iesu tara kuruse, na huol katuun a omi i nila has raia tara huol a kuruse i rehinen, a töa tara pal matou na tai tara pal keruka. <sup>34</sup> Be Iesu e singo uana tere Sunahan me poeiena, “O Tamar, alö go luban a markato a omi i taren. Nori ema atei sileri a ka te katoe ren.” Ba u soldia e satu siler u hasobö i tanen, me molamola naren. <sup>35</sup> U katuun ti tuol ia i susuku i tara uu i tanen, kaba pal kapan turu Jiu i hahakos naien me poeier, “Nonei e taguhir a palai. Bara, tego Mesaia uen te hopö kapiin e Sunahan, ga nonei ega taguhu talei a peisanen!” <sup>36-37</sup> Na u soldia has i hahakos naien. Ba nori e la hasusuku uaruma i tanen me torohanan haue rien u uain u melil me poeier, “Tego King uu lö turu Jiu, bara, taguhu talei a

peisamölö!”

<sup>38</sup> A man ranga ti nila naia i bakuna kuruse i tanen, NONEI A KING TURU JIU TEKA. <sup>39</sup> A töa katuun a omi te kuteia i rehinen e ranga homia tere Iesu me poeiena, “Alö e Mesaia? Bara, taguhu talei a peisamölö na lam has!” <sup>40</sup> Kaba taina katuun a omi te kuteia i hapala e raharaha me poeiena, “Alö ema matoutemi e Sunahan? A nihahuna i tarara e matsköna. <sup>41</sup> Taraha? E palisena a markato a omi ti kati ra. Kaba a katuun teka ema katoe ii ta ka ta omi.” <sup>42</sup> Ba nonei e poeiena, “O Iesu, hakats kap namoulia tara pöata tena butun King moa lö!” <sup>43</sup> Be Iesu e poeiena i tanen, “Alia e ranga hamana megou lö, i romana tuun has, alö ena ka gono memoua lia i Kolö.”

*A tou mate tere Iesu  
(Matiu 27:45-56, Mak 15:33-41, Jon 19:28-30)*

<sup>44-45</sup> Tara 12 kilok tara söasa, ba pitala e piri hanöana bu kuhil e kopo kap hoboto nena a han me antunana tara 3 kilok. Ba u labalaba pan te kuteia tara Luman Lotu Pan e takiis katana me katoena a huol a makum. <sup>46</sup> Be Iesu e ku hapan koruna, “O Tamagulia! Alia e hake gia u namnamei i tar i limamölö!” Nonei e mar ranga las uu teka bate matena. <sup>47</sup> Ba katuun pan turu soldia e tarena a manka teka, ba nonei e soloseiena e Sunahan me poeiena, “U mana koru, nonei a katuun a niga!” <sup>48</sup> U katuun u para ti gono sil a manka teka i tara kapiin a manka te butu, ba nori e taatagi korur me mukumuku hoboter a lumlumaren me la pouts uaier i han. <sup>49</sup> A man hahikapien tere Iesu na man touhaliou ti kukutie men i Galili i tuol halehana me tarer a mamana teka.

*E Iesu i kahoein**(Matiu 27:57-61, Mak 15:42-47, Jon 19:38-42)*

<sup>50-51</sup> A töa katuun a solonen e Josep a toun Ari-matia, a töa taun turu Jiu. Nonei a katuun a niga, na nonei e hahalosi tega butu uama a Nipepeito tere Sunahan. Nonei a pala turu Kout Pan turu Jiu, kaba nonei ema hanige ii a ka ti hatangana nen na ti katoeien tere Iesu. <sup>52</sup> Ba nonei e la silena tena singo menaien u tuenrei tere Iesu tere Pailat. <sup>53</sup> Be Pailat e hanigana, be Josep ena lu hakoulena u tuenrei tere Iesu, ba nonei e pitse neien u labalaba u hiaka, me hahonge nen tara kiou ti katoeia turu lapo, a kiou teka e möa noa ta mate tegi hakeia iahanen. <sup>54</sup> Nonei u lanin heroko tara mamanaka, a pal lahi bong hamanasa, na u Lan u Göagono turu Jiu e tania mena te tsiruku uana a pitala. <sup>55</sup> Ba touhaliou ti la gono mema e Iesu i Galili e la gono meier e Josep mena tarer a kiou na ime timar hopö menai a tuenreina e Iesu iogana. <sup>56</sup> Ba nori e la pouts uaier i han mena hamatsköer a manka man soka haniga tara tuenreina e Iesu. Ba nori e husa meier u Lan u Göagono, temar ranga uu a Lo turu Jiu.

**24***E Iesu e takei poutsia tara tou mate**(Matiu 28:1-10, Mak 16:1-8, Jon 20:1-10)*

<sup>1</sup> Tara bongbong koru turu Sandei ba touhaliou e la uaier tara kiou me söater a manka a man soka haniga ti heroko mameien. <sup>2-3</sup> Ba nori ena sabeier a hatu i hategele bane ii a matana a kiou, me la uaier iogana. Kaba nori ima sabe ii a tuenreina e Iesu a Tsunono. <sup>4</sup> Nori i tuol ia tara kiou me hakats

koru ner a ka teka, ba huol a tson e songots butur me tuolria i rehiren, u hasobö i taren e kankanaha koru bate lilotona. <sup>5</sup> A touhaliou i matout koru, ba nori e tuturukur, ba huol a katuun e poeier i taren, “Aha te sake sile milimiou a katuun a töatöa i gusur u katuun u mate? <sup>6</sup> Nonei ema ka neia teka. Nonei e takei hakapa lala. Hakats pouts naiam a ka te ranga meraien limiou tara pöata te kaien i Galili. <sup>7</sup> Nonei e pei, ‘Alia tu butun Katunuma egi hala menai turu katuun u omi, ba nori te nila naroua lia tara kuruse, ba lia te takei pouts megu u hatopisana u lan.’” <sup>8-9</sup> Ba touhaliou e hakats sabe pouts ner u raranga tere Iesu, me kopis pouts uaier i han mena ranga naria a ka teka tara maloto na töa katunun tsitsilo na tara palai hoboto has. <sup>10</sup> A touhaliou teka ere Maria Matalina mere Joana ne Maria, e tsinana e Jemis. Nori mera palair a touhaliou ti ka gono meraien ti ranga merai u aposol a manka teka. <sup>11</sup> Kaba u aposol i hengo herenai u ranga tara touhaliou u ranga papala. Ba nori ema hamana ri. <sup>12</sup> Kaba e Pita e takei me piata uana tara kiou, ba nonei e hakono uana iogana me tarena u labalaba u hiaka puku. Ba nonei e la pouts uana i han me hakats koru nena a saha ka te butu.

*E Iesu e lau i Emaus  
(Mak 16:12-13)*

<sup>13</sup> Nonei noa has turu lan ba huol a katuun tere Iesu e la uar tara töa han a solonen i Emaus, e ka halehana hapopo banaia i Jerusalem tara maloto na töa a kilomita. <sup>14</sup> Ba nori e hiararanga ner a manka hoboto te butu. <sup>15</sup> Pöata ti la noaien, be Iesu e la hasusuku nama me tanian la gono mera nen.

<sup>16</sup> Nori i tareien, kaba a mataren i hasaha kap ba rai tegi marei menaien nonei e Iesu. <sup>17</sup> Be Iesu e poeiena i taren, “Aha te hiararanga nami limiou te tataala mia limiou i maroro?” Ba nori e tuol hakakamotor me mata haharomanar. <sup>18</sup> Ba tōa i taren a solonen e Kliopas e ranga palise nen, “Alö lahas a tōa puku a katununa i Jerusalem tema atei silemi a manka te butu tara man lan te la hakapa?” <sup>19</sup> Be Iesu e rangatana, “A man saha manka?”

Ba nori e ranga palise ren me poeier, “A manka te butuia tere Iesu a toun Nasaret. A katuun teka a propet, na nonei e kato a man ranga man tagala na man mirakol has. Nonei a tson hihatuts a tagala i matana e Sunahan na u katuun hoboto. <sup>20</sup> U pris pan na u tsunono i tarara i hala naiien tegina kato hamate menaien, ba nori e nila narien tara kuruse. <sup>21</sup> Alam u hamani: ‘Nonei a katuun temi sakahis poutsir u katunura i Israel.’ Aa, na u lan i romana u hatopisana u lan has i murina te butuia a manka teka. <sup>22-23</sup> Na palair a touhaliou tara pala i tamulam i hasingoto raiou lam. Nori i la uu tara kioun mate, kaba nori ima sabe ii u tuenrei i tanen. Ba nori e kopis ruma me poeier nori i tarema u angelo ti hatei raien te tōatōa pouts uaien. <sup>24</sup> Ba palai tara pala i tamulam e la uaiier tara kiou mena tara haseier a manka e marka uu timar ranga uu a touhaliou, kaba nori ima tarei e Iesu.”

<sup>25</sup> Be Iesu e poeiena i taren, “Alimiou ema hakats hanigami. U hakhakats i tamilimiou ema hasese korunei tego hamana mena milimiou a mananaka ti rangein u propet i manasa! <sup>26</sup> E matskö noa hasina tega sagoho menai e Mesaia a kamits teka bate tōan luena a nitsunono i tanen.” <sup>27</sup> Be

Iesu e hatarare raneien u mamana u raranga turu Buku u Göagono te hatei nanen, e taniama tara man buku te kolotein e Mosis batemi noana tara man raranga ti kolotein u propet hoboto. <sup>28</sup> Pöata ti la hasusukuien tara han ti la uaien, be Iesu e hohou la saluhe ranen. <sup>29</sup> Ba nori e ranga hapiou meren me poeier, “Ka gono mera moulam. A ka e katsin kuhil hamanasa.” Ba nonei e tasuna mena ka gono mera nen. <sup>30</sup> Ba nonei e gum gono mera nen ti katsin nou uaien me luena a beret, me haniga uana tere Sunahan. Ba nonei e poseiena a beret me hala raneien. <sup>31</sup> Ba mataren e töan kalatana me alesalana ba nori e mareie ren, kaba nonei e songots taiaia i rehiren.

<sup>32</sup> Ba nori e hiararanga ria i taren pouts, “U mana, a torirara e sagohe nama te mana uana u raranga i tanen, tara pöata te ranga namen i maroro me hatuts ranei ra u Buku u Göagono.” <sup>33</sup> Ba nori e takei hobotor me la pouts uar i Jerusalem mena sabe rer a maloto na töa katunun tsitsilo na palai has ti ka gono meraien. <sup>34</sup> Ba nori e poeier tara huol, “A Tsunono e takei hamana lala na nonei e butu has lala tere Saimon!” <sup>35</sup> Ba nori a huol e hatei rarien a ka te butuia i maroro, na timar marei menaien e Iesu te pose menaien a beret.

*E Iesu e butuia turu katunun tsitsilo i tanen  
(Matiu 28:16-20, Mak 16:14-18, Jon 20:19-23,  
Aposol 1:6-8)*

<sup>36</sup> Ba tara pöata ti hatei naien a manka teka, be Iesu e songots butuna me tuolna i gusuren me poeiena i taren, “A masalohana e tatei ka gono mera nou limiou.” <sup>37</sup> Kaba nori i asingoto koru



me matoutur. Nori i pei lasi a mate. <sup>38</sup> Ba nonei e poeiena i taren, “Aha te toku memi limiou bate hula tori miou? <sup>39</sup> Tareiam a man limar na man mour bate mareie miou a peisar. Alia siba! Sebele moulia ba limiou te atei mou. A mate ema ka menei tu benö na tu tsinö te kato uagu lia.” <sup>40</sup> Pöata te rangaien ba nonei e haröto raneien a man limanen na man mounen. <sup>41</sup> Kaba nori ima hamana noahas ii. Taraha? Nori i sasaala koru me hula hakatsir. Ba nonei e rangata ranen, “Ta kannou e kana?” <sup>42-43</sup> Ba nori e hale rien a makumun iena a mösa, ba nonei e lue nen me noue nen ti taraien.

<sup>44</sup> Ba nonei e poeiena i taren, “Nonei koru a manka teka tu ranga merai lia limiou tara pöata tu ka gono noa meraia lia limiou: a mamanaka ti koloto naia lia tara Lo tere Mosis na tara man buku turu propet na turu Sam ega butu hamana koru.” <sup>45-46</sup> Ba nonei e kalatena u hakhakats i taren tegi atei sil menaien u Buku u Göagono, me poeiena i taren, “A manka teka i kolotein: e Mesaia ega sagohi a kamits na ega mate bate takei poutsuna turu hatopisana u lan. <sup>47</sup> Na ka teka i koloto hasiin: u bulungana egi hatei la naia turu hun katuun hoboto i puta bate taniaa i Jerusalem. Ba u katuun te palis ba ner a man markato a man omi bate hamana uaier tere Mesaia, e Sunahan e tatei luba nena a markato a omi i taren. <sup>48</sup> Na limiou tu tara hakapeiam a manka teka ena habulungana namouen turu katuun. <sup>49</sup> Hengoiam. Alia e hala nagou a ka te ranga hamanein e Tamar i manasa tegi hala rai limiou. Kaba limiou go hahaloso bumia teka i Jerusalem e antunana te butu nama romana a nitagala i Kolö bate kopo kap ranou limiou.”

*E Iesu i lu menai i Kolö*  
(*Mak 16:19-20, Aposol 1:9-11*)

<sup>50</sup> Be Iesu e la mera neien tara taun i Betani, ba nonei e hasoa sei nena a limanen me kalala ranen. <sup>51</sup> Pöata te kalala noa raien e Iesu, ba nonei e laba ranen ti lu sei menaien i Kolö. <sup>52</sup> Ba nori e hatsunone ren me la pouts mer a nisasaala pan i Jerusalem. <sup>53</sup> Na tara mamana pöata nori i kaia i Luman Lotu Pan bate haniga uaier tere Sunahan.

**U BULUNGANA U NIGA**  
**The New Testament in the Halia Language of Papua**  
**New Guinea**  
**Nupela Testamen long tokples Halia long Niugini**

copyright © 2020 Wycliffe Bible Translators, Inc.

Language: Halia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-08

---

PDF generated using Haiola and XeLaTeX on 8 Mar 2023 from source files dated 5 May 2022

03815460-d6a0-5a59-aa7b-2a4278f7e67d